

Landesbibliothek Oldenburg

Digitalisierung von Drucken

Initia Rhetorica

Ernesti, Johann August

Lipsiae, MDCCCLVII.

VD18 13521039

urn:nbn:de:gbv:45:1-17978


AG
222



Landesbibliothek Oldenburg

10.

AG 222



INITIA RHETORICA

A V C T O R E
IO. AVGVSTO ERNESTI



EDITIO SECUNDA

LIPSIAE - .
APVD IOANNEM WENDLERVM

M D C C L V I I.



АЛГІМІ
АБІЯОГІМІ

ПІСТУА
ІСІЧАСІНІСІ





Dicitur

Diciturissolui enim tandem nomen, quod, promittendis rhetoricae artis initiiis, ante multos annos contraxeram: sed ita, ut quemadmodum non optimi debitores solent, necessario magis, quam libenter dissoluerim. Nam, ut ingenue fatetur, iam per longius interuallum illud, quod inter primam Initiorum meorum editionem secundamque intercesserat, ita alienior in dies factus eram a consilio, cuius professione mihi necessitatem quandam elementa oratoria scribendi imposueram, ut magnopere cuperem, aliquam mihi idoneam causam dari, per quam, in secunda illa editione, possem, non eruditos quidem homines, quorum res in elementis disciplinarum non agitur, sed redemptorem libri differre. Itaque magno tum onere me leuatum existimabam, cum acerbissima dulcissimae conjugis mors eam mihi maxime probabilem attulisset: idque vnum, in illo, omnibus de causis maximo iustissimoque luctu, commodum mihi capere videbar. Neque vero

A 2

me

me tam auocabat a scribendo taedium, quod
in ista elementorum tenuitate, et, prope di-
cam, ieunitate, mihi deuorandum esset,
praesertim dulcedini, quae ex graecorum la-
tinorumque scriptorum vberrima elegan-
tissimaque doctrina percipitur, adsueto,
quam, quod vfu diuturniori, multis variis-
que ingeniis assidue tractandis, cognoueram,
quam parum, praeceptis dicendi tradendis,
ad eloquentiam proficeretur, quanto plus,
aut quam paene omnia essent in ingenii bo-
nitate, interpretatione veterum, vel lectio-
ne, bene instituta, exercitatione denique,
quae solertia et iudicio boni praeceptoris re-
geretur. Atque nominare possum doctissi-
mos homines, celeberrimosque viros, qui-
bus, de promisso me, velut tardum nomen,
appellantibus, caussam meam abunde pro-
baui. Sed cum, diuenditis secundae Initio-
rum editionis exemplis, tertiam pararet
conductor, identidem appellando, monen-
do, atque etiam suo quodam iure postulan-
do, perpulit, vt de fide exfoluenda cogita-
rem, et, dum edita ante repeterentur, hanc
nouam et vltimam Initiorum partem confi-
cerem: quae fortasse etiam magnitudinis
vitio laborat.

Descripsi totam dicendi artem in partes
duas, inuentionem et elocutionem. Nam
dispositio est profecto et ipsa genus quod-
dam inuentionis, et pronunciatio atque
actio ita cum elocutione coniuncta, vt ab
ea

ea non optime diuellantur. Ego vero pronunciationis et actionis ne praecepta quidem posui. Nam, vt nunc est, oratoribus actione nulla opus, nec in istis paucis et sedatis gestibus, quos hodie orationes desiderent, illa est, quae veteribus dicitur, actio, a qua Graecis orationes, in quibus ea locum habeat, $\alpha\gamma\omega\nu\epsilon\varsigma$ dicuntur. Pronunciatio autem paucis magistris admonitionibus, si vox a natura bona sit, facile conformabitur.

In prima parte, quo loco de argumentis inueniendis agitur, retinui veterem rationem, quae argumenta reperire docet secundum genera caussarum: non, quo non et ipse, post tot alios, possem, alia via vti: sed quia nihil adhuc melius ista ratione vi- di, in primisque, quoniam ad intelligendos facilius cum Rethores, tum Oratores veteres, vtilis ac prope necessaria videbatur: cuius rei maxime caufsa etiam tertium gen- nus, iudiciale, seruauimus, quo alias Rethorica hodie putatur carere posse. Sed ma- xime locos magnitudinis diligenter volui explicare, quod eorum maxima est in exornando, amplificando, omninoque in elo- quentia, vtilitas. Atque idem in locis de argumentationibus, earumque exornatio- ne et amplificatione, voluimus efficere; quod cognoueramus, hodie vulgo, et qui dicent, et qui de dicendi arte praecipe- rent, in hac parte esse valde siccios et te- nues. Nempe plerique satis habent, si ar-

A 3 gumen-

gumenta ipsa teneant, quae dicunt e disciplinis, maxime e philosophia, disci: de modo argumentorum tractandorum, argumentando, exornando, augendoque, vix cogitant, nisi quod non nulla iejune de similitudinibus, exemplis et testimoniiis, quae illustrantia argumenta vocant, praecipere solent. Itaque tanta celeritate plurima in dicendo argumenta effunduntur, vt nullo modo haerere in animis, aut vim suam exferere possint. Popularitatem etiam orationem ut a subtilitate disciplinarum distingueremus, laborauimus, neque solum in rebus, sed etiam in verbis: in quo genere valde hodie peccatur, praesertim ab oratoribus vernaculis.

Omnino mihi videntur multi, in philosophiae ad eloquentiam comparandam necessitate et vsu, non parum a veritate aberrare. Quod si ita est, vt nonnulli, studii sui, vt opinor, commendandi caufsa dicunt, eloquentiam nasci a philosophia: haud dubie id totum pertinebit ad inuentiōnem rerum. Enim vero illud, iam suis locis diximus, non admodum verum esse, quod quidam, etiam non magni alias philosophiae admiratores, dicant, locum de affectionibus et moribus totum, quantus quantus sit, e philosophia esse repetendum: in eoque magnum adstipulatorem habemus Antonium apud Ciceronem de Orat. I, 51. Relinquitur ergo unus locus de argumentis vel

vel inueniendis , vel tractandis. In quo
ipfa praceptorum rhetoricorum ratio de-
clarat, quam multa sint, in quibus nihil
auxiliū a philosophia sit expectandum. Sed
principatus huius partis, atque vniuersae
adeo eloquentiae, haud dubie est in copio-
sa ornataque argumentorum tractatione. In
ea autem quid est, quod nos iuuare magnō-
pere possit philosophia ea, quae hodie in
scholis traditur? An sententias forte acutas,
nouas, splendidas, suppeditabit? non mul-
tas, opinor. Alios fontes indicauimus in
libro ipso. An exempla , similitudines,
acute dicta magnorum virorum? multo mi-
nus. Quid igitur? Nihil, vt opinor, nisi
puncta argumentorum, quae ex vniuersa
rerum diuinarum humanarumque natura
petuntur. Quae vtut saepe fint nota etiam
iis, qui disciplinam philosophorum non co-
gnouerunt, ac non minus bene e sacris li-
bris, atque adeo melius, discuntur, quam
e philosophia: tamen concedam, a philo-
sophia suppeditari. Sed haec argumenta
perexiguam partem oratoriae materiae con-
stituunt, neque magis eloquentiam confi-
ciunt, quam ossa corpus humanum viuum,
valens, vegetum, pulchrum. Nam quod
Dialectica indigere oratorem dicunt, ad
iudicandum, in delectu argumentorum, in
definiendo, in partiendo, id facile conce-
serim: sed habet tamen et ea ratio suum
modum, vt ex iis patere arbitror, quae de

A 4

argu-

argumentationibus et refutatione dixi, quibus addet, qui volet, quae contra illam sententiam idem, quem ante dixi, Antonius, disputat apud Ciceronem de Orat. II, 38.

Ac ne mihi, in hac disputatione, Ciceronis opponatur auctoritas, qui philosophiae in eloquentia usum magnopere predicat, in primis in Oratoris principio, sequi magis e Philosophorum, quam Rhetorum, scholis oratorem produisse: primum, Rhetorum praecepsis quam vim ad comparandam eloquentiam tribuam, mox dicetur: deinde longe aliter illud totum de philosophia accipendum, quam homines veteris philosophiae imperiti, et in compendiis alicuius angustias compacti et conclusi, existimant. Nam primum, ista cum dicit Cicero, non dictata Philosophorum intelligit, h. e. compendia disciplinae, quae tironibus explicantur, et ediscenda proponuntur: ultra quae quotus quisque hodie sapit? Etenim de iis ita omnibus locis loquitur, ut nihil habuisse videatur contemptius. Neque vero de omni genere philosophiae intelligit, non de Epicurea, non de Stoica: quae genera erant fere tenuia, et sicca rebus, et minus elegantia verbis: sed de Academica, a Platone orta, fortasse etiam Peripatetica, sed maxime illa. Non se e porticu Zenonis, aut Lyceo Aristotelis, aut hortis Epicuri, sed ex Academiae spatiis maxime oratorem exiisse dicit. *Illa enim sunt*

sunt curricula, inquit, multiplicium variorumque sermonum, in Orat. c. 3. Nempe Academicæ philosophiae erat, de omnibus rebus in utramque partem disputare: quod ad forensem eloquentiam sane volebat plurimum: neque id anguste et tenuiter, sed eleganter, copiose, et ornate, ut e Platoni, Xenophontis, Ciceronisque dialogis intelligitur. Atque etiam ex aliis scholis erant interdum, qui istam copiam persequerentur. Nam orationis quidem copia videamus, ut abundant Philosophi, qui, ut opinor, nulla dant pracepta dicendi, nec idcirco minus, quaecunque res praeposita est, suscipiunt, de qua copiose et abundanter loquantur, ut Antonius apud Ciceronem dicit Or. II, 35. extr. Cicero quidem in libro de Officiis secundo, c. 5. redundantiam in Panaetio Stoico notat, ubi, cum et ipse satis copiose declarasset hoc, homini ab homine plurimum utilitatis venire, ita concludit: *Longiores hoc loco sumus, quam necesse est. Quis est enim, cui non perspicua sint illa, quae pluribus verbis a Panaetio commemorantur: neminem neque belli ducem, nec principem domi, magnas res et salutares sine hominum studiis gerere potuisse.* Commemoratur ab eo Themistocles, Cyrus, Agesilaus, Alexander, quos negat, sine adiumentis hominum, tantas res efficere potuisse etc. Quare, si quis lectione Philosophorum a Socrate profectorum, Platonis, Xenophontis, Aristotelis in ethicis

A 5

ac

ac politicis, Ciceronisque, plurimum profici ad eloquentiam dicat, me habeat valde consentientem, ad eosque in ipso libro passim studiosos eloquentiae amandauimus: fin idem philosophiae nostrae aetatis tribuat, quae fere est tenuis rebus, et barbara atque inficeta verbis, nullo modo assentiar. Atque haec non eo disputantur, vt philosophiam aut ipsi contemnamus, quod non est credibile in eo, qui ipse philosophiae elementa scripsit, aut non vtilitate vberrimam putemus, omnibusque ferio commendemus, sed vt eius vim et usum ne iusto latius extendi patiamur.

Sed vt ad instituti nostri rationem explicandam redeamus, in parte ea, quae est de Inuentione, posuimus locum de sententiis, qui vulgo inter figuratas explicari solet. Et enim sententiae in rebus sunt, non in verbis. Omnino rerum, quae ab oratore tractantur, duo genera sunt: alterum necessariarum, quae insunt in argumentis maxime: alterum aduentitiarum, quae pertinent ad copiam et ornatum. In his ergo sunt sententiae, exempla, similia, testimonia, proverbia: quae propterea a nobis omnia ad partem primam sunt relata. In quo nos aequos habituros esse peritos speramus: neque minus in illo, quod in altera parte e figurarum numero exemimus, quaecunque ad copiam potius, quam ad ornatum, pertinent, vt periphrasis, definitionem, exer-

exergasian, μεγιστον, congeriem etc. Neque fortasse in his, si accurate velimus iudicare, figura est: quae non est, nisi vbi oratio cum virtute aliqua recedit ab usitata forma, et inflectitur. Totum autem locum de figuris sic descripsimus, ut in figuris suavitatis et grauitatis distribueremus. Id nobis in sequentibus capitibus ad breuitatem commodius fuit, et tironibus ad iudicandum aptius fore speramus.

Fuerunt fortasse, qui a nobis philosophiam potius super Rhetorum praeceptis, et demonstrationes e philosophia ductas, expectarent, in quo genere non unus iam operam oleumque perdidit. Ego vero tironibus utilius putau, quae aut veteres obseruassent, aut egomet ipse, utilia addendum, ea breuiter et perspicue tradere. Ceterum, qui volent super singulis quibusdam praeceptis philosophari, eorumque caussas e natura rerum humanarum explicare proiectioribus, hi sibi subinde occasionem idoneam datam reperient.

Atque etiam vereor, ne sint, qui nos Initiorum, quae tironibus conueniant, modum excessisse dicant, praesertim in locis de argumentis, argumentationibus, et argumentorum reprehensione; quae etiam excedere captum eius aetatis videantur. Neque dissimulem, maius esse factum opusculum, quam destinatum ab initio fuisset: sed videbam, eam rem hoc habere comodi,

modi, ut etiam Academicis lectionibus seruire posset. Itaque nolui refecare, quae non satis conuenirent iis, qui primum ad hanc artem cognoscendam venirent. Illud quoque animaduerteram, plerosque hodie facere in hac parte, quod olim in Rhetoribus reprehendebat Quintilianus V, 8. ut probationes, quae in arte sint, constantque rebus ad faciendam fidem idoneis, aut omnino negligant, aut leuissime attingant, siue, quod argumenta, velut horrida et confragosa, vitare, amoenioribusque locis desidere malint, siue, quod ea e philosophia, vel afferenda, vel petenda dicant. Quare putabam, me non male consultorum studiosis eloquentiae, si in hac parte diligentior essem, praesertim cum usu dicenssem, iuuenibus hic maxime haerere aquam solere, et saepe, in rebus satis obuiis, non occurrere, quae apte dicant: quod fit, ut opinor, nulla alia de causa, quam quod non dum exercitatione aliqua in inueniendo usi sunt, quae idoneis praecceptis regeretur. Ceterum, ut quisque discipulos habebit, ita, de pracepto Quintiani VIII. *praef.* deliget, quae tradat.

Sed nihil magis arbitror fidem Rhetoris postulare, quam, ut hoc in tempore doceat discipulos, totum hoc praecipiendi genus quo comparatum sit, quid profit, et quoad: *Minimum esse, de arte loqui, vt Cicero vere dixit, Inu. I, 6. multo maximum ex arte*

arte dicere: Rheticam nihil habere, nisi obseruationem quandam earum rerum, quae in dicendo valeant, quae si eloquentes facere posset, quis esset non eloquens, vt idem ait, de Orat. II, 57. Etenim, vt vsu didici, adolescentes, quoad de praceptoris agitur, et audiendo res transfigi potest, alacres sunt cupidique eloquentiae: vbi res ab auribus ad manum, hoc est, ad commentandi laborem, venerit, tum mihi fiunt tardi et segnes: siue, quod plerique omnes fugiunt contentionis et laboris molestiam: siue, quod hanc imbiberunt opinionem, vt fatis ad bene dicendum putent esse, si praecpta dicendi norint: quod est a vero alienissimum. Tria v. c. sunt, quibus, in singulis caussis ac rebus, ad dicendum propositis, ad inueniendum opus est: ingenio primum, quod valet, vt in omnibus rebus, plurimum: deinde diligentia, quae se penitus insinuet in caussam, eiusque omnes partes perspiciat, omnes argumentorum locos in promtu habeat, in eosque sit intenta maxime. Inter haec duo per paululum loci, iudice apud Ciceronem Antonio, reliquum est arti, quae nihil nisi demonstrat, vbi quaeras, atque ubi sit illud, quod cupias inuenire. Age porro, in promtu sit, excussis locis artis omnibus, quod dicendum sit, paratus sit argumentis ornandis apparatus: restat, vt delectum habeamus, vt, quantum, et quoad ubique dicen-

dicendum sit, videamus: quod nullis praceptoribus doceri potest. Atque similiter de elocutione possum demonstrare, praceptoribus pauca, exercitatione bene instituta omnia constare.

Itaque omnes, qui se eloquentiae magistrorum profiteantur, velim in praceptoribus breues et parcus esse, ad exercitationem illam omnia referre. Ea est duplex: altera est in analysi, altera in compositione et veluti genesis, quae sine illa bene procedere nullo modo potest. Primum igitur studiosis eloquentiae interpretabuntur meliores oratores, historicos, poetas, etiam philosophos Socraticos, veluti Xenophontios libellos, et Platonis dialogos quosdam, sed ita, ut breuiter, et sine lectionis ostentatione, verborum sensu explicato, rebusque ipsis ex historia, aut vnde cunque, illustratis, ingenium et artificium scriptoris cuiusque aperiant, ostendantque, quid de quaerere, qua causa et consilio, quomodo denique dictum fit, a quo fonte quaeque ducta sint, quid in argumento quoque, aut narratione necessarium, quid aduentitium, et ab ingenio oratoris historicue, ornandi causa, accesserit, quae in sententiis vel subtilitas, vel pulchritudo, vel sublimitas sit, ex quibus notis deprehendatur, et unde sit, in verbis denique quid eleganter, venuste, copiose, ornateque expressum. Comparabunt etiam interdum locum, in quo

quo versabuntur, cū simili, neque folium in toto argumento, aut loco communī, aut ep̄istola, sed etiam in singulis sententiis, et varietatem commutationemque, cum cauſis, demonstrabunt. Proponent denique loca insignia, ex unoquoque dicendi genere, ad ediscendum, vt quasi viuus quidam typus et forma artificii oratorii imprimatur animis, quae iis obuerſetur inscribendo, vt ad eam dirigere cogitationem et orationem possint. Hac exercitatione vbi aliquantum ad intelligendum profecerint, quod tentando facile potest intellegi, tum vero paullatim accedent ad eam, quam genesin dixi, sed ab initio ita, vt discipulis velut obstetriciam operam nauent. Quod facient, si, proposita aliqua re, viribus apta, primum per regiones, intra quas veluti venentur, et circa fontes oratoriae copiae, quasi manu circumducant, inde petere, quod opus fit, iubeant, alia deinde probent, alia improbent, redditis iudicij cauſis: deinde de ordine cum iis velut in consilium eant, et, quid priori, quid posteriori loco dicendum, communiter cum ipsis constituant: denique comparatis copiolis et digestis, ipsis coram, audientibus et calamo excipientibus discipulis, commententur, ita, vt ostendant, quare quidque ponant, sic eloquantur, quare figura quaque vtantur, quare modo tenuiter dicant, modo copiose et ornate, vbi commuta-

mutatione, dilatatione opus, ubi caussae
fententiaeue adiunctione etc. Hac ratione
qui vtentur in eloquentiae disciplina haud
dubie plurimum proficient, nisi in homi-
nes plane hebetes inciderint. Qui nihil
aliud agent, nisi, vt praecepta dicendi per
interualla explicit, in enarrandis oratori-
bus, aliisque scriptoribus, sensum vtcun-
que declarant, phrases obseruent, historias
et ritus antiquos illustrent, et figurarum
nomina decantent, deinde vero statim suo
Marte scribere iubeant, hi vero frustra se
in speciminibus discipulorum emendandis
cruciabunt, magisque se obmutescendi,
quam dicendi, magistros probabunt.

Ceterum, et si nihil utilitatis a praecepsis
dicendi sperari potest, nisi vt viam quan-
dam et iudicandi et inueniendi ostendant:
tamen vel sic bene positam operam putabi-
mus, quam in conscribendis his inititis
sumsimus, si hunc quam plurimi fructum
ex iis ceperint. Scr. Lipsiae m. Septemb.
a. C. clc lcc L.



PRO-



PROLEGOMENA DE RHETORICA VNIVERSA.

§. I.



*R*hetorica est ars, docens eloquentiae comparanda rationem: differtque a *Dialectica*, quae et ipsa rei cuiusque explicandae rationem tradit: quod haec de rebus subtilibus docet differere subtiliter ac tenuiter, vnam veritatem et perspicuitatem amplexa, illa autem fere de rebus populari intelligentiae subiectis, et non modo ad intelligendum, sed etiam ad deletandum, commouendumque accommodate.

2. *Eloquentia* est facultas, perspicue, copiose, ornataque dicendi: eique subiectae sunt veluti materia, quam tractet, laboretque, res omnes, quae perspicuitatem capiunt accommodatam intelligentiae communi, ornatumque ad motum animi delectationemque idoneum: cuiusmodi
Ernesti Initia B sunt

funt res morales omnes, historicae, omninoque in communi vſu vitae humanae versantes.

3. Quaecunque autem posita sunt in facultate oratoria, e duobus fontibus ducuntur, et a *rebus*, et a *verbis*. Nam primum perspicuitatem nulla verba efficere possunt in rebus, aut non intelligendis satis, aut non intellectis: et res quamvis perspicuas obscurat verborum inficitia. Copia porro cernitur, primum, in argumentorum, exemplorum, testimoniorumque frequentia, loco et ratione usurpata, deinde, in verborum, dicendique formarum et variatione, et frequentatione; quarum illa in rebus, haec in verbis tota inest. Neque ornatus alias cauſas habet. Et enim partim in sententiarum acutarum copia inest, quibus oratio distinguitur, partim in tropis, figuris et numero: quae verborum esse omnes vident.

4. Vnde fit, vt Rhetoris due maxime partes sint: quarum altera est, vt doceat res *inuenire*, inuentisque recte uti: altera, res bene excoxitatas bene *eloqui*.

5. Prima igitur Rhetoricae pars est *inuentio*, quae tota ab ingenio, literis, lectione et vſu rerum subacto et nutritio, ducitur. Ei subiecta est *dispositio*, quae inuentorum delectum et ordinem tradit, estque iudicij et prudentiae. Altera est *eloquio*, quae obſeruatione, iudicio, etiam ingenio continetur. In hac inest ea, quam nonnulli et ipsam artis partem faciunt, *pronunciatio*, et, si res postulet, *actio*. *Memoria* autem, quam et ipsam

ipsum Rhetorices partem veteres fecere, siue propriam, siue subiectam et adiunctam actioni, ducta ab artificio, per Simonidem reperto, cum nostra eloquentia non magnopere est coniuncta: unde iure hodie e praceptis dicendi est sublata.

PARTIS PRIMAE
DE
INVENTIONE
SECTIO PRIMA.

C A P. I.

De Inuentione uniuersa.

6.

Inuentio est facultas videndi in vnaquaque re, quid in ea sit ad persuadendum idoneum. *Per-*
suadendi autem vim non capiunt hi, qui, consuetudine loquendi vernacula decepti, totam ad probabilitatem referunt. Latina quidem consuetudo in hoc verbo latius patet. Nam et ea persuaderi dicuntur, in quibus nulla dubitandi caussa relinquitur, efficiturque *ἀσφάλεια*, et assencionis firmitas, quae a perfecta demonstratione, pro rei cuiusque natura, ducitur. *Conuictio*, quam effici imperiti volunt, male factorum est, saltem errorum: neque vir bonus et prudens conuinci gaudeat. Ceterum, quia orator saepe tractat

B 2

res

res opinabiles, sane in iis nec ultra probabilitatem assurgere potest.

7. Primum autem inuentionis munus recentiores artis magistri posuerunt in quaerenda vniuersa materia; vnde nata sunt de inuentione thematis, quod vocant, praexcepta, non superuacua modo, e vetere disciplina, sed etiam verae eloquentiae noxia. Nam hinc recentiorum oratorum consuetudo fluxit, re ipsa, de qua dicendum erat, neglecta, dicendi, quae nemo neque velit audire illo tempore, neque sibi audienda putet: hinc mos nomina personarum, dierum, atque locorum torquendi: hinc vanitas doctrinae ostendandae, atque aliae similes ineptiae.

8. Vera eloquentia non indiget alia ad dicendum re, praeter eam, cuius causa dicitur. Est que haec ipsa ingenii atque inuentionis vis, in unaquaque re, quae dicendi occasionem praebeat, videre aliquid, quo prodesse et delectare audientes possis, quodque ita sit cum re illa coniunctum, ut vnicuique in mentem venire debuisse videatur. In quo et si dominatur felicitas ingenii, tamen etiam praexcepta vel adiuuare ac dirigere ingenii celeritatem et libertatem, vel excitare tarditatem, et instruere inopiam possunt. Ea quae sint, alio loco traditur.

9. In omni inuentione oratoria duo insunt: primum *materia*, sive res, quae inueniuntur, ipsae, alterum *traditio materiae* repertae, et elaboratio. Inanis enim est, inuentionis apparatus, ut ait apud Ciceronem Crassus, nisi recte tractare possis. *Materia* inest in omni argumentoru[m],
exem-

exemplorum, testimoniorum, aliorumque similium copia, quae e certis ac definitis locis ducitur: tractatio autem in conclusionum et argumentationum modis, exornatione et amplificatione.

10. Itaque primum dicemus, de omnibus apparatus oratorii generibus, iisque congerendis ac comparandis, deinde, quomodo argumentando, exornando et amplificando tractetur, ad persuasionemque conferatur, docebimus.

C A P. II.

De Materia inuentionis uniuersa.

I I.

Materia, quam inuentio oratoria amplectitur, triplex est, inestque in *λόγοις ηθεσι*, et *παθέσι*. *Λόγοι* valent ad docendum, *ηθη* ad placendum, *παθη* ad commouendum. Iste sunt necessitatis, illa delectationis, haec victoriae.

12. Latissime patent *λόγοι*, quibus proposita est veritatis intelligentia: iisque insunt in rationibus, ad intelligendum verum idoneis. Diuiduntur autem in duo omnino genera, quorum alterum est commune, quod vagatur per omnia rerum et caussarum oratione tractandarum genera: alterum certis rebus et caussis proprium.

13. *Proprii* loci tripliciter distribuuntur e numero caussarum diuersarum.

B 3

14. Sunt

14. Sunt enim *tria genera cauſarum*: pri-
mum *demonstrativum*: alterum *deliberativum*, ter-
tium *iudiciale*. *Demonstrativum* versatur in lau-
dando, vel reprehendendo: *deliberativum* in sua-
dendo vel dissuadendo: *iudiciale* in accusando,
vel defendendo.

15. Neque vero existimandum est, hanc dis-
tributionem cauſarum, ab antiquis Rhetoribus in-
ductam, inutilem factam esse hodie, commutato,
qui tum fuit, rerum statu, ut non nullis placet.
Nam, cum nullum sit genus materiae, in quo
orator versari possit, quod non vel honestatem
laudet, vel reprehendat turpitudinem, suadeat
vtilia, vel dissuadeat noxia, denique vel accuset
iniustitiam, vel defendat innocentiam, iustitiam-
que: non potest intelligi, quare vetus disciplina
mutetur, praesertim cum, ea conseruanda, veterum
Rhetorum intelligentia adiuvetur. Atque etiam,
si in vna et item altera ciuitate sublata est consue-
tudo, vel de republica in consilio publico, vel de
iure in iudicio dicendi: tamen non nullis locis ea
adhuc viget. Non est autem consentaneum, ar-
tem ac disciplinam vni et item alteri ciuitati, et
certo tempori accommodari.

16. Vnumquodque autem genus cauſarum pro-
prios quosdam habet locos, e quibus λόγοι, quos di-
ximus, ducantur. Ac primi quidem generis loci sunt
honestas et turpitudo; alterius, vtilitas et damnum;
tertii, iustitia et iniustitia: e quibus quae argumen-
ta, et quo modo petantur, separatim demonstrabitur.

17. Sed loci isti non ita proprii sunt cauſarum
generi cuique, ut non et ad alia genera possint
trans-

transferri. Nam in suadendo et dissuadendo etiam honestatem et turpitudinem, iustitiam et iniustitiam adsumimus, si res ita fert, et in laudando vituperandoque utilitatem et damnum, in accusando vero et defendendo etiam ceteram honestatem et turpitudinem, utilitatem item et damnum. Ceterum in quoque genere ii, quos proprios diximus, loci dominantur, propriamque ac necessariam sedem habent.

18. Atque etiam sunt loci quidam omnibus generibus *communes*, de magno et parvo, de possibili et impossibili. Nam cum laudamus, magnitudo rerum laudabilium demonstranda est, cum suademus, magnitudo utilitatis etc. Comparatio etiam saepe facienda est, ut, quod maius, minusue sit, appareat. Tum quae laudamus, ea facta esse, saepe demonstrandum est, quae suademus, possibilia, futura, quae accusamus, perpetrata.

19. *Morum* tria sunt genera. Nam et *oratoris* mores quidam sunt probabiles, qui ex oratione debent elucere; et *auditorum* alii, ad quos oratio debet esse accommodata: et *personarum* denique dicendo tractandarum alii, qui oratione debent exprimi. Omnibus generibus adiuuatur persuasio, qui est orationis finis. Priora duo genera aditum orationi faciunt ad audientium animos: tertium vero etiam credibilem facit orationem et iucundam.

20. *Motuum* animi duas partes sunt, earumque altera et ipsa in non nullis duplex. Primae parti subsunt personae, alteri caussae. Persona est inter-

dum duplex, altera eius, qui mouetur, altera, in quem mouetur. Causae autem insunt in rebus, propter quas animi in utramque partem commoueri solent.

C A P. III.

De Loco Magnitudinis.

21.

Primus locus omni generi caussarum communis est magnitudinis, qui maxime in dicendo dominatur. Nam vis maxima orationis cernitur in augendo, auctore Quintiliano VIII. 3. *Augendi* autem vis non est in eo, vt rem maiorem dicendo efficiamus, quam veritas patiatur: impediretur enim fides, et persuasio, quae adiuuari debet: sed in magnitudine ita explicanda et illustranda, vt planissime intelligi sentirique possit.

22. Magnitudinis autem demonstrandae plures sunt loci. *Primus est caussarum.* Nam, vt quaeque res maiores vires vel ingenii, vel animi, vel fortunae desiderat, quoque plus artis, studii, curae, industriae, laborisque in efficiendo habet, denique, quo maioribus ac pluribus cum difficultatibus, et impedimentis, vel internis, vel externis in efficiendo conflictandum est, eo maius quod efficitur, haberis solet.

23. Atque etiam ipsarum caussarum est quoddam discrimen, vel adiuuans magnitudinem, vel minuens. Nam maiores causae sunt eae, quae ab ingenio animoque ducuntur, quam, quae in corpore

pore insunt, aut fortuna, maioresque difficultates putantur, quae ab animo atque a natura obiciuntur, quam quae a rebus externis. Est enim difficilior certamen cum animo atque natura, quam cum fortuna.

24. Adiuuat etiam magnitudinis intelligentiam caussarum, quibus quem in agendo usum esse vel constat, vel probabile est, honestas, vel turpitudo. Maius v. c. beneficium putatur, quod quis amore, aut officio, aut tali aliqua causa datus, quam quod temere ac leuiter, iranis laudis, aut utilitatis suae spe, tribuit.

25. Alter locus ducitur ab *effectis*, maxime ille accommodatus intelligentiae communis. Vulgo enim omnes magnitudinem rerum et actionum metiuntur effectorum magnitudine. In quibus spectari solent *genera, vis et numerus*.

26. *Genera* differunt, ut ipsa bona et mala, quae vel animi sunt, vel corporis, vel fortunae: item vel priuata, vel communia et publica. Itaque effectorum eadem comparatio est, quae bonorum et malorum, tantoque maius quodque putatur, quanto maius in suo genere vel bonum vel malum habet. Maiores itaque putantur res eae, a quibus animi, quam corporis, item corporis, quam fortunae, a quibus denique publica, quam a quibus priuata bona vel mala veniunt.

27. *Vis* deinde effectorum aestimatur e *duracione et celeritate*. Nam ut quaeque res celerius aliquid affert aut bonum, aut malum, eo maior habetur. Veluti maior Pompeii virtus in bello piratico putatur, quod quadraginta diebus conficit,

cit, quam in alio, item Marii in Cimbrico, quam in Iugurthino. Tum quae res in longius tempus profundunt, maiores videntur iis, quae in breuius. Tanquam maior censetur benignitas, quae consiliis et opera fortunas hominis constituit, quam quae largitur, quod breui absuntur: maior Solonis et Lycurgi legislatio, quam Themistoclis ad Salamina, aut Lysandri ad fluumen Aegos, victoria.

28. *Numero* denique effectorum cernitur rei magnitudo. Nam in pluribus generibus prodesse maius est, quam in uno: et in eodem genere, quo plura res affert bona, eo maior existimatur: similisque est nocentium rerum aestimatio.

29. *Tertius* locus complectitur ipsam *rei naturam*: in quo plus inest, quam in ceteris, subtilitatis: unde plerumque minus sensus hominum mouet hoc magnitudinis genus, difficilior emque tractationem habet. Est scilicet cuiusque rei se- iuncta quadam a caussis et effectis magnitudo, siue *sensibilis* illa, ut in rebus corporeis, siue *intelligibilis*. Intellexus autem magnitudinis posterioris venit siue ab *insta* quadam rei *specie*, quae natura mouet animuin hominis in utramque partem, id quod usus in quaue re declarat; siue ab opinione quadam hominum, qua, ut numis aliisque rebus certum pretiuin, ita magnitudo vel attribuitur, vel demitur.

30. Est etiam quartus magnitudinis locus, qui ex personarum, temporum et locorum discrimine pen- det, maxime foecundus ille, praesertim in laude et reprehensione factorum, in agendis gratiis, in gratulando, et similibus, in primisque popularis.

Pri-

Primum igitur, quod illa Terentiana meretrix de dono praedicat, *gratum est, non tam per se, quam quod abs te datum est*, id dictum de uno genere rerum, patet latius: estque tam multiplex ea ratio, ut vix praceptis comprehendendi satis possit. Magnitudo enim augetur in utramque partem, personarum vel dignitate, necessitudine, meritis, vel rebus contrariis. In temporibus ac locis porro magnam saepe vim ad augendum habet necessitas, opportunitas, et delectus.

31. *Quintus locus habet modum rei, in actionibus in primis aestimandis plurimum adiumentum adferens.* Refertur autem maxime ad locum caussarum. Nam modus rei gestae propterea ad rem ipsam augendam valet, quod in eo exprimitur ratio caussarum, a quibus actio nata est. Hoc loco v. c. usus est Cicero in Agrar. II. honoris a populo accepti, augendi caussa: c. 2. *Neque me solum Consulem fecistis -- sed ita fecistis -- etc.* aliisque locis permultis.

32. *Modus autem rei praeter tempus et locum, de quo antea separatum dictum est, continetur tot, tamque variis rebus, ut eas uniuersa et breui praceptione comprehendere non liceat.* Ceterum in unaquaque re facile, si quis animum aduertat, reperientur. Sic beneficii tribuendi modus continetur fere celeritate tribuendi, hilaritate vultus, comitate ac liberalitate orationis, aliisque similibus.

33. *Est etiam intelligendae magnitudinis locus, qui comparisonis dicitur.* Sed nobis magis placet

placet comparationem in modis tractandae magnitudinis ponere: praesertim, cum ea omnibus, quos posuimus, locis sit communis.

34. Vbi ergo materia magnitudinis demonstrandae in promptu est, argumentando tractari, elaborarique debet. Atque argumentationes aliae sunt communes, aliae propriae. Communes sunt, quae in omni genere demonstrationis locum habent, de quibus suo loco separati agemus: propriae, quae maxime sunt intelligendae magnitudini accommodatae.

35. Nulla autem efficacior et luculentior ratio magnitudinis explanandae est, quam *comparatio*. Id ipsa magnitudinis natura declarat. Et enim magnitudo est ex eo genere rerum, ut philosophi tradunt, atque tota matthesis docet, quod non tam ex se intelligitur, quam comparatione. Unde fit, ut etiam huic oratoriae magnitudini intelligendae aptissima videri deceat comparatio.

36. In hac ratione spectari debent duo: primum, *quocum comparetur*, cuius magnitudinem demonstrare velis: deinde *modus comparandi*. Res igitur, quacum comparetur, quod in manibus habemus, debebit esse notae et conspicuae magnitudinis: eaque ipsa magnitudo, et si per se nota est, tamen declaranda erit sententiis et verbis ad eam intelligendam idoneis. Quo facto ei res, de cuius magnitudine quaeritur, comparabitur sic, ut ei vel par pronuncietur, vel anteponatur, subiectis rationibus, quae locis supra propositis ducantur. Hoc posterior modo, qui est optimus, vtitur Cicero in Oratione pro

Bisagri

Mar-

Marcello, laudans Caesarem ob veniam Marcello dataam. Nam comparat hoc factum cum eius rebus bellicis, ita, ut primo has mirifice extollat: c. 2. init. *Nullius est tantum ingenii flumen etc.* deinde his factum illud anteponat, additis quatuor caussis, quae et ipsae comparatione continentur, ductaeque sunt omnes e locis ante constitutis. Eadem ratione saepius ipse, Isocrates, aliquique vtuntur.

37. Est vero etiam aliud comparationis genus, cum res confertur cum eo, quod ei contrarium est, virtus aliqua cum vitio, quod ei opponitur, aut vitium cum virtute contraria, utilitas cum damno, aut contra: item cum personas inter se contendimus, ut alterius foeditas ex alterius honestate intelligatur, et contra. Sic Cicero Verrem comparat cum Marcello, ut auaritia illius detestabilior fiat huius liberalitate.

38. Magnam porro vim habet argumentatio a minori ad maius, et a maiori ad minus, quae et ipsa est comparationis genus. Eaque locum habet in primis tum, cum magnitudinis demonstratio e locis personarum, temporum, effectorumque ducitur.

39. Ad rerum denique intelligibilium magnitudinem intelligenda plurimum valebit, si eas quodam modo ad sensum reuocabimus. Quod ipsum fit comparatione cum re sensibili, quae sit perspicuae magnitudinis. Hoc modo Saurinus tractat aliquo loco aeternitatis notionem.

CAP.

CAP. IV.

De possibili et impossibili.

40.

AIter locus communis omnibus caussarum, sed in prius deliberatio et iudicali, generibus est, qui a possibili et impossibili repetitur: non metaphysico, cuius subtilitas longe ab oratoris popularitate, sed crassiori illo, quod oratione tractari, et ad sensum intelligentiamque communem accommodari potest.

41. Omnis igitur de possibili quaestio huc credit, ut quaeramus, vtrum id, de quo disputatur, sit eiusmodi, ut possit, vel potuerit fieri, nec ne. Idque dupliciter. Nam vel per se dubitari potest, an res fieri possit, vel an tali tempore ac loco, et a talibus personis. In illo proprie quaeritur, possibile sit aliquid, nec ne, in hoc factum aliquid sit, futurumue, nec ne. Sed illud prius genus huic posteriori ineſt, non posterius priori. Itaque de unoquoque separatim agendum.

42. *Per se possilia* putantur, primum ea, quorum causae intelligi possunt, aut effectus: cohaerent enim natura, neque alterum esse sine altero potest: omninoque in iis, quae natura coniuncta sunt, aut intellectu, ut genus, species, totum, pars, omnibusque relationum partibus, alterum possibile indicatur, si possibile est alterum: deinde si similia fieri possunt, aut maiora, aut adeo contraria, et dissimilia: si alio tempore,
ab

ab aliisque effici potuerunt. Neque repudiarim illud genus, quod ab Aristotele positum in rhetoricis, etiam philosophi usurparunt, ut, quorum nobis amor et cupiditas a natura innata sit, ea possibilia videantur: non, opinor, quod nemo facile amet et appetat, quae fieri non possunt, ut ille ait, sed quod talem appetitum inseuisse naturis hominum Deus non videtur. Quid impossibile sit, contrariis fere rationibus intelligitur.

43. *An* aliquid certo tempore ac loco, a certisque personis *factum sit*, cum quaeritur, duo videnda sunt; primum, *an fieri potuerit*; quod quomodo intelligatur, ante dictum est: deinde, *an factum sit*. Quae autem facta dicuntur, ea vel personis attribuuntur, vel rebus.

44. *Fecisse* igitur quem id, de quo quaeritur, ostendimus, si docemus, non modo *potuisse* facere, sed etiam *voluisse*. Illud habet vim animi ad credendum praeparandi: hoc fidem ipsam continet. *Potuisse* autem quem facere quid, intelligimus, cum opportunitatem tempus locusque praeberent, vires, quales factum desideret, suppeterent, nulla res impediret.

45. *Voluisse* quem facere putamus, si potuit, resque fuit eiusmodi, ut ab eo vel propter virtutis, officii, gloriaeque studium, vel propter cupiditatis alicuius intemperantiam appeteretur: quae solent ex vita ante acta demonstrari: si fuit ira, odio, aut aliquo affectu incensus: si utilitatis, in primis magnae, spes, eaque propinquā et magna fuit: si necessitas aliqua pressit: si constet, incitatum fuisse ab iis, quorum vel auctoritati vel

gra-

gratiae cedere consuerat: si ante facere tentauit:
si paria, cum posset, fecit. Non fecisse quem, e
contrariis ostenditur.

46. Sed factum etiam vel arguitur vel refel-
litur *signis*. Nam vnumquodque factum habet na-
tura sua quasdam vel necessarias, vel solennes an-
tecessiones praeparationesque, quendam porro
quasi comitatum rerum quarundam, denique quos-
dam euentus: quae nota debent esse omnia dicen-
ti de facto in utramuis partem. Ea uti vel adesse,
vel abesse, demonstretur, ita vel factum quid, vel
non factum, probabile fiet.

47. Neque solum absentia signorum suorum
refellitur factum, sed etiam, atque adeo magis, praes-
entia contrariorum. Veluti illi Terracinensis
Clodii filii suspicione parricidii sunt liberati, quod
placide dormientes reperti erant. Nam somnus
placidus est animi tranquilli signum, qui esse in
conscientia tanti sceleris non potest.

48. Accidisse porro atque euenisce quid, aut esse,
ex his intelligi solet; si comparent ea, quae anteced-
dunt, et per ac propter quae est aliquid, atque sit, vel
necessario, vel plerumque: ut, si constet, studium in
aliquo doctrinae fuisse, etiam doctum fuisse, credi-
bile fit: item, si quae consequi solent, aut yna esse,
demonstreturque, aut clarum sit, alterum ex iis esse
aut fuisse: si factum constet, aut esse, quod fieri
solet secundario, factum esse intelligitur, quod esse
solet primo loco: ut si quis exercuit potestate aliquam,
aut ius, patet habuisse, aut accepisse.

49. Cum denique quaeritur, an aliquid *fatu-*
rum sit, quod genus proprium est deliberationibus,
id

id ipsum quoque pertinet aut ad personas, aut res.
In personis quaeritur, an quis sit aliquid facturus.
 Id intelligitur ex iisdem fere rebus, quibus colligimus, aliquem fecisse quid, ex facultate et voluntate; quae maxime iudicatur e moribus, et vitae superioris consuetudine. Nam quod conuenit cuiusque moribus, hoc est, vitiis vel virtutibus, studiis, cupiditatibus, quod alias, saepe, similibus locis ac temporibus, paribus aut minoribus de caussis, aliis, quos minus amaret aut odisset, cum minus cuperet, fecit, id probabile est, quemque facturum.

50. *Res autem futurae* demonstrantur in primis ex antegressis caussis et signis. - Oportet igitur in promptu esse, quibus de caussis quaeque res eveniat, et quae sint rei futurae signa: quae discuntur, vel e natura rerum, tradunturque in moralibus et politicis, vel suo cuiusque usui, vel denique ex historia, usus vicaria. Item, si similia tempora sunt ac loca, eadem futura, colligimus.



C A P. V.

De Loci Generis Demonstratiui.

51.

Genus demonstratiuum diximus in laudando vituperandoque versari. *Laus* autem proprie est virtutis, *vituperatio* viti: efficiturque illa quidem, honestate virtutis, haec autem, turpitudine viti demonstranda. Itaque etiam bona et utilia

Ernesti Initia.

C

non

non laudantur, nisi propter aliquam cum honestate coniunctionem, de qua mox dicetur. Vnde fit, ut finis huius generis sit, virtutis et vitii, honestatis turpitudinisque opinio.

52. Subiecta porro huic generi, tanquam materia, sunt omnia, in quibus insunt ea, quae ad opinionem honestatis turpitudinisque commouendam idonea reperiuntur. Ea sunt vel *res*, vel *personae*.

53. Intelligendum igitur est iis, qui in hoc genere feliciter velint versari, primum vniuerse, quibus ex rebus opinio honestatis turpitudinisque nascatur, quae honesta et turpia vel sint natura, vel putentur, more atque opinione: deinde quomodo ab his, in rebus personisque laudandis, argumenta ducantur.

54. Nam, quoniam honesti propria et una sedes est in virtute, efficitur, ut honestatis opinio nascatur, non modo ab ipsa virtute, de cuius partibus philosophi tradunt, sed etiam, primum ab iis rebus, quae sunt ad virtutem vel efficiendam, vel conseruandam, vel augendam aptae, deinde a virtute ortae, nec sine virtute aliqua intelligi possunt, ut pudor, iniuriarum perpeccio, denique virtutem habent efficientem sui, ut fortiter, iuste, liberaliterque facta. Turpitudinis contraria est ratio. Atque hi loci principatum tenent: quippe proxime cum virtute vitioque coniuncti.

55. Sed sunt etiam alii, remotiores illi quidem, sed tamen et ipsi ab his ducti fontibus. Nam et honesta putantur, quae rara et difficilia sunt; quae

quae profunt aliis, vel solis, vel maxime: item, quae multis, quae publice potius, quam priuatim; quae aliis, publiceque, cum incommodo, saltem periculo nostro: quae nihil de nobis meritis, aut merituris, velut posteris. Honesta etiam habentur, quibus praemia constituta sunt, aut tribui solent, praesertim publice, a sapientibusque, quae honorem potius, quam diuitias afferunt: porro laudari, admirationem cominouere, monumentisque honorari, praesertim mortuum, ab alienis, aut inimicis, aut sapientibus: denique signa rerum honestarum et laudabilium. Quae his contraria sunt, turpia putantur.

56. Assumuntur etiam ad laudandum res bonae vtileisque, optandae illae alias potius, quam laudandae, nobilitas, diuitiae, forma, et cetera, quae fortuna dat, aut extrinsecus, aut corpori: in quibus vera laus non est, quae soli virtuti debetur. Sed assumuntur hactenus, quoad cum virtute possunt coniungi: ut diuitiae, si iis non ad insolentiam, non ad voluptatem et luxum abutare, sed ad liberalitatem conferas. Haec ergo omnia ita tractabuntur, primum, ut honestas quaedam appareat, quod Aristoteles vocat ἀγεν εἰς τὸ καλόν, deinde ut augeantur ex magnitudinis locis.

57. Res quae laudantur, aut vituperantur, sunt virtutes ipsae, et *vitia, facta, artes, loca, animalia*, aliaque vel naturae vel artis operi.

58. In virtute ipsa laudanda honestatis demonstratio, amplificatioque, petetur fere e locis magnitudinis, qui supra sunt demonstrati. Nam honestas quidem virtutis lucet ipsa per se: illu-

stratur tamen locis admirationis, laudis, utilitatis etc.

59. In factis autem, non modo, a quo quantisque virtutibus profecta sint, videbimus, sed etiam, an quis primus fecerit, an solus, aut cum paucis: an tempore ac loco iniquo, et necessario: an sponte, libenter, et saepe, quo denique consilio et effectu. Nam his rebus omnibus intelligetur magnitudo virtutis, a quo natum facinus est.

60. In personis ab his fere laudes ducuntur: a natalibus, educatione, bonis ingenii animique, studiis, scientia, moribus, rebus publice priuatiisque gestis, ac morte: eaque singula sic tractanda sunt, ut honestatis, quae supra demonstratae sunt, partes apparetant, eaeque e locis magnitudinis amplificantur.

61. Veluti, natales ita ad honestatem referentur, virtutisque opinionem concitabunt, si, ubi illustres sint, demonstretur e natura, usque, opinione sapientium, populorumque, quanta vis sit nobilitatis ad virtutem, vel natura, vel imitatione parentum atque maiorum: si obscuri, quanto difficilis, in maiorisque virtutis sit, parere nobilitatem, quam acceptam seruare. Nam ita existit opinio magnae virtutis. Similiterque ceterarum partium honestas reperietur.

62. Neque vero in ceteris rerum generibus difficile erit, videre, quomodo cum honestate coniungantur, si quis eos, quos proposuimus, honesti locos notatos habeat ac tritos, aut, quomodo singulæ honestatis repertæ partes augeantur, si magni-


magnitudinis locos percurrat. Vcluti, si ars laudanda sit, reducetur ad honestatem ipsa, si, quid ingenii, studii, laborisque, vel in inueniendo, vel in discendo, requirat, quam in honestis et praeclaris rebus versetur, quam vel prudentiam virtutemque dissentium, vel utilitatem aliorum adiuuet, quanto in honore semper habita sit, demonstretur. Res deinde singulae istae augebuntur argumentationibus ductis e locis caussarum, effectorum, formae, comparationis etc.

63. Ceterum hoc in genere maxime prudentia adhibenda est in delectu. Non enim omnia ubique nimis curiose et minute congerenda, sed maxime probabilia et insignia, et ad temporum, personarumque rationem accommodatissima, diligenda et persequenda: et nimis trita praetermittenda sunt. Eam acuet lectio et consideratio diligens exemplorum veterum ex eo genere. In quibus maxime illustres ἐπιτάφιοι λόγοι Graecorum, Periclis apud Thucydidem II, 35. Lysiae, Platonis, Isocratis, et Demosthenis: elogia Themistoclis apud Thucydidem I, 138. Atheniensium I, 170. Periclis II, 65. Ciuitatis Atheniensis II, 40, 41. item, apud Isocratem Atheniensis ciuitatis laus in Panegyrico et alibi, apud Xenophontem oratio de Agesilao, apud Ciceronem sua foria legis Maniliae, et laus Pompeii Or. pro Balbo, Caesaris pro Marcello, apud Plinium Traiani. Nam ab his solis totum hoc genus percipiendum, hisoli imitandi. Vbi inopia erit rerum laudandarum, quae propriae sint v. g. personis tractandis, vt fit, oratio traducetur ad genus vniuersum aliquius virtutis, scientiae, artis, etc. quod habeat ali-

C 3

quam

quam cum persona laudanda coniunctionem: veluti in Epitaphio fecit Demosthenes, in Encomio Helenae Busirisque Isocrates. In personis magnis, et rerum laudandarum plenis, inopia fuerit et infantia oratoris, a persona orationem auocare.



C A P. VI.

De Locis Generis Deliberatiui.

64.

Genus deliberatiuum versatur in suadendo et dissuadendo. Suasio autem propriam sedem in rebus utilibus habet, dissuasio in noxiis: cerniturque, illa in utilitate rei cuiusvis demonstranda, haec in noxis exponendis. Itaque cum honestatis turpitudinique opinio ad suadendum dissuadendumque assumitur, ut sit, maxime spectari solet eius cum felicitate miseriae humana coniunctio.

65. Ab generis ipsius fine diuersus est *deliberantium finis*, qui ponitur in *felicitate*. Etenim aliud in deliberando spectamus, aliud in suadendo ac dissuadendo. Nam omnes, qui in deliberando versantur, quaerunt, vel, quid sit efficiens eius, quam expetunt, felicitatis, vel, an id, quod agendum sit, ad felicitatem profit, nec ne. Itaque suadentis est, vel offerre dubitantibus, quod quaerunt, hoc est, ostendere, quibus rebus agendis, comparandisque peruenire ad finem possint, vel, quod iam propositum est ab aliis, tale esse, ut ad

ad felicitatis expetitam partem valere possit: dis-
suadentis docere, quid ob sit isti consilio, quid mi-
seros reddat. Quare, cum res quaeque, quoad vel
prodest ad felicitatem, vel ei obest, vel vtilis vel
noxia dicatur, clarum est, deliberantium finem
esse felicitatem, suadentium vtilitatem.

66. Subiiciuntur igitur huic generi, velut ma-
teria, res omnes, quae habent hanc vim, vt in
eas cadere possit vtilitatis noxaeue opinio, sintque
in potestate humana. Eae quae sint, vt planius
intelligatur, et felicitatis et vtilitatis natura, ac-
commodate ad orationem rationem, explicanda
videtur: qua cognita, loci vtilitatis qui sint, ap-
parebit.

67. Est autem *felicitas* duplex: altera priuata,
altera publica. *Priuata* est tranquillitas et suauitas
vitae ex iusta bonorum copia: *publica* est in
securitate et adfluentia rerum ad ciuitatis vel ne-
cessitatem, vel dignitatem valentium.

68. *Priuatae felicitatis* duae *partes* sunt, altera
interna, altera *externa*. Interna est in bonis ani-
mi, in sapientia et virtute, atque utriusque parti-
bus: externa, in bonis, primum corporis, vita, recta
valetudine, robore, pulcritudine, deinde fortu-
nae, in nobilitate generis, fama, honore, diuiniis,
amicitiis, benevolentia bonorum, liberis bonis et
beatibus: quae qualia sint, partim satis notum est
omnibus, partim in philosophiae moralis initiiis
traditur.

69. *Publicae felicitatis* *partes* sunt vel *commu-*
nies *omni generi ciuitatis*, vel *propriae* *singulis ge-*

40 Cap. VI. De Loci Generis Deliberatiui

neribus, veluti monarchiae, aristocratiae, et democratae. *Communes* sunt, pax cum dignitate, opes, cum pecuniariae, tum militares, ad ciuitatem vel bello defendendam, vel pace ornandam, leges et disciplina, mercatura. *Propriae* sunt, monarchiae quidem, summae potestatis et conservatio, et legitima dignitatisque plena administratio, aristocratiae, morum disciplina, et legum conservatio, democratiae denique libertas: de quibus omnibus accurate tractatur in politicis.

70. Ad haec igitur vel comparanda, vel conservanda atque augenda, quaecunque aliquam vim habent, ea hoc loco *utilia* esse dicimus: quae vel comparisonem, vel conservationem impediunt, ea vero *noxia*. Veluti, benevolentia bonorum et potentium in parte felicitatis ponitur; quicquid autem est eiusmodi, vt, alliciat eorum animos ad benevolentiam et ad usus nostros, id hactenus utile est. In quo fit, vt quod in parte felicitatis et bonorum est, fiat etiam utile: velut in hoc, quod posuimus. Nam in sapientiam et virtutem, cum per se in felicitatis parte ponantur, utilitatis ratio cadit, quoad iis hominum praestantium benevolentia et studia ad amplificationem nostri excitantur. Alioqui non ignoramus, etiam ipsa bona illa, quibus felicitas censetur, utilia et esse, et vocari, ipsa mala, noxia. Sed in deliberando non quaeritur, an illa expetenda sint, haec fugienda: finis enim et singulorum, et ciuitatum non cadit in deliberationem, sed de expetendi fugiendique via et modo quaestio omnis esse solet.

71. Lo-



de-
te,
ta-
m,
nt,
er-
ra-
n-
us
ru-
m
el-
t,
et
d
d
e
et
d
n
o
-

71. Loci igitur vtilitatis vniuersi qui fint; ex his fere patet: neque in eo multum difficultatis obiicitur. Sed, quomodo ex his locis argumenta in singulis caussis ducantur, id quidem haud paullo difficilius est, accommodate ad personarum, temporum, locorumque rationem reperire, quam vulgus existimat. Nam vniuersa philosophorum de singulis decreta scire, id quidem philosophi disputationi suffecerit, non prudenter suadere aut dissuadere instituentis oratione populari, in qua plus usus rerum et experientia valebit. Vnus ille locus, de rebus ad benevolentiam comparandam vtilibus, ad personam principis Romani accommodate tractatus, etiam in subtili disputatione, totum prope librum secundum Ciceronis de Officiis explet.

72. Vniuersa quidem ratio ex istis locis ducendi tractandique argumenta haec est, vt, quarum rerum suscipiendarum auctores nos profitemur, eas $\alpha\gamma\omega\mu\epsilon\pi\rho\circ\tau\circ\chi\epsilon\eta\sigma\iota\mu\circ\circ$, sic, vt priuum ostendamus, eas esse cum parte felicitatis publicae priuataeue, ad quam deliberatio refertur, id quod obscurum esse non potest, coniunctas, sic, vt eam vel gignant, vel adiuuent, vel conseruent, vel augent: deinde augeamus singulas partes e locis magnitudinis huic generi conuenientibus, hoc est, e locis effectorum, temporum atque locorum. Dissuadendi contraria est ratio.

73. Profecerit etiam ad suadendum vel dissuadendum, bona vel mala ipsa, quorum vel comparandorum, vel vitandorum consilia damus, augere e locis magnitudinis. Nam magnitudo speci,


ac metus incendit natura sua expetendi fugiendiue studium. Hac arte vſus est v. c. Cicero in Maniliā, declarato genere et magnitudine belli atque mali, vt hoc cupidius consilium diligendi imperatoris Pompeii acciperetur.

74. Interdum etiam vtendum est comparatione. Nam non semper de vtili simpliciter dubitatur, sed etiam de magis vtili. Itaque etiam in proutu esse debet bonorum et malorum comparatio. Comparantur autem sic, vt bona animi praeferantur corporeis, vt malis valere, quam diues esse, diues potius esse, quam robore magno corporis: in bonis animi, virtus doctrinae, in corporeis, bona valetudo voluptati, vires celeritati, in externis, gloria diuitiis, item amici et boni liberi praestent. Publica bona porro potiora priuatis habentur, in publicis autem securitas interna et externa copiis et affluentiae rerum. Comparantur etiam vtilia eiusdem generis: nam aliud alio plus prodest vel ad virtutem, vel ad opes etc. Sed haec comparatio pendet e locis magnitudinis.

75. Atque est in hoc genere etiam locus quidam augendi proprius, quem locum *ἀσφαλείας* (certitudinis) vocemus licet; cum doceimus, id, quod demonstramus, hoc tempore atque hac in caufsa haud dubie euenturum, ac non posse non euenire. Nam in hoc genere plurimum in vtramine partem, ad vel incitandos vel remittendos animos valet, cum animus vel leuiter vel fortiter illa *ἀσφαλείας* opinione est affectus.

76. Suadendi dissuadendique exempla ad imitandum idonea extant, in causis publicis, haud pau-

pauca, Orationes Thucydidis, aliorumque historiorum permultae, Isocratis Panegyricus et Epistola ad Philippum, Ciceronis denique Maniliana, Rulliana, de Prouinciis Conf. et Philippicae non nullae: cauſarum priuatarum iustas orationes non habemus, sed epistolæ tamen plures Ciceronis, quae earum locum obtinere possint. Nam ratio vniuerſe virtutem suadendi, philosophorum potius fuit, quam oratorum: quanquam, ut nunc est, etiam in hoc genere oratores versantur. Neque eius generis ratio obscura erit, superiori illa perspecta. Estque multa facilior vniuersalium, quam singularium apta tractatio.



C A P. VII.

De Loci Generis Iudicialis.

77.

Ijudiciale generi propria est accusatio et defensio. Accusatio versatur in iniuriae demonstratione; in qua dissoluenda ac diluenda laborat defensio. Vtriusque autem finis est ius et aequum. Nam et qui iniuriam factam contendit, et qui factam negat, ius suum obtinere vult.

78. Sed quaecunque in accusando ac defendendo inesse possunt, ad haec, ut nobis videtur, capita referri possunt: vt quaeratur primo, factumne sit aliquid, nec ne, deinde quid sit, et tandem quale sit id, quod factum esse constet, iure factum, et innoxie, an iniuria. Plerumque singula

gula et ad accusationem et ad defensionem sufficiunt: veluti in caussa Rosciana solum hoc quaerebatur, an interficerit patrem Roscius: in Miloniana, iurene Clodium interficerit, an iniuria: interdum de duobus dubitari ac disputari in eadem caussa potest: quamquam id rarius accidit.

79. Ac fecisse quidem aliquem quid, quomodo demonstretur, dictum in loco de possibili. Cum autem de facto satis constat, *quid sit*, sequitur, ut videamus. In quo quaeritur de *nomine facti*, siue, ad quod genus debeat referri. Quale est, cum quaeritur apud Ciceronem pro Caecina, an vis appellanda sit, cum prohibitus sit Caecina terrore, quo minus fundum suum ingredieretur: item in Philippica II. an caedes Caesaris parricidii nomine appellanda: pro Murena denique, an ambitus cadat in ea, quae Murena fecisset. In hac quaestione primum definitio nominis propria, eaque ratione, vsu, exemplis confirmanda, deinde ad factum quaestionis transferenda et accommodanda. Eodemque fere modo aduersarii definitio refelletur.

80. Sed maxime quaeri solet, *quale factum*, h. c. *injustum sit, an iniustum*: hoc accusatoris est, illud defensoris. Quae pars, ut recte tractari possit, videndum est, *vnde* argumenta in utramque partem ducantur, et *quomodo*.

81. *Iustum* igitur est, quicquid est consentaneum legibus, quibus felicitati cum priuatae singulorum, tum publicae vniuersorum causum est: quae contra fiunt, *iniusta*. *Leges* porro sunt vel
natu-

naturales, et diuinae, vel humanae, et ciuiles: scriptae item aliae, aliae non scriptae: eaque vel ad vniuersos pertinent, vel ad vnum, aut certum genus. *Felicitatis* autem cum priuatae, tum publicae, quae sint partes, superiori capite demonstratum est. Vnde fit, vt *iniuriam fecisse* dicatur, quicunque sciens volensque legem talem violauerit, aut aliquam felicitatis alienae, siue priuatae illius, siue publicae, partem, vel agendo, vel non agendo laeserit: *affectus* autem *iniuria*, cuius felicitas alterius culpa diminuta est.

82. Atque hinc facile patet, qui sint loci, unde et accusandi et defendendi argumenta ducantur, vbi de facto liquet, nempe, leges et partes felicitatis humanae, publicae priuataeque, quibus violandis diminuendisque iniuria fieri putatur. Sed ex his locis quomodo argumenta in vtramque partem sumantur, videndum est.

83. Ab *lege* igitur argumenta in vtramque partem ducuntur, primum *interpretatione*, cum de sensu legis quaeritur, vt appareat, subsitne factum legi, nec ne: quae petitur e consuetudine loquendi, legis ratione, et consilio legislatoris, denique iudicio prudentum, cum docetur, semper legem sic intellectam esse, vt volumus. In quo solet interdum sententia aduersus scriptum defendi et contra: scriptum, cum leges omnes frustra datas, irritasque fore dicas, si non sit standum verbis legis; sententia, cum dicas, salutem, et utilitatem publicam, aequitatem, legibus, et auctoribus earum propositam fuisse, quam conuel-

li,

li, si verbis standum sit; aequitatem omnem, si sumnum ius sequendum.

84. Alter modus est in *analogia et comparatione*, veteres *ratiocinationem* vocant, cum de re proposita nulla lex nominatim sanxit, sed ea ad legem aliquam propter similitudinem rerum referatur: vnde scilicet fit probabile, legislatorem, si ei huius rei in mentem venisset, eam haud dubie adscripturum fuisse. Quod genus ita tractandum est, ut vel, consilio legislatoris explicato, ostendamus, ei consilio rem propositam subesse, vel simpliciter, aut a pari, aut a maiori minoriue, aut etiam a contrario, argumentemur.

85. Tertius est in *pugnantium compositione*. Etenim interdictum lex cum alia pugnare videtur, ut dubium sit, vtram sequi debeamus in iudicando. In quo maxime spectari debet, vtra lex maior altera et grauior, h. e. vtra magis necessaria ad salutem publicam priuatamque, vtra ad publicam potius omnium quam priuatam singulorum utilitatem pertineat, vtra a maiori auctore sit. Veluti, lex est, ne quis quem interficiat: alia, eaque naturalis, ut se vitamque suam aduersus vim quisque tucatur. Posterior magis necessaria est priori: itaque, si quis vim facientem interfecisse demonstretur, illius legis vis cluditur. Legibus diuinis et naturalibus cedunt humanae etc. In iure etiam temporis ratio habetur, ut lex posterior plus valeat priori.

86. A *partibus* autem *felicitatis publicae priuataeque* argumenta accusandi ducuntur non' alio modo, quam in genere deliberatio, cum noxis rerum

rerum demonstrandis augendisque dissuademus aliquid: in defendendo contraria ratio est. Magnitudo iniuriae demonstratur etiam iisdem argumentis, quibus factum vituperamus quodque.


87. Est autem etiam quidam defendendi modus, cum et factum et iniquitas eius conceditur, quia negari diluique nullo modo potest. In quo arguentia ducuntur vel a culpae in alios translatione, quae ratio maxime in promptu est natura: veluti Cicero in ipso Cladio culpam esse demonstrat, quare a Milone interfectus fuerit: quod saltem ad minuendam facinoris atrocitatem valere debere putatur: vel ab excusatione, cum se quis necessitate aliqua coactum, aut fortuna oppressum, aut errore deceptum fecisse docet, quae contra esse, accusator ostendet: denique a depreciatione, quae veniam facti petit a clementia et misericordia, quam docebit esse per se gloriosam, et maxime dignam tum animo eius, a quo petitur, tum ceteris meritis, virtute, spe denique eius, cui petitur: quae contra accusator cum ius et leges vrgebit, tum indignum venia reum ostendet, eleuandis iis, quae pro dignitate eius dicta sunt, et contrariis commemorandis.

87. Sunt etiam in hoc genere caussarum argumenta, quae *ἀτεχνα* Rhetoribus vocantur, non illa quidem omnis artis in tractando expertia, sed non e natura caussæ reperta, verum extrinsecus adscita: veluti testimonium, siue sponte editum, siue per tormenta expressum, ius iurandum, pacta et conuenta. Ac de legibus satis dictum est. Reliquorum tractatio hac lege continetur, ut, cum

pro



pro caussa sint, eorum fidei, grauitatem defen-
damus, eleuenius, cum contra sunt. Sed de
his subtiliter praecipere, non est instituti nostri.
Legant, quibus tanti est cognoscere, Arist. Rhet. I.
44. ed. Sturm.



C A P. VIII.

De Affectibus.

88.

Affectus omnis est vehementior sensus alicuius vel voluptatis vel doloris: eiusque partes sunt quatuor, duae e voluptate, amor et laetitia, duae item e dolore, odium et tristitia. Singularum porro aliae sunt partes, quae enumerantur in philosophiae elementis. Sed ipsis omnibus hic non vtimur.

89. Etenim Rethores alia fere caussa de affectibus agunt, quam Philosophi, atque etiam alio modo. Philosophi quidem primum, ut natura animi intelligatur, deinde, quoad vim habent, vel ad virtutem, vel ad vitium: Rhetor autem tantum, quoad valent ad mutandos hominum animos, et in iudicando flectunt, et quoad iis vtimur ad persuadendum, qui est oratoris finis, ad quem adeo haec praeceptio tota est dirigenda. Itaque nec de omnibus affectuum partibus agit, sed tantum de his, quae persuasionem adiuuare possunt. Philosophi porro maxime considerant causas affectuum, et quidem vniuerse: Rethores autem

autem in iis, quibus vtuntur, tria fere considerant, *causam*, qui affectu quoque commoueantur, denique in quos commoueantur, atque ex his argumenta ducunt. Sed haec pleraque non e Philosophorum libris, sed ex vsu vitae humanae repetuntur, constantque maxime obseruationibus, quas optime fecere Rethores, in primisque Aristoteles, cum nobis collectas reliquere. Neque enim est cuiusvis diligentiae, talia obseruare, et prope, quae maxime posita sunt in vsu vitae humanae, ea plerisque omnium minime in tempore occurruunt. Itaque Aristoteles, etsi in Ethicis late de affectibus egerat, tamen non minus late in Rheticis L. II. toto illo aureo, iudice Vossio, sed alio modo tradidit: quod quisque comparando facile intelliget. cf. Cicero Or. I. 51.

89. *Tredecim* sunt fere affectus, quibus orator vtitur: tot enim maxime valent ad persuadendum in vtrainque partem: *Amor, lenitas, misericordia, gratia, pudor, inuercundia, spes s. confidentia, ira, odium, indignatio, inuidia, aemulatio, metus*: de quibus singulis separati, et ad dicendi facultatem accommodate exponere atque praecipere, non est breuitatis nostrae: et indicauiimus fontem, vnde peti vel a studiosis, vel a magistris possint: addi poterit, qui ex Aristotele hauhit, Vossius in Comm. Rheticis, capitibus tredecim prioribus libri secundi, vt alios mittainus. Nobis sufficerit, primum, rem omnem vniuerse explicare, vt modus et via appareat, deinde vnum et item alterum exemplum subiicere, ad cuius ra-

Ernesti Initia.

D

tio-

tionem cetera intelligi possint. Hoc autem necessarium nobis videtur. Neque enim possumus probare eos, qui totum hoc caput putant e philosophia, quantum quantum sit, petendum: quod non ita esse ex iis, quae ante dicta sunt, intelligi arbitror.

90. Et *causarum* quidem cognitione non admodum differt a Philosopho Rhetor, adeoque ab illo, si ita placet, petit: quinquam sunt in promptu, et positae in sensu communi: quippe nemo nescit, amorem a beneficio, pulcritudine, iram ab contemptu, contumelia, et quauis iniuria, metum a periculi opinione nasci, et de ceteris similiter.

91. Cum autem quaeritur, *qui* et quomodo affecti soleant commoueri, id, intelligendum est ad aetatem, genus, fortunam, tempus, et similia referri, ad quae philosophia se non magnopere demittit. Etenim ut eundem ictum ferri aliud alio celerius et altius recipit corpus: sic aliis alio mollior, aut durior est animus ad recipientum talem motum, vel repellendum. Veluti, cum quaeritur, *qui* irasci soleant, id tribuitur non tantum uniuerso, iniuria affectis: non enim multum differt a priori: sed nobilibus, aegrotis, pauperibus, militibus, fortibus et magnanimis, ingeniosioribus, amantibus, bonis viris, in primis bene meritis, etc. et contra lenitas esse dicitur otiosae ac tranquillae vitae deditorum, laetitia aliqua e ludo, conuiuio, quaestu, vel quoconque felici et optato euentu fruentium etc. Quae omnia sunt observationis, e vitae usu ductae.

92. Ac

92. Ac prope similiter intelligendum est tertium, de iis, *in quos commoueantur*, ut ad hominum vel conditionem, vel aetatem, vel genus, vel animum, vel mores pertineat. Veluti, amari dicuntur, praeter benefactores et amicos, quicunque virtutibus quasi placidioribus et popularibus praediti sunt, liberales in quoque, iusti, comes, affabiles, communes, placabiles, lenes, faceti, integri, inorui, studiorum, institutorum nostrorum, actionum denique, imitatores, et laudatores, obsequiosi etc. Haec igitur et similia diligenter sunt cognoscenda, et in vita quotidiana ac lectione animaduertenda, vt sint in promptu.

93. Neque existimandum est, paruum momentum facere *personas* in affectibus vel incitandis, vel retardandis. Misericordia est, vt hoc vtar, ab omni sensu miseriae alienae, in primis magnae, sed magis multo, si sit in innoxiiis, amicis etc. Et hi quoque magis mouent, si sint tenera admodum, vel prouecta aetate, orbi parentibus. Itaque videmus, summos oratores hic magis personis vti, quam rebus. Sic Cicero Verr. I, 58. misericordiam maxime inuenit hoc, quod iniuria facta sit Iuniae puellae, pupillae, ingenuae etc.

94. Ne quein autem offendat illud, quod in affectibus oratoriis partes quaedam ponuntur, quae sedationem potius animi et vacuitatem a grauiori motu habent, quam comotionem, veluti *lenitas*, *inuercundia*: habet ea res caussam hanc, quod sunt contraria commotionibus, vt lenitas irae, inuercundia pudori, et placanda ira indu-

citur lenitas, pulso pudore inuercundia redit, in quo oratori elaborandum. Neque enim tantum excitare atque incendere affectus, est opus oratorium, vt adiuuent persuasionem, sed etiam reprimere atque restinguere, ne impedian.

95. Atque vt contraria sunt ista, ita etiam contrariis modis efficiuntur. Nam excitantur atque inflammantur augendis iis, per quae in singulis, in quosque, oriuntur: reprimuntur et franguntur iniuendis.

96. Vnde igitur argumenta petantur in commouendis ac reprimendis affectibus, patet. Sunt autem hi loci maxime coniuncti cum locis, e quibus in quoque genere caussarum argumenta pertinentur, et quidem in primis, quoad ducuntur a caussis. Veluti, cum misericordia moueri debet, vel sedari, e loco caussae h. e. iniuriae, vel ab improbitate hominum, vel ab acerbitate fortunae oblatae, patet, illius generis iniuriae argumenta arcessenda esse, e locis generis judicialis, quod iniurias factas e certis locis demonstrat, et quidem iis maxime, qui insunt in partibus felicitatis humanae: huius autem e locis generis delibera-
tiui. cf. Cicero Or. II, 51.

97. Verum non omnia insunt hic in argumen-
tis apte ad affectum quemque mouendum et exco-
gitatis et tractatis, sed multum, ac prope dicam,
plus valet motus animi in dicente. Atque etiam in
optime inuentis et amplificatis argumentis frige-
bunt auditores, nisi cum sensu proferantur, h. e. ita,
vt e fono vocis, colore oris, obtutu oculoruim,
corporisque gestu, appareat, moueri dicentem
ipsum.

ipsum. Itaque Rethores praecipiunt, efficiendum esse ante omnia dicenti, ut afficiatur ipse, antequam auditores afficere velit, neque solum, ut valeat oratio, habeatque fidem, sed etiam ut possit satis diserte, quae sint mouendorum auditorum, eloqui v. Cic. Or. II. 45. Quintil. VI. 2.

98. Atque etiam, qui non commoti ipsi sunt, cum dicunt scribuntque, argutias fere consestan-
tur, quae sunt a motibus animi vehementioribus alienae, et alieno loco communere conantur au-
ditores, et simulationem produnt, quo nihil ma-
gis frangit efficaciam dictorum.

99. Atque huius rei efficiendae, hoc est, affi-
mendi affectus cuiusque, quem vel argumentando,
vel agendo velimus mouere, etiam modum et ratio-
nem tradunt: voluntque, rebus ad mouendum
valentibus assidue et attente cogitandis, assumi
affectus posse. Quod ut aliquid prodeesse non ne-
geminus, certe in non nullis naturis: tamen plus ac
prope omnia valere naturam ipsam arbitramur.
Itaque, qui habebunt natura celeres motus, et
quandam teneritudinem et quasi mollitudinem ani-
mi, ut facile ipsi moueantur, hi erunt in hoc ge-
nere felicissimi. Satis quidem constat, esse quo-
rundam hominum naturam hanc, ut facillime et
celerrime, aliisque in alio genere magis, dolo-
re, misericordia, ira, ceteris commoueatur, cum
alii multo sint duriores; ut materia alia facilius
alia ignem, quaedam ab unius scintillae contactu,
concipit atque rapit.

100. Non minus tamen valere dixerim ani-
mum honestum, probum, magnum, et utilita-

tis publicae amantem. Etenim usus docet, hos, quae dicant, vel propterea, quod ex animo dicant, non sine commotione animi proferre, et facile vehementerque moueri, praesertim in iis rebus, in quibus honestas, ius, aequitas, fides et officium agatur (cf. Cic. Or. II. 46.) Hinc natum putem dolorem, quo se Cicero (Or. 37.) plus in hoc genere effecisse dicit, quam ingenio. Adeo verum est, quod est apud Quintilianum: *peccatus est, quod disertos facit.*

101. Quod si affectus concitandus erit, qui maxime moueat verosimillima representatione factorum, dictorumque: valebit multum, primum obseruatio diligens hominum, aliquo motu animi concitatorum, unde, quid, et quomodo loquantur, agant, capiamus: deinde vis viuide concipiendi imagines rerum, hominumque iratorum, querentium, laetitia gestientium etc. per quam absentia velut coram intueamur. Nam ubi haec erunt, non difficile erit tales affectus imitari. Sed tamen et haec imitatio, in dicente quidem (nam in scribente sufficerit) frigidiuscula erit, nisi natura sit talis, qualem descripsimus. Atque etiam certus quidam vocis sonus requiritur in tali oratione: qui nisi erit a natura, frustra cetera contigerint. Atque haec quidem hoc loco de affectibus communendis dicta sunt. Quae praeterea huic rei seruiunt, amplificatio, figuraeque παραγριμα, de iis suo loco dicetur.

102. Sed habet etiam hic locus in utendo varias cautiones: primam, ut loco mouere affectus ten-

tentes, consideresque, vtrum res, de qua agitur, postulet, capiatque motus animorum, nec ne. Nam in re cognitionis, in tenui arguento et subtili, non modo frustra laboret, sed etiam irri- deatur, qui affectibus vti tentet. Altera est, vt neque subito assilias, sed pedetentim, et praepa- ratis demum argumentando animis, impetum fa- cias: non enim statim, et uno impetu, facile exardescunt animi: neque celeriter ab affectu, ora- tione, gestu, vocisque sono resilias: simulatio- nis enim suspicionem iniicias, quae corruptit bene dictorum viam. Nam omnis motus natura paullatim minuitur, et, vt calor non subito in frigus conuertitur, sic magnum motum non re- pente quies consequitur.

103. Neque tamen nimis vrgendi sunt animi, aut diutius immorandum iisdem affectibus. Sunt enim natura inconstantes et mobiles; et vt quis- que motus animi vehementior, ita minus diuturnus. Ciceronis dictum est, *nihil citius inarefit, quam lacrimae v.* Quintil. VI. 1.



C A P. IX.

De Moribus.

104.

Cum affectibus adeo coniuncti sunt mores Rhe- torum, vt a non nullis pro parte eorum po- nantur: cum dicant, τὰ πάθη esse incitatores, τὰ θῆρες leniores et tranquilliores affectus animorum.

D 4

Sed

Sed consuetudo tamen fecit, ut affectus proprius de prioribus dicerentur. Illud quidem certum est, utrumque genus eundem finem, sed non eadem contentione petere. Nam mores leniter et sensim, affectus incitatis et magnis passibus progrediuntur: mores eliciunt persuasionem, affectus exprimunt. In hoc autem differunt, quod illi in omni genere orationis, hi in non nullis tantum locum habent. Sunt autem mores triplices, ut supra dictum est, oratoris, auditorum, denique eorum, qui oratione tractantur.

105. *Oratoris mores* sunt in primis, prudentia, probitas, modestia, benevolentia. Nam hi maxime in omni genere causarum adiuuant persuasionem. Etenim magnum momentum facit ad fidem, primum, si quis intelligere ac videre multum putatur, ut possit docere alios, quod est prudentiae: deinde si nulla est in eo fraudis iniuriaque suspicio, sed magna amoris in rem publicam opinio, quod est probitatis: si denique verum docere, recta et utilia suadere velle ac prodeesse publice priuatiisque videtur, quod benevolentiae tribuitur.

106. Atque ut maxime optabile est, dicente in aut hanc opinionem secum ad dicendum adferre: facilior enim aditus ad aures animosque dabitur: aut saltem integros ab contraria de se opinione animos audientium offendere: sic magna cura est, videre, ut oratione ipsa hanc opinionem imprimas, et, quantum possis, virtutis signis proferendis, augeas. Sed nihil, ut opinor plus valet,
quain

quam modestia, pudor, lenitas, et comitas, quae in iudicando de rebus omnibus, in refellendo, etiam in hortando, monendo, suadendo, e verbis, voce, vultu denique ipso appareant. Omnes enim probamus eos, prudentesque et bonos viros putamus, in quibus pudorem et modestiam animaduerimus, capimurque mirifice comitate et lenitate; siue, quod ab his nos amari putamus, qui iis erga nos vtuntur, siue, quod natura ipsa nos ita finxit, ut ipsum illud mite, et placidum, et blandum, aures animosque delectet.

107. Incidunt tamen tempora, vbi prope necessario dicenda sunt, quibus modestia, pudor, lenitas, laedi videatur, veluti, cum de nobis in ipsis dicimus, vel laudandi, vel defendendi caussa, aut obiurgamus alios, etc. Quo in loco proderit excusatione sibi cauere: necessitate aliqua, quae singulis in caussis breuiter indicabitur, exprimi, non vanitati aut iracundiae dari: parcus facturos, aut fecisse, quam res postularer: oppressos nos esse motu animi iusto, etc. Cuius rationis non unum apud Demosthenem Ciceronemque exemplum habemus.

108. *Auditorum mores* paullo latius patent. Etenim opiniones eorum, sensus, affectionesque animorum omnes, hoc nomine complectimur. Distribuunturque, ex Aristotelea ratione, secundum aetas hominum, fortunam, habitus et affectus. Etenim alii mores sunt iuuenium, alii senum: alii diuitium, alii pauperum: alii proborum, alii improborum: alii iratorum, alii lenium etc.

D 5

Ad-

Addere etiam licet discriminem sexus, nationis. De iisque late egit Aristoteles secundo libro, collectis ex usu vitae humanae summa diligentia omnibus, quae cuique generi propria esse solent. Totum enim hoc, quantuncunque est, non philosophantium subtilitati, sed obseruantium diligentiae debetur. cf. Cic. Or. I. 5. Idem mores sunt personarum, quae dicendo tractantur, neque modo ab oratore, sed etiam poëta.

109. Et auditorum quidem mores nosse, et ad persuasionem conferre, conuenit, non modo hactenus, ne iis temere aduersando offendantur animi, auertanturque a persuasione; sed etiam, ut ad eos orationem componendo, beneuoli, fautorisque caussae nostrae fiant: quod plurimum adiuuat persuasione. Natura enim, veluti contagione quadam, fauemus iis, et diligimus, qui nobiscum sunt opinionum, sensuum, morumque similitudine copulati.

110. Quod si tamen necessitas aliqua postulabit, ut contra opiniones, sensus, voluntatemque audientium dicatur, vtendum erit quodam quasi lenimento, et praemunitio, efficiendumque artificio aliquo, ut aut eripiamus iis opiniones, aut volentibus, aut faltem non repugnantibus, excusatione aliqua, exceptione, aut alio quo modo, offensioni occurramus. In quo genere admirabilis fuit Cicero. Graecorum testium fidem fracturus, leuitatemque demonstratus, cum sciret, quantum tribueretur Graecorum ingenii, laudibus summis extollit Graecorum genus yniuersum, ac dein-

Deinde demum subiicit exceptionem fidei Or. pro Flacco. Catonem reprehensurus, oratione pro Murena, summa apud omnes auctoritate virum, quam caute et molliter incedit, ipsum laudibus extollens, eiusque naturam, et accusans Stoicae philosophiae asperitatem, quae et ipsi aliquid duri alleuisset. Hac arte plebi Romanae legem agrariam, hoc est, ut Plinius interpretatur, sua alimenta, Caesarique Ligarium eripuit, legem autem Rosciam eidem plebi Romanae, ut probabilem et popularem, obtrusit. Etiam Dolabellam eo in genere praeclarum artificem fuisse, patet ex Ciceronis epistola ad Diu. IX. 14. Adde Germanici artificium apud Tacitum, Annal. I. 34.

111. Duo sunt genera personarum, quae dicendo scribendoque tractantur: primum earum, in quibus laudandis vel vituperandis, accusandis vel defendendis, versamur, quarum mores exprimitur persuadendi causa. In his igitur videndum erit, primum, qui mores maxime videantur, loco quoque, ad persuadendi consilium accommodati, iisque erit vtendum: deinde, ut in eo verisimilitudinem sequamur. Frustra enim mores tribueris, qui non consentiant cuiusque vitae anteaactae, notissimisque institutis et factis.

112. Quod consequemur, etiam ubi contra res erit, si virtus in vicinas virtutes, virtutes in vicinas virtus commutabimus, quorum etiam cognata sunt, ut Horatius ait, vocabula. Nam plerumque non admodum magno, aut omnibus valde perspicuo, discrimine et interuallo direntiae sunt a virtutis virtutes: unde fit, ut saepe errore hominum, virtus virtutum

tutum laudem ferant, virtutes in vitiorum reprehensionem incurvant. Hac lege ex auaro v. c. fiet parcus, et frugi, e feroci fortis et acer, e profuso liberalis, e superbo magnanimus, et contra. Ceterum viri boni erit, hoc magis in meliorem, quam detersorem partem facere.

113. Alterum genus est, idque latius patens, earum personarum, quarum mores oratione imitamur, et quasi pingimus, ita, ut ex iis ducatur, siue iis accommodetur, quicquid vel dixisse, vel egisse dicantur. Hoc genus habet magnam viam, primum in hanc partem, ut credibile sit, quod iis attribuimus, deinde, ut suauior sit oratio. Nam, ut pictura maxime delectat, quae archetypum quam maxime refert, etiam in rebus non pulchris: sic oratio mirificam suavitatem habet, et sensibus et verbis conueniens cuiusque aetatis, fortunae, habitus, affectusque naturae, et moribus. Atque haec maxime est illa, quam *moratam orationem* vocant.

114. Eam facultatem quomodo consequamur, intelligi potest ex iis, quae de exprimendis affectionibus praeceperimus. Nam quod de uno genere diximus, commune est omnibus. Vniuersel quidem mores cuiusque generis, ut ante tradidimus, diligenter collegit Aristoteles: vitiosorum etiam Theophrastus, sed alio modo. Optimi magistri erunt veteres, quidam etiam recentiores poëtae, et oratores, qui omne genus morum felicissime expresserunt, et sententiis, et verbis. Sed profuerit tamen et ipsum animaduertere in vita quotidiana, quid proprium sit generis cuiusque, quae et

et quomodo loqui, cuiusque aetatis, sexus, nationis, fortunae ac loci, studii, motus, virtutis vitiique genus soleat, quid petere, quid fugere.

115. Sed cum ita exprimimus personarum mores, aut genera vniuersa tractamus, velut auarorum, amantium etc. aut aliquam partem morum certi hominis. Est vero etiam, cum certi hominis mores vniuersi exprimuntur; quod fere proprium est historicorum. Idque fit hoc consilio, ut fontes ac caussae omnium actionum eius, rerumque in vtramque partem gestarum, appareant. In quo genere excellunt Thucydides, qui Themistoclis, Periclis, Alcibiadis, aliorumque mores accuratissime expressit, exemplaque eius rei reliquit, in quibus imitandis omnes deinceps historici elaborarunt, Xenophon, Polybius, Liuius, Sallustius. Frequentes etiam in hoc sunt, Tacitus et Velleius, argutiores fortasse superioribus, sed simpliciores illi atque veriores. Apud Liuum excellens est locus de Hannibale XXI, 4. unde expressit Silius, I. 242. s. de Catone Censorio XXX. 40. apud Sallustium de Catilina B.C. 5.

116. In hoc igitur genere qui aliquid volet efficere, debet hoc consecutus esse, ut omnes actiones ad sua genera reuocare, et caussas indagare possit, latentes in cuiusque ingenio, corporis animique natura, educatione, institutis, disciplina domestica: quod fieri non potest, nisi cognita accuratissime ingeniorum humanorum natura, et exquisita morum omnium scientia. Neque tamen certa hic omnia: coniecturis etiam vtendum. In verbis deinde adhibenda breuitas, cum exquisito dele-

delectu, et quaedam praeterea concinnitas, sentienda magis intuendis bonis exemplis, quam praceptis exprimenda.

C A P. X.

De Modo argumenta tractandi per argumentationes.

117.

Quoniam fontes argumentorum aperiuntur, et, quomodo ab iis ducantur, ostendimus, restat, ut, quo modo inuenta bene argumenta recte tractentur, videamus; quod maxime necessarium est, cum in eo prope summa eloquentia insit. Id autem fit duobus modis, primum, cum efficitur ratione aliqua, ut veritas argumenti plane appareat, deinde, vi vis eius sentiatur. Quorum illud argumentatione fit, hoc exornando maxime et amplificando. Dicendum igitur est primum de *argumentatione*, deinde de *amplificatione*. De usu argumentorum vniuerso dicetur in loco de Confirmatione.

118. *Argumentatio* est ratio quaedam ad assensum eliciendum apta: siue, id quod dubium est certum faciens ex eo, quod non dubium est. Quo in loco diligenter solent veteres praecipere, quomodo a rebus personisque petendum inueniendumque sit, quo confirmetur id, quod dubium erat, veluti Cicero Inuent. I. 24. et in Topicis. Quintil.

til. V. 10. Sed nobis ea praeceptio subtilior et operosior videtur, quam pro ea aetate, cui scribimus, et, si cui lubet cognoscere, indicauiimus fontes: in primis, cum pleraque sint posita in usu vitae communis, et sententiis, quae paullatim e lectione bonorum scriptorum hauriuntur.

119. Est etiam alia ratio inueniendorum argumentorum tradita a Rhetoribus, e notatione, definitione, genere, specie, proprio, differentia, toto, parte, contrariis, consequentibus siue adiunctis, causis et effectis, quos vulgo locos topicos vocant, non profecto e veterum consuetudine, quae patebat latius, ut e Topicis Ciceronis patet, et omne genus reperiendi argumenti complectebatur: quae iisdem e locis petent, qui volent. Non enim inutilia sunt cognitū; sed nolumus histironum onerare memoriam, praesertim cum tantum inuenta sint ad exercenda in inueniendo ingenia tardiora. Quod si quis hac exercitatione vollet vti, indicauiimus, ubi reperiat. vid. etiam Cic. Or. II. 39. 40.

120. Ac plerumque non tam tam ratio deest, per quam intelligatur id, quod dubium erat, sed argumenti commoda et oratoria tractatio. Quod etiam Cicero iudicat Or. II. 27. extr. *Illa, quae tota ab oratore pariuntur, excogitationem non habent difficultem, explicationem magis illustrem per politanique desiderant. Itaque cum haec duo quaerenda nobis sint in causis, primum quid, deinde quomodo dicimus: alterum, quod totum arte fidum videtur, tametsi artem requirit, tamen est prudentiae paene mediocris, quid dicendum sit, videre;*
alte-

alterum est, in quo oratoris vis illa diuina virtus-
que cernitur, ea, quae dicenda sunt, copiose, ornate
varieque posse dicere, cf. Or. 35. init. De hoc igi-
tur videndum. Praecipuae autem argumentatio-
nes oratoriae sunt *ratiocinatio* sive *epicherema*, *en-
thymema*, *exemplum*, *inductio*.

121. *Ratiocinatio* sive *epicherema* tribus con-
stat partibus, *propositione*, quae breuiter exponit
id, vnde omnis ratiocinationis vis nascatur, eaque
fere continet argumentum e locis argumentorum
ductum: *assumptione*, quae id, quod propositio habet
valens ad demonstrandum, adiungit conclusionis
subiecto: denique ipsa *conclusione*, sive *complexio-
ne*, quae exponit id, quod ratiocinatione conficitur.
e. g. *Melius gubernantur, quae consilio geruntur,
quam quae sine consilio administrantur;* est proposi-
tio: *Nihil autem melius administratur, quam mun-
dus,* est assumptio: *Consilio igitur mundus admini-
stratur,* est conclusio.

122. Differunt a syllogismis epicheremata, pri-
mum ordine partium, qui in illis fixus et idem
semper est, in his varius et arbitrarius: deinde ma-
teria, quae in syllogismis vera et certa est, in epi-
cherematis etiam credibilia, et quidem saepius, tra-
ctantur: denique formis, quae plures sunt in syl-
logismo, quam epicheremate.

123. *Enthymema* est argumentum cum ratione:
habetque duas formas, quarum altera est *e conse-
quentibus*, altera *e contrariis*, quam non nulli ve-
terum solam *enthymema* vocarunt. *Ex conse-
quentibus* est, quod proponit argumentum, eique
subiicit statim confirmationem in hunc modum:

Tro-

*Tropaeis, monumentisque tuis finem est allatura
aetas: nihil enim est opere aut manu factum, quod
aliquando non conficiat aut consumat vetustas.* **E**
*contrariis est, cum argumentum confirmatur e
contrario, in hanc formam: Quem cum omnium
gratia noluit, hunc voluit, cum aliquorum quere
la? quem iure, quem tempore, quem loco, quem
impune non est ausus: hunc iniuria, iniquo loco,
alieno tempore, cum periculo capitinis, non dubitanit
occidere? In quo duplex enthymema e contrariis
est. Hacc enthymemata, quomodo a Dialecti
cis differant, per se patet.*

124. *Exemplum est rei gestae accommodata
ad persuadendum commemoratio: estque poten
tissimum, et ad intelligentiam popularem aptissi
mum argumentandi genus, quo Ciceronem, Iso
cratem, plurimum uti videmus: Falsum est, eum
vivere non debere, qui fatetur se aliquem interfe
cisse. s. Potest interdum a quis impune interficere
alium. Nam M. Horatius interfecit so
norem, Seruilius Ahalam, P. Nasica, L. Opinius,
C. Marius alias, Orestes matrem etc. Nempe
etiam fabulae similitudinesque loco exempli
rum adhiberi possunt: quod genus posterius
nonnulli veterum peculiari nomine *collationem*
vocant: ad exemplum etiam Quintilianus re
tulit. Tale est, quod nos alicubi diximus: *In
ribis iis quibus hoc mortale corpusculum alitur pa
randis apponendisque munditiae et elegantiae ratio
habebitur: et illum ingeniorum animorumque pa
ustum, hunc quasi humanitatis cibum immundum for
didumque, ei esse patiemur, et sumere sustinebimus?**

Ernesti Initia.

E

125. Ab

125. Ab exemplo, quod peculiari verbo *collatio* dicitur, non differt *inductio* oratoria et Socratica: diuersa illa ab dialectica, quae ex partibus totum, et singulis vniuersum colligit, cui simile est exemplum, quod proprio dicitur, estque *inductio* dialectica imperfecta. Nam oratoria e similibus concessis, aut sumtis, colligit, quod vult: veluti nos eodem in loco fecimus, cum multis similibus comparandis colligeremus, elegantiam orationis in exponendis disciplinis literarum esse adhibendam. Tale et hoc: *si equus generosissimus putatur, qui acerrimus ac velocissimus, vinum porro quod optimum: homo etiam generosissimus putari debet is, qui virtute maxime excellit: siue, si interrogatio adhibenda e more Socratis, sic: Quis equus generosissimus? velocissimus, opinor, quod porro vinum generosissimum putatur? non, quod optimum reperitur? Quidni ergo, qui virtute maxime excellit, idem generosissimus merito dicatur?*

126. Harum autem argumentationum diuersa est in vtendo ratio. Nam *epicherema* maxime seruit demonstrandis vniuersis quaestioneibus, aut confirmandis praecipuis caussae partibus, in eoque recte tractato, hoc est, copiose exornato, amplificatoque, de quo mox, magna vis oratoris cernitur: item *exemplum*: sed enthymeema, exemplum, in primis id, quod etiam *collatio*, aut *inductio* dicitur, amplificando et exornando. Etiam *epichermati* hic usus, sed sine amplificatione.

CAP.



C A P. XI.

De Argumentationum Exornatione et Amplificatione.

127.

Et si argumentationes omnes hanc vim habent natura sua, ut valere possint ad persuadendum: tamen, si nude et breuiter, Dialecticorum more, proferantur, neque satis exserere vim suam, neque capere animos potuerunt, praesertim in dicendo, et quidem ad homines imperitos, aut percipiendis argumentationibus non adsuetos, quod sine usu et exercitatione aliqua consequi nemo potest.

128. Etenim, primum, in omnibus rebus percipiendis, iusta quaedam mora desideratur, accommodata ad ingenii cuiusque vim: qua sublata, intelligi satis res non potest. Itaque orator debet rebus iis, quas maxime vult valere, immorari aliquamdiu, pro auditorum captu, et lente progressi, ut assequi antecedentem cuiusque tarditas possit. cf. Cic. Or. 40.

129. Deinde multo facilius percipiuntur, quae volumus percipere, libenterque audimus. Quod assequetur orator in dicendo, si suavitatis aliquid adspergere argumentationibus possit, quae alliciat dulcedine sua ad audiendum, adiuuetque intelligentiam.

130. Denique, quoniam assensus vel maxime aut elicitur, aut exprimitur motu quodam animi, suffragante oratoris caussae: intelligitur, argu-

E 2

men-

mentationes non modo intelligentiae afferendas, vel commendandas esse, sed etiam ad animum ad- mouendas, ut eius motu adiutae, eo fortius et al- tius feriant, et victrices euadant.

131. Atque haec omnia efficiuntur exornatione argumentationum, et amplificatione, qua cum apte vtitur orator, et ad tria ista, quae diximus, h.e. ad intelligendum, et delectandum, et mouen- dum, accommodate, efficitur id, quod Cicero vo- luit, cum alenda argumenta, et oratoriis lacertis contorquenda, Quintilianus, adiuuanda esse, dixit. Haec igitur quomodo efficiantur, locus est, vt do- ceamus, pro facultate nostra. Est enim haud paulo difficultius videre, vt ante diximus, quantum et quoniammodo, quam quid debeas dicere.

132. *Exornatio* igitur primum, quam ipsam nonnulli *amplificationem* vocant, (etenim magna varietas est, in horum verborum visu, vt apud Graecos, qui et ipsi modo ἀυξησιν δεινώσει distingunt, mox eius faciunt genus etc. vt Longi- nus S. XI.) quoad rebus et sententiis in est, maxi- me cadit, vti diximus, in epicheremata et exem- pla, cerniturque in copia quadam, ad perspicuita- tem et suavitatem apta.

133. In *epicheremate* igitur, exornatio maxime fit copiosa approbatione vel propositionis, vel as- sumptionis, vel vtriusque: vnde factum est, vt veteres quidam, nominatim Cicero, perfectam ratiocina- tionem (s. epicherema) quinquepartitam esse dice- rent, vel saltem quadripartitam: quinquepartitam, cum propositio et assumptio fuse probarentur: qua- dripartitam, cum vel propositio tantum, vel assump- tio.

134. In

134. In vniuersum quidem exornatio fit in utraque, rationibus afferendis, quibus veritas eius planius intelligatur (*περιγμάτων ή κατασκευῶν ἐπίρρωσιν* vocat Longinus) sed maxime oratione a rebus singularibus ad vniuersum genus transferenda, sive ut loquuntur artis magistri, ab hypothesi ad *thesin*, et *locum communem* (*τοπηγορίαν*, ut idem Longinus appellat,) in hoc maxime copia et ornatus in argumentando cernitur. Cic. Or. 14, 56.

135. *Thesin* et *locum communem* distinguunt Rethores quidam, Cicero Or. 36. Aphthonius, alii. In illa dicunt esse quaestionem infinitam et controuersiam, ut, *ducendine uxor sit, nec ne?* in qua tota saepe causa, quae quidem temporibus certis ac personis adstricta est, nititur, saepe ipsum est, in primis hodie, argumentum orationis: in loco communi esse sententiam aliquam de honestate vel turpitudine, vel alia tali re. Nobis, cum aliis, hac distinctione uti non placet. Versantur quidem ambo in re vniuersa, et sejuncta a personis, locis ac temporibus.

136. Huius generis cum alia exempla habemus in Cicerone, tum praeclara in Rosciana et Maniliiana. In illa epicherema hoc est: *Si etiam in leuibus peccatis causa maleficii requiritur ad credendum, multo magis in maximis: Atqui parricidium, cuius Roscio crimen intenditur, est longe maximum malum etc.* Propositionem fine exornatione dimisit, quae quidem sit ex hoc genere: tractauit tamen alio modo, conuertens in argumentationem a minori ad maius, et vim addens interrogando. In assumptione autem degres-

fus est ad locum coininuneim, de magnitudine maleficii in parricidio. Item in Manilianaee parte ultima haec est ratiocinatio: *in quo insunt omnes perfecti imperatoris virtutes, is est diligendus maxime. Sunt autem in Pompeio: est ergo diligendus.* In propositione transit ad thesin, de virtutibus optimi imperatoris: assumptionem alio modo exornat. Aliud exemplum est pro Archia de studiis literarum.

137. Tractatur autem thesis et locus communis, rationibus variis commemorandis, comparatione cum contrario, maiori et minori, similibusque, exemplis etiam afferendis, dictis, institutisque sapientum: et in his ipsis adhibendi breuiores exornationum modi, de quibus mox. In hoc igitur genere diligenter veterum more (v. Cic. Or. l. c.) Rhetor exercebit tirones. Ceterum parce hoc genere exornationis vtendum erit, vt omnibus, luculentain pulcritudinem habentibus, ne satietatem afferant.

138. Si loco communi vel thesi non vtemur, sed breuius defungi volemus, vtemur una et idem altera parte theseos tractandae, sed maxime μετρημω, h. e. totius in partes, et generis in species distributione, definitione, vt Cicero, cum acta Caesaris sublata ab Antonio Phil. I. diceret, comparatione, et oppositione, exemplis, similibusque.

139. Sed diligenter videndum est, ex quo genere sit altera epicherematis pars, assumptio. Nam si vniuersalis est, coininuneim habet cum propositione exornationem. Sed ubi v. g. ad certam personam pertinet, non agenda res est vniuersalibus, sed

sed factis; veluti Cicero fecit in Maniliana, cum demonstraret, in Pompeio esse omnia, quae esse deberent in perfecto imperatore. Bene Cicero Or. II. 85. erit explicandum in laude iustitiae, quid cum fide, quid cum aequabilitate, quid cum eiusmodi aliquo officio is, qui laudabitur, fecerit: itemque in ceteris res gestae ad cuiusque virtutis genus et vim, et nomen accommodabantur.

140. Exempli exornatio cernitur primo, in copia idonea delectorum factorum, consuetudinum, legum, dictorum: deinde in exemplis istis, ceterisque, sententiarum adiunctione iuuandis, et vrgendis: quod fit, ratione reddenda e natura rerum, cur ita fiat, factumque sit, vel e praceptis morum, cur ita fieri debeat, aut debuerit, vel potuerit. Hoc plerumque negligitur a dicentibus: sed in eo est et ornatus, et vis maxima in argumentando. Atque id etiam ad omnes exornationes pertinet, in quibus factis, dictis, similibusque vtimur. Exempla haec funto: Cic. pr. Quint. 16. docet, non statim ad praetorem currere, et possessionem bonorum Quintii petere debuisse Naeuium: vtitur in eo more bonorum virorum in tali re, sed cum exornatione tali, qualem diximus: Viri boni cum palam fraudantur, cum experiundi potestas non est, timide tamen et pedetentim istuc descendunt etc. Considerant enim, quid et quantum sit, bona alterius proscribere. Iugulare ciuem ne iure quidem quisquam bonus vult: *mauult enim commemorare, se, cum posset perdere, peperisse, quam, cum parcere potuerit, perdidisse.* Haec in homines alienissimos, denique inimicissi-

mos viri boni faciunt, et hominum existimationis, et communis humanitatis caussa: ut cum ipsis alteri nihil scientes incommodarint, nihil ipsis iure incommodi cadere possit. Milon. 4. Pudicitiam cum eriperet militi tribunus militaris in exercitu C. Marii, propinquus eius imperatoris interfactus est ab eo, cui vim afferebat: *Facere enim adolescens periculose, quam perpeti turpiter voluit.* Eleganter etiam exempla, praeferim ubi plura commemorata sunt, ad vniuersam thesin referuntur, vt fit v. c. pro Arch. II,

141. Sed in argumentationum tractatione non modo copia adhiberi debet, et ornatus, sed etiam *Varietas*, quae et similitudinis satietati occurrit, et suavitatem afferit, cum per se, tum, quia occultat artem, quam ut magis cognoscit, qui audit, ita magis contemnit.

142. Varietas illa duplex est: altera inest in modo explicandorum argumentorum, cum mox proponas, quid afferas, et caussis afferendis confirmes, mox inverso ordine progrediare, mox non proponas, sed ratione sola commenmoranda, quid proponendum fuerit, indices: altera in iisdem sententiis argumentisque varie conformandis, ut tanto facilius intelligantur, et altius descendant: quod fit partim, eadem sententia variis argumentationum modis complectanda, partim figuris, de quibus alio loco dicetur.

143. Non est autem difficile, ad intelligendum, quare exornatio, ita, vt descripsimus, facta, non modo ad intelligendum, id quod per se patet, sed etiam ad delectandum valeat plurimum.

Nam

Nam primum; ita natura comparatus est animus humanus, vt copia et varietate rerum capiatur, vix contentus sit, si nihil habeat, nisi quod necessitati sufficiat, nendum vt eo delectetur. Deinde vero, vt praecitate vidit Aristoteles Rhet. II. 11. ed. Sturm. animus humanus delectatur iis, quae vniuersaliter pronunciantur, praesertim si sint consentanea suis opinionibus, et in genere morum.

144. *Amplificatio* est grauior et fortior rei propositae affirmatio; habetque duas partes $\alphaὐξησιν$ et $\deltaινώσιν$: illa est in *augendo*, haec in *exaggerando*. Augere nihil aliud est, quam perspicuam ac prope sensibilem facere rei cuiusque magnitudinem. Igitur tota illa $\alphaὐξησις$ dicitur e locis magnitudinis, de quibus satis actum est supra, vt nihil hic necesse sit addere. Restat, vt de exaggeratione dicamus.


145. Est autem valde coniuncta cum $\alphaὐξησει$, quae certe genus quoddam, ac prope dicam praecipuum, est $\deltaινώσεως$: quippe ipsa rei magnitudo maxime mouet admirationem, laetitiam, amorem, gratiam, et his contrarios affectus: ceterum sunt etiam genera alia. Inprimisque valent plurimum definitiones condensatae, entyhematum. h. e. consequentium et contrariorum, dissimiliumque, denique exemplorum, similitudinumque frequentatio. Nam cum per se habent viam ad mouendum, tum vero illa ipsa congregatio et densitas conturbat magnitudinis multitudinisque specie animos v. Cic. Partit. c. 16.

146. Itaque recte praecipiunt, qui in omni exaggeratione, praesertim argumentationum, breuitate vtendum, nihilque nimis enucleandum cen-

E 5

fent.

sent. Nam breuia natura sua feriunt fortius: et efficacissima quaeque verborum multitudine, et diligentia enucleandi, velut aqua adfusa vinum, diluuntur et franguntur. Copia ad perspicuitatem et delectationem pertinet, ad mouendum breuitas.



C A P. X I L

De Sententiis.

147.

Quoniam ad argumentationes et concludendas, et exornandas utimur vniuerso pronunciatis et sententiis: de his separatiū agendum videtur, vt et fontes et genera, virtutes et vitia, usus denique sententiarum, cognoscantur planius.

148. Est igitur *sententia* pronunciatum de re infinita, siue vniuerso quodam rerum genere, quod quidem pertineat ad vitam, actionesque humanas, aut saltem sit cum humanis rebus aliquo modo coniunctum: nam in his rebus versari eloquentia solet: veluti ex priori genere, *credulares amor est: quem timent, oderunt: quem oderunt periisse expetunt: ex posteriori: gratiores Diis sunt, qui bonam mentem, quam qui mediatum carmen templis intulerint.*

149. Diuiduntur autem varie, primum sic, vt vel in abstracto, ut philosophi nostri loquuntur, siue infinite dicantur, vel in concreto, hoc est, finite, et ad personas, tempora, loca translate: illud genus Graeci

Graeci γνώμην vocant, eiusque sunt exempla, quae posuiimus, hoc νόημα. Veluti: *Nihil habet, Caesar, nec fortuna tua manus, quam ut possis: nec natura tua melius, quam ut velis seruare plurimos.* Distingui etiam possunt sic, ut aliae dicant, quid sit, aliae, quale sit. Ex priori genere est: *nemo ab omni parte beatus est: ex posteriori: res est solliciti plena timoris amor.*

150. Sunt porro sententiae vel *simplices* vel *compositae*: *simplices*, quae propter perspicuitatem et conuenientiam cum opinionibus vulgaribus hominum per se probantur, eamque ob causam simpliciter proferuntur, ut superiores illae: *Compositae*, in quibus est aliqua rationis adiectio: quae desideratur, cum aduersantur vulgaribus opinionibus, aut videntur aliquid habere vel obscuritatis, vel dubitationis. *Falsum est, ne quid nimis: nam improbos nimis odisse oportet.* In omni certamine qui opulentior est, etiam si accipit iniuriam, tamen, quia plus potest, facere videtur. *Nemo satis liber est: nam aut voluptati seruit, aut pecuniae, aut gloriae.* Melius est accipere iniurias, quam inferre: nam qui infert, haud dubie improbus, qui accipit, probus esse, vel videri solet: siue: nam inferentem oderunt, accipientis miserentur.

151. Sed tamen interdum, nulla tali necessitate postulante, addere licet rationem, propter suavitatem. Etenim sapientiae specie blanditur totum hoc, rationem reddere et cognoscere. Itaque, ut quisque puellus meliori est ingenio, ita crebrius rationes dictorum, factorumque requirit. Sed illud in hoc genere videndum est, ut ratio

ratio sit apta, noua, inopinata, exquisita, aut alia tali dote commendetur: quod cum fit, valde delectatur auditor, vel propter acumen, vel propter inexpectatum. Talia sunt. *Non decet homines immortales iras exercere, quia mortales ipsi sunt, Plus vigilia semper, nec somno deditus esto: nam diuturna quies vitiis alimenta ministrat.*

152. Huic porro composito generi plurimum virium et suavitatis accedit, e forma et quasi structura. Nam cum sententia cum ratione sit entymemata, tamen a specie entymematis auocari potest collocatione, cum ita intexitur sententiae ratio, ut ab eius veluti corpore vix distinguiatur. Sic pro illo: *non decet homines immortales iras exercere: nam mortales ipsi sunt, elegantius dices, vel sic: mortales non decet immortales inimicitias exercere, vel sic: Non decet, mortalis cum sis, vel mortalis qui sit, immortales inimicitias exercere. Simile est illud superius, in omni certamine, qui opulentior est etc.*

153. Distribuuntur etiam a nonnullis sententiae e modo, et quasi forma sua: cum alias dicunt fieri per interrogationem, alias per comparisonem, similitudinem etc. Sed haec distributio necessaria non est, neque absolute fieri potest, quippe nemo facile dicat, quot modis sententiae vel fieri, vel pronunciari possint.

154. Omnium autem maxime probatur et deletat genus illud sententiarum, quod fit e contrariis, aut saltem diversis. Illius generis sunt: *Auaro deest tam quod habet, quam quod non habet. Facere adolescentis probus periculose quam perpetitur piter maluit, ex hoc: Mors misera non est, aditus ad mortem miser est.*

155. Ex

155. Ex genere contrariorum illud est, quod enthyimema vocant, *κατ' εξοχήν*, ut Aristotelem philosophum, Homerum poëtam, Ciceronem oratorem, quia praeflantissimum genus. Nam proprie omnis sententia enthyimema: sed genus hoc pulcherrimum. Id est e contrariis cùm interrogatione. Huius generis haec exempla sunt: *Cur optas, quod habes? Cur, quem damnas, probas, quem probas, accusas? Seruare potui, perdere an possim rogas?*

156. Omnino sententiae fortius feriunt interrogacione conformatae. Bona sententia est: *non est seruus, qui mortem contemnit*: sed maiorem vim habet sic pronunciata, vt apud Euripidem: *τίς δὲ ξι δῆλος, τῷ Θανεῖν αὐτὸν φέοντις ὁν;* item illud Senecae: *non potest mori, qui potest cogi*: fortius feriet in oratione sic: *qui mori potest, quomodo cogi poterit?* item, *usque adeone mori miserum est?*

157. Haec de generibus sententiarum: sequitur *de virtutibus et vitiis*. Ac virtutes quidem fere ex dictis intelliguntur, sed sunt tamen quedam addenda. Sententiarum igitur virtus prima est *veritas*: nihil enim in dicendo probari potest, quamuis acutum videatur, cui falsa sententia suffit: eique contrarium vitium est, cum falsae sententiae sunt.

158. Altera virtus est *honestas*, eaque est in his, quae nec pietatem in Deum, hominesque, nec ullam partem morum bonorum laedunt. Nam quae contra sunt, et fidem dicenti detrahunt, et vel offendunt, vel corrupti audientes. Acutum

tum est et sublime specie: *Vixix rauſſa Diis placuit, ſed vičia Catoni:* ſed impium, adeoque nullo modo probandum.

159. Tertiā virtus *acumen* est: quod existit partim e materia, partim e forma ſententiae. E materia est, cum ſenſum habet reconditum et exquifitum, interioremque rerum naturam explicat, aut repugnantiae vel erroris ſpeciem habet: e forma, cum eſt e diuersis vel contrariis. In eo genere, cuius e materia acumen existit, vitanda eſt obscuritas et ſubtilitas nimia, ſuperansque captum popularem, quo nihil eſt vitiosius. Exempla vtriusque generis ſupra poſita reperientur. Obscuritatis exemplum in illo Pliniano eſt: *nam quidam etiam morbus eſt, per ſapientiam mori:*

160. Acutis contrariae ſunt *vulgares*, omnibus obuiæ. Quanquam hae non ſemper ſunt in vitio, ſed vbi alieno loco, et ad ostentationem inculcantur. Si utiles ſint, et aptae loco, recte ponentur, habebuntque delectationem prope parem acutis, vbi coimode verbis exprimentur: ſed de hoc in loco de elocutione.

161. Laudatur porro in ſententiis *nouitas*, cuius magna eſt in omnibus rebus gratia. In hoc genere autem etiam acumen indicat, et habet aliquid inopinati, quo et ipſo ſuauiter mouentur animi. Non probantur contra nimis tritae uſu, quamuis alioqui acutae, quae hoc ipſo, quod acutae ſunt, cum frequentantur, ſatietalem afferunt. Itaque his abſtinendum, niſi uſurpes loco, aut ſint eiusmodi, ut prouerbii viu habere poſſint. Poſſunt

sunt autem sententiae tritae eloquendo nouae fieri. Nam omnino non tam res nouae sunt, quam aut concipiendi rem quamque, et verbis exprimendi modus.

162. Quia proverbiorum mentio iniecta est, etiam haec sententiarum numero sunt, possuntque usurpari commode, sed hac lege, ut sint bene delecta, hoc est, aliquid acuminis habentia, nec nimis usu trita, utque non nimis frequententur. Cicero quidem vtitur proverbiis, sed valde raro, magisque in epistolis, quae imitantur quotidianum sermonem, atque dialogis, quam in orationibus. Itaque non bene magistri discipulis consulunt, qui adsuefaciunt, vulgatissimis proverbiis, veluti gemmulis, orationis omne genus distinguere.

163. Denique virtus est sententiarum, si sunt *sine fuso, et pigmento puerili*; nam hoc quoque in sententiis Crassi latitat Cicero Orat. II. 45. *Fusus* autem *et puerile pigmentum* est, si acumen sententiae non ducitur ab vera et interiori rerum natura, neque perspicuum, bonum, verum, reique aptum sensum habent ipsae, sed sunt in verborum lusu inani, et tenuibus inuentiunculis, ingenii specie blandientibus, quibus excussis nullus commodus sensus relinquitur, sed potius risus consequitur: in quod genus vitii facillime incident, qui, neque ab ingenio, neque ab lectione bonorum scriptorum, usque, instructi, nouas et acutas sententias, praesertim saepe, proferre conantur: quinquam etiam bonis ingenii accedit, ut Timaeo, quem Longinus dicit ὅπ' ἔρωτος τῷ ζένεις νοήτεις αὶ τοῖς πολλάκις ἐκπίπτειν εἰς τὸ πανδαιριώδεστα του.

Quin-

Quintil. VIII. 5. et Longinus de Subl. S. IV. V.
vbi sat exemplorum reperias. Veluti: *Alexander paucioribus annis subegit Asiam, quam panegyricam orationem de bello aduersus Persas gerendo scripsit Isocrates.*

164. Neque vero committendum, ut sententiae alicuius acumine et suavitate capti nimis ei inhaeremus, et repetendo inculcemus. In quo genere aetas illa vetus sententiarum studiosa saepe peccauit. Argumentis grauibus immorandum est, non sententiolis singulis acutis, delectationem magis, quam vim habentibus. Dulcia gustanda sunt, non large comedenda, si suavia esse velimus.

165. Illa quoque cautio est, ne sententiis vtantur saepe, qui non sint aut aetate prouectiores, aut usum habere videantur earum rerum, in quibus vtantur sententiis. Neque enim decet pueros gravitas sententiarum, praesertim earum, quibus seniorum vita moresque regantur: et immodestum est, sententias dicere, de rebus, quarum usum nullum habemus.

166. Luculentissimus usus est in exemplis, dictis, moribus adiuuandis, de quo supra, item, in rationibus, quibus argumenti capita fulciuntur. Veluti in hoc pro Milone, *Non est credibile Milonem tum voluisse Clodium interficere*, confirmando vtitur orator hac ratione, *quod comitiorum dies, et honoris amplissimi contentio subesset*. Huius rationem sic reddit: *Quo quidem tempore --- saepe fastidiunt*. Vides locum elegantissimum factum dupli sententia intexenda cf. §. 141.

167. Omni-



167. Omnium maxime non modo probamus, sed etiam admiramur sententias sublimes. Sed de his dicemus eo loco, quo de dicendi genere sublimi agemus.

168. Sed *usus sententiarum* multas et magnas cautiones habet. Inprimis non sunt crebro usurpande, sed modus adhibendus, quem bona, inter Graecos Latinosque, tempora servarunt. Inclinata demum eloquentia inuecta est illa sententiarum acutaru[m] frequentatio, quam in Seneca, Tacito, aliisque animaduertimus. Maxime autem hoc tenendum in sententiis valde acutis, quarum cito satietas venit. Aliud tamen dicendi genus crebriores fert alio: de quo suo loco dicetur.

169. Sententiarum bonarum copiam suppedabit Socraticorum philosophorum, Platonis et Xenophontis, Oratorum optimorum, Lysiae, Isocratis, Demothenis, Ciceronis, etiam historiorum Thucydidis, Xenophontis, Liuui, Sallustiique, neque non poetarum, Homeri in primis, et Euripidis lectio. Sed longe principes sunt Homerus, etiam hoc nomine fons ingeniorum recte appellatus, Thucydides, Plato, atque Xenophon: e quibus, id quod legendo comparandoque cognouimus, ceteri sua prope omnia in hoc genere haufere. Plenius etiam sententiis sunt Tacitus, Plinius yterque, Seneca et alii, sed caute, et non nisi ab iis legendi, qui iam superiorum illorum lectione ingenium ad iudicandum de sententiis acuerunt. Ceterum bona ingenia etiam sua sponte bonas et acutas sententias reperient. Sed in legendis istis, comparandisque maxime

Ernesti Initia.

F

pro-

profuerit, animaduertere, quomodo vna eademque sententia variata sit ingeniosis et oratione diversorum, vt semper noua videatur, nam hac animaduersione et comparatione paullatim ingenium adsuefiet sententiis reperiendis, variandis, et quasi nouandis.

CAP. XIII.

De Argumentationum Refutatione.

170.

Quia orator non modo in veritate demonstranda, sed etiam in falsis refellendis versari debet, est etiam huius rei ratio breuiter aprienda. *Refutatio* igitur fit in vniuersum duabus modis, vel *argumentatione contraria* (*αντιστολησιμων*, seu *αντιπαραστατων*) vel *argumentationis propositae reprehensione ac dissolutione* (*ενσαστων*.)

171. *Argumentatio contraria* est, cum contrarium eius, quod refellimus, ex iisdem locis, e quibus illud dictum est, colligimus: omninoque, cum assertur in contrariam partem, quod aut graius, aut aequa grava sit: quod facillime fit in rebus tantum probabilibus, in quibus semper aliquid etiam pro contrario dici potest. Sed omnium potentissima ratio est prior, quae fit *per inuersionem*. Talis est in Miloniana. Accusator usus erat hoc arguento: *Milo insidiatus est Clodio: oderat*

oderat enim Clodium. Cicero contra argumentatur: Non fecit Clodio insidias Milo odio impulsus: etenim odium Clodii fuit ei honorificum, et ad consequendum Consulatum opportunum. Non ducenda est uxor ne in orbitatem incidamus et lucrum: immo, ut orbitas vitetur, ducenda est uxor.

172. *Reprehensionis* autem duo modi sunt: *primus* est cum partis alicuius in argumentatione vitium demonstratur, vt, quod in ea inest, male sumtuum appareat: *alter*, cum conceditur sumptum, sed ex eo male aliquid conclusum ostenditur.

173. Nam vel quantitas propositionis reprehenditur, vt vocant Dialectici, cum de vniuerso aliquid pronunciatur, vel absolute & sine adjunctione: vel modus pronunciandi, cum aliquid vel necessarium, vel credibile, dicitur: haec enim genera ab oratore plurimum tractantur.

174. *Quantitatis* vitium in epicheremate et enthymemate intelligitur e Dialecticorum nostrorum praceptis, si partem aliquam generis non cadere ostendas, quod de toto genere praedicatur, similiterque in iis, quae absolute praedcantur, si doceas, quod pronuncietur, non intelligi e subiecti notione. Sed haec plerumque sunt subtiliora in intelligendo et explicando, quam pro oratoria popularitate. Itaque aliis fere rationibus Rethores vtuntur, veluti ex eodem loco, e contrario, simili etc.

175. Primum igitur, in argumentatione contraria, reprehendunt *ex eodem loco*,: vt in Milonianis:

niana: *Nefas est vivere qui interfecit ciuem Romanum:* reprehendit Cicero, vitium propositonis, ostendens ex eodem genere: *inimo licet impune occidere ciuem, cum aliis de causis, tum, si vim faciat.*

176. Alterum genus est *e contrario*, cum, quia contrarium non absolute, vniuersale, verum sit, nec hoc omnino verum arguiimus. Ut in hoc: *Vir iustus omnibus suum tribuit: contra dici potest: at iniustus non omnibus nocet.* Siue: *Vir bonus omnibus amicis, quantum potest, prodest, dissoluitur e contrario argumentando: at improbi non omnibus inimicis, quantum possunt, nocent.* Nempe hoc eo pertinet, ut appareat, non esse absolute et vniuersale verum, quod sumtum erat in argumentatione. A quo parum differt, *tertium* quod vocant *a simili*, in hunc modum: *Omnes, qui iniuriam acceperunt, oderunt eius auctorem.* *Falsum: nam non omnes, qui beneficium accepere, amant benefactorem.* Vtrumque enim est *e simili* genere.

177. Iam, quod pro necessario sumtum est, infirmabitur duobus modis. Nam cum necessarium quid sumitur esse euentu, ut posita aliqua causa, necessario aliquid consequatur, id refelletur, ostendendo, illa causa posita, non semper sequi effectum, quod optime exemplis docebitur: cum autem alicuius rei causa necessaria sumetur, id refelletur, si docebitur, etiam aliis ab causis tale quid existere posse, aut extitisse alicubi.

178. Probabile autem, quod sumitur, diluetur varie, pro genere vario rerum. Cum de probabili-

bilitate caussae, aut effectus quaeritur, fere eodem modo, quo in necessario, ut, istis caussis positis saepe omnia alia facta: velut in hoc: *non est probabile, eum, qui odio patri fuerit interfectorum patris esse, nam multi liberi parentibus odio fuere, neque tamen parricidae facti sunt.*: nimis multa incidere posse, quae euentum impedian, vt: *non probabile est, qui dignus honore sit, eum accipere propterea honorem a populo: nam populus non intelligit dignitatem, aut alias digniores putat, et est inconstans* etc. idem istud saepe longe aliis de causis factum: tanquam: *non probabile est, qui filium rus amandauit, odiisse filium: nam multi nullo odio duxi fecere, fecere cura rei familiares* etc.

179. In exemplo porro, quod sumtum est, reprehendetur recte, si contraria exempla protuleris: in quo videndum est, vt sint iis, quae prolata sunt, satis similia personis, locis, temporibus: et cum inductionis Dialecticae locum obtinebit, si ostenderis imperfectam esse enumerationem, aut annumeratum aliquid, quod dubium sit, quodque contra aliquid dici possit.

180. *Collatio* dissoluetur, si dissimile demonstraris, quo quis vtitur, ei, quocum contulerat, diuersumque genere, natura, vi, tempore ac loco, persona, magnitudine etc. vnde apparet, scilicet, idem de vtroque existimari non oportere.

181. Si autem conceditur, quod sumtum est, et male conclusum esse ostendimus, demonstrandum erit, quod sequi dicitur, aut omnino non,

aut non necessario cum eo, quod suuntum est, cohaerere: quod quibus modis fiat, demonstratur in Dialecticis. §. 171. conf. supra §. 178. 179.

182. Ceterum per se intelligitur, argumentationi contrariae et reprehensioni argumentorum communia esse, quae de exornandis, amplificandisque argumentationibus diximus.



PARTIS I.

SECT. II.

DE DISPOSITIONE,

hoc est

De partibus orationis, earumque natura, inuentione, et ordine.

183.

Inventionem delectus et dispositio sequitur. Nam nec omnibus, quae suppeditant, uno loco, vtendum est, nec, quibus velis vti, liberum est, sed quod maxime sit locis, temporibus, personis, caussisque accommodatum. Neque magis ordo rerum et quasi descriptio libera est, sed ad perspicuitatem, persuasionemque debet dirigi. Atque utriusque rei ac prudentiae pracepta dat pars Rhetorices ea, quae de dispositione dicitur,
hōc

hoc est, de partium orationis natura, collocatio-
ne et ordine.

184. Partes autem aliae necessariae sunt, sine
quibus oratio perspicua, et ad persuadendum apta
intelligi omnino non potest, eaque de caussa omni
orationi communes: aliae, non necessariae illae
quidem, sed tamen utiles, atque etiam nonnullis
causis propriae. E priori genere sunt *Propositio*
et *Confirmatio*. Nam, quid dicatur, et unde
rum intelligatur, sine eo quidem oratio esse non
potest. Ex altero genere est *exordium, narratio* et
peroratio. Nam etiam sine exordio oratio intel-
ligi potest, veluti Cicero pro Cquentio statim a
partitione orditur, quae est proponendi species,
ut paulo post videbimus: neque omnes caussae
aut narrationem, aut perorationem desiderant, in-
primis eam, quam maxime Rethores vocant, hoc
est, quae insit in affectibus cominouendis: quan-
doquidem non omnes res sunt hac natura, ut ad
cominouendum valere possint. Ceterum de omni-
bus praecipiendum breuiter videtur.

C A P. I.

De Exordio.

185.

Exordii finis est duplex: alter cognitionis, al-
ter cominendationis. Nam vel audientibus
aditum munit ad caussae cognitionem: unde *pri-*
ma quasi cognitio caussae Ciceroni dicitur: vel
dicen-

F 4



dicenti, atque adeo ipsi caussae, ad audientium animos: vnde ὁ δοκιμαστής ἐπιόντι oratori appellat Aristoteles: exordioque, benevolum, attentum, docilemque auditorem efficiendum praecipiunt: vel denique utrumque spectat. Vter finis maxime sequendus sit, res quaeque, tempus, locusque monentur.

186. Cum prior ille finis propositus est, materia exordii sumi debet ex ipsa caussa, et quidem ex uberrimo docendi argumento: veluti, si laudetur vir doctus, in eaque laudatione doctrinae maxime ratio habeatur, hinc ducatur exordium: si Princeps, ab ea laudis parte, quae est omnium maxima. In quo tamen videndum illud est, primo, ne tota res explicetur et consumatur, sed tantum delibetur, ut, quid maxime spectet orator, quid spectari, quo animum intendi velit, intelligatur: deinde, ne illud ipsum dicat ab initio, quod in argumento dicendum est. Atque hoc genus exordii hoc habet commodi, ut non commune videatur, quod est vitium in hoc genere, sed rei, de qua dicetur, proprium, faciatque etiam attentum auditorem: estque maxime conueniens orationibus, quales hodie, de argumentis e disciplina aliqua petitis, haberis solent.

187. Vbi autem orationi aditus ad animos auditorum queritur, exordium peti potest, primum *ex re*, et copiosissimo eius ad commouendum loco, si quidem erit eiusmodi, ut ad commouendum apta sit, veluti, si sit honesta, gloria, laeta, etc. vel contra: deinde, *a personis*, vel dicentis, vel audientis (in accusatione vel defensione etiam

etiam rei, vel aduersarii) sic, ut hi benevoli, et bene de dicente existimantes efficiantur; quod non tam fit rogando, praesertim formulis protritis, quae etiam rideri ex merito solent, quam modestiae, benevolentiae, prudentiae signis proferendis, atque aliis eiusmodi, quae facilius in singulis caussis cernuntur, quam praecipiendo traduntur: porro *e loco ac tempore*, quod genus interdum vehementer delectat, si prudenter et apte tractetur: sed in eo plus ingenii, et iudicandi vis valet, quam praecepta.

188. Omnino praecpta exordiorum reperiendorum nullo modo ita aut definite, aut plene, scribi possunt, vt totum hoc genus exhaustant: adeo varia et incerta est bene exordiendi ratio. Itaque aliquid ingenii felicitati est relinquendum. Iudicium modo adhibeat, ne, dum ingeniosi esse velimus, frigidi, ineptique simus: quod multis accidit, qui, praeter facultatem, in hoc genere arguti esse cupiunt. Proderit, inspicere diligenter exordia veterum oratorum, et, vnde ducta, quomodo inuenta, et cum causa coniuncta sint, considerare: ita paullatim ingenium ad inueniendum, certe ad iudicandum, acuetur.

189. Optimum genus exordii est, maximaque virtus, si ita est orationi, qua dicente, audientesque, locum item, tempusque, proprium, vt, primum, nulli alii conueniat, deinde, vnicuique de eadem re, eodem loco, dicturo in mentem venire debuisse videatur. Nam facilitas illa reperiendi, quae videtur audienti vel legenti, vt in aliis rebus, sic in hac, certissimum signum est simplicitatis,

quae vel maxime exordiis, omninoque naturae, conuenit, efficitque, ut non ab arte petitum, sed a natura ac re ipsa suggestum videatur.

190. Illa quoque virtus exordii est permagna, et cum priori illa valde coniuncta, si ita cum consequente oratione connexum est et copulatum, ut cohaerens cum omni corpore membrum esse videatur. Quod fit, non modo, si quasi proludat sententiis iis, quibus postea pugnandum sit, ut ante dictum, verum etiam si transitus ad ipsam orationem sit eiusmodi, ut vix animaduerti possit.

191. Vitiosa exordia sunt, si sunt *nimir longa*, nec ceterae orationis magnitudini apta: si *communia*, et multis argumentis et caussis accommodari possunt: aut *longe arcessita et nimir arguta*, ut, quomodo in mentem venerint dicenti, non intelligatur: simplicitas enim quaedam desideratur prope extemporalis: aut *nimir vulgaria et trita*, in quod vitium incidere solent, qui a personis, locis, temporibusque ducere instituunt. Et tanto facilius vitiosa exordia fiunt, quanto sunt, ipso Cicerone iudice, difficiliora.

C A P. II.

De Narratione.

192.

Exordio subiicitur, si quidem res et caussa desideret, *narratio*, cuius praecepta etiam in media oratione, item, in omni genere scribendi accidi-

dicendi, prodesse possint. Ponemus igitur narrandi praecepta, cum vniuersa et communia, tum propria narrationis eius, quae est fundamentum orationis vniuersae, aut, quae confirmationem maxime continet. Sunt enim tria genera narrandi: primum, in quo res vel gesta, vel vt gesta, exponitur simpliciter, vel scientiae, vel delectationis causa, quod genus proprium est historicorum et poëtarum: alterum, quo, vel confirmationis, vel amplificationis caussa, utimur: tertium, in quo caussa, siue fundamenta causae continentur, quod est illud ipsum, quo post exordium utimur.

193. Omnibus narrationibus communia sunt haec, vt sint primum *perspicuae et apertae*, deinde *breves*, et tamen *plenae et absolutae*, denique aliqua *suauitate teneant*, vel *audientes*, vel *legentes*: tertio generi proprium esse volunt hoc, vt habeat *probabilitatem*: quae tamen etiam in iis requiritur, in quibus res non gestae, vt gestae, traduntur.

194. *Perspicua* igitur erit narratio, si ex ea, quid, et quomodo actum sit, plane intelligi potest. Quod consequemur maxime duabus rebus, primum, si ordinem temporum et rerum conservabimus, et, vt quidque prius factum erit, ita priori loco ponemus: deinde, si nihil praetermittetur, quod ad rem pertineat, hoc est, sine quo, quale sit id, quod gestum est, iudicari non possit: quod est iudicii saepe non parui, et probe legendis bonis historicis subacti, hominisque intelligentis, quid cuiusque generis actiones constituant. Magnam etiam vim habet ad perspicuitatem

tem orationis genus: sed de eo in parte ea, quae de elocutione est, dicetur.

195. *Breuitas* narrandi tribus rebus tenetur maxime. Primum, si initium capiemus, unde necessse est, non ab ultimo incipiems: deinde, si non longius progrediemur, quam necessitas posstulet: quae necessitas in utroque genere aestimatur consilio narrandi: tertio, si delectum seruamus partium, quibus res constat: cuius haec ratio est, vt, quae sua sponte intelligi, vel per se, vel ex eo, quod dictum est, aut dicetur post, facile possint, aut nihil prosint ad consilium narrandi, omittamus. Haec, qui in narrando fecutus fuerit, eum breuem esse recte dicemus. Sed haec praecepta pertinent ad breuitatem in rebus: de verborum breuitate alio loco praecipietur.

196. Sed in hoc magna cautio est, primum, ne id; quod plerisque accidit, breuitatem narrationis vniuersae aestimemus frequentia interpunktorum et breuitate membrorum, in qua plerumque est inanis potius breuitatis simulatio, quam vera breuitas: quae duo, qui discernere non possunt, saepe brevia esse putant, quae verboſiflma sunt, verbosa, quae brevia sunt. Sed de hoc peculiari loco accurate dicemus. Altera cautio est, ne breuitatis affectatione, narratio fiat vel obscura, vel imperfecta. Nam breuitate potior est perspicuitas et absolutio narrationis.

197. *Suavitatis* in narrando non uno modo tenetur. Etenim non unum genus est narrationum. Alias narrare vel placet, vel conuenit, simpliciter, alias instructe et ornata. *Simplex nar-*



narratio est, cum nihil aliud quaeritur, nisi, vt, quid gestum sit, appareat: quo genere vtuntur scriptores commentariorum, et oratores in narratione ea, quae exordio subiicitur, cum res per se est satis valida: *instructa* est, quae firmatur et illustratur adiectione caussarum, communis illa oratoribus et historicis, quos pragmaticos vocamus: *ornata* denique, apta ad confirmandum, quae amplificatione et exaggeratione robatur et illuminatur.

198. Simplici narrationi suauitas conciliari debet priuum ea, quam Graeci $\alpha\Phi\epsilon\lambda\epsilon\sigma\alpha\tau$ vocant, quaeque laudatur in Caesare et Nepote: deinde urbanitate quadam et venustate; non ea, quae sit in singulis verbis, aut sententiis, quae ornatus potius est, quam huius simplicitatis, sed, quae sit per totam orationem fusa, facilius sentienda illa, quam praeceptis explicanda, eademque ad intelligendum, et ad consequendum, difficillima. Intelligi quidem et sentiri haud facile, patet ex eo, quod Caesaris commentariis pauci suauiter afficiuntur, quibus nihil suauius est iis, qui hanc urbanitatem gustare poslunt: difficillimum autem esse, eam adsequi, et res, et usus, et confessio magistrorum docet, vt infra, vbi de tenui genere dicendi agemus, docebimus. Addi vero etiam huic generi narrationis potest suauitas, adspergendas sententiis, sed hac lege, vt non sint exquisitae, et raro interponantur. De suauitate e probabilitate mox.

199. *Instructa* narratio, et per se, et huius etiam suauitatis causa, desiderat non modo urbanitatem illam,

illam, verum etiam lumina quaedam sententiarum. Earum duo genera sunt: alterum est earum, quibus ratio alicuius facti, dicti, decreti, certe redditur paucis verbis, e natura rerum, animi, morumque humanorum: de quo genere supra dictum est: alterum est earum, quibus status et conditio hominum, motusue animi, quo quis in agendo, patiendo, videndo, audiendo, fuit, breuiter exprimitur, et quasi pingitur, reflexiones vocent Francogalli: quo genere mirificus ornatus, et magna suauitas narrationi accedit, quod iis morata efficitur narratio. Vtrumque genus est in hoc vno Liuiano I, 25. *Confederant utrinque pro castris duo exercitus, periculi magis praesentis, quam curae expertes: quippe imperium agebatur, in paucorum manibus positum.* Omnino totus ille locus exemplum pulcherrimum talis narrationis praebet. Quanquam pleni sunt talibus narrationibus Liuius, Sallustius, Tacitus: multae etiam sunt apud Ciceronem. Addi his poterunt ea, quae supra de exornatione exemplorum dicta sunt.

200. *Ornata* denique narratio est, cuius partes dilatantur et exaggerantur argumentationibus, digressionibus, moribus exprimendis, sermonibus ipsis imitandis, variis denique affectuum generibus commouendis: quo genere plena sunt Verrinae Ciceronis, Philippica secunda. Huiusmodi narratio non modo ad delectandum suavis est, sed etiam ad persundendum grauis.

201. Probabilitas narrationis existit ex eo, si omnia narrantur ad ingenia, moresque personarum,

rum, tempora et loca, omninoque naturam cuiusque rei, et opiniones hominum de quaque re, accommodate: vnde, etiam moratam esse debere narrationem, praecipiunt.

202. In narrationibus autem iis, quibus tota oratio inniti debet, videndum est vel maxime, primum, ut in iis omnium prope argumentorum, certe praecipuorum, elementa, et quasi semina spargantur: deinde, ut, quae obesse possint caussae, vel praetermittantur, si quidem salua probabilitate fieri possit, vel leuiter tantum tangantur, et verbis lenioribus exprimantur: quae contra profunditatem causae, verbis lectissimis et grauissimis, adiuuenturque etiam caussarum adiectionibus. Quorum omnium, ita ut vniuersae narrationis pulcherissimae, perfectum exemplum est in Miloniana Ciceronis.

C A P. III.

De Propositione et Partitione.

203.

Sequitur, ut, de quo oratio futura sit, exponatur: quod fit, vel propositione, vel partitione, vel utraque simul. *Propositio* nihil aliud est, nisi quaestio, siue id, de quo querendum videtur: estque duplex, vel *finita*, vel *infinita*. *Finita* est, cum ad certas personas, tempora, et loca pertinet, quam et *causam* vocant: cuiusmodi fere sunt,
quaes

quae ad tria illa genera caussarum, sed in primis deliberatiuum, et iudiciale pertinent; nam in demonstratio sunt etiam quaestiones infinitae: *infinita*, quae ad genus aliquod vniuersum, et *res* dicitur.

204. Est porro omnis quaestio *infinita* vel *cognitionis*, vel *actionis*. *Cognitionis* est, cuius finis est scientia: habetque tria genera. Nam vel *an sit*, vel *quid sit*, vel *quale sit*, quaeritur. Primum genus non modo complectitur ea, in quibus quaeritur, vtrum aliquid sit, vel fuerit, veluti, *an sit Deus*, verum etiam, vnde aliquid ortum sit, veluti, *ius vtrum natura sit*, *an opinione: immortalis animus sit natura an voluntate diuina*: et quibus caussis efficiatur, vt, *quibus rebus felix fieri possit*. In altero genere vel *notio* rei quaeritur, vel *proprietas*, vel *diuisio*, vel *partitio*, vel *descriptio*. *Notionis* est: *an sit felicitas in tranquillitate animi*: proprietatis: *an per solam fidem salus deatur*: diuisionis: *Vnum genus fit bonorum an plura*: partitionis: *an duae hominis partes sint*: descriptionis denique: *qualis fit iustus, liberalis*: et in quibuscumque natura rerum explicatur. In tertio genere, vel simpliciter quaeritur, vt, *an diuitiae sint expetendae*: idque genus ad omnes res expetendas, fugiendasque, honestas, turpes, aequas, iniquasque pertinet: vel comparate, veluti, *quid inter sit inter veram, fidamque virtutem: doctrina an virtus potior sit*.

205. Quaestiones *actionis* pertinent ad officium, et animi modum vel sedandum, vel exercitandum. In genere priori sunt quaestiones huius-

SBNQ

ius modi: accedendum sit ad rem publicam: licetne viciisci iniurias etc. Posterioris est, cum cohortamur, ad res gerendas, gloriam, laudemque, vel contra.

206. Iam, non est dubitandum, quin eloquentia inuenta sit maxime propter quaestiones finitas, ut suaderetur aliquid, vel dissuaderetur, accusaretur aliquis, vel defendetur: in talibusque quaestionebus fere consumi videmus veterum orationes. Quaestiones vniuersae, Philosophis ante relictæ, cooperunt deinde et ab oratoribus tractari, vel ostendandi ingenii, vel eloquentiae causa, nunc maxime tractantur, postquam eloquentia prope tota e foro et curiis discessit.

207. Illud quoque fatendum est, quaestiones finitas etiam sua natura esse eloquentiae magis proprias, in iisque multo magis, quam in vniuersis, eloquentiam posse viam suam explicare, in primis, qua motus animorum vel incitandos, vel reprimendos: vniuersas autem subtilitati philosophorum aptiores, quam copiae et ornatui oratorum. Sed tamen et in hoc posteriori genere sunt permulta, de quibus copiose ornateque dici possit.

208. Illud certe, qui in hoc posteriori volent versari, meminisse debebunt, non omnes quaestiones vniuersas posse oratorie tractari: sed esse, quarum subtilitas et tenuitas sit tanta, ut scholis doctorum sint relinquendae, totumque adeo hoc genus assumi quidem ab oratore posse, sed ita, ut certis ac definitis regionibus circumscribatur. Itaque non nullae tales quaestiones plane erunt

Ernesti Initia.

G

ab

ab orationis dictione remouendae, vt, quae fit figura terrae, quae natura spiritus, et similes: quae nullo modo capiunt, neque popularitatem et perspicuitatem oratoria, neque copiam, ornatumque eloquentiae. Ceterae tractabuntur illae quidem ab oratore, sed ita, vt subtilitas argumentandi, et tenuitas, seriesque differendi dialectica, et ieuxna atque exsanguis concertatio verborum, remoueatur. Vid. Cicero de Orat. II, 16.

209. Sunt, qui praecipient, proposita quaestione, atque etiam parte aliqua orationis, esse verbum illud, quod maxime rem caussamque contineat, breuiter perspicueque definiendum. Id, cum in caussis finitis perquam puerile visum sit, nec iniuria, Antonio, ap. Cicer. Orat. II, 25. non omnino improbandum in vniuersis, quae maxime ad docendum pertinent. Sed erit tamen primum haec moderatio necessaria, ne definiamus ea, quorum notio quaedam, sufficiens rei, quam tractamus, cognoscendae, impressa fit in audientium animis: veluti, quid sit lex, cogitatio, scientia, etc. quae res plerumque definiendo fiunt obscurae: deinde vero haec ratio sequenda, ne definiamus tenuiter nimis atque subtiliter: quod tales definitiones non possunt intrare in mentes, sensuque audientium, multoque ante praeterlabuntur, quam percipi possint.

210. *Partitio* est enumeratio earum rerum, de quibus futura est oratio, quasque tenere volumus auditorem, vt, iis explicatis, intelligat peroratum fore. Eius autem virtutes faciunt tres: primam *breuitatem*, vt verbis quam paucissimis vtatur, quo faci-

facilius teneat auditor: alteram *perfectionem*, vt omnia, quae rem continent, complectatur, neque partem necessariam ad eam intelligendam omittat: tertiam *paucitatem*: quae tenetur, primum, si formas non permisceimus cum generibus: veluti, si quis dicat, *se demonstraturum, deberi Deo primum amorem, deinde gratum animum, denique obedientiam*, forinam admisceat generibus: nam amoris species est *gratus animus*: deinde, si non plura, quam sufficientia, dicimus nos demonstraturos: in quo peccauit, qui dixit *se demonstratum, aliquem quid facere potuisse, voluisse, fecisse*: nam *fecisse* fatis est: non Cicero in Quintiana, cap. 10. cuindicit, *se ostensurum, causam possessionis pertendae non fuisse, ex editio possidere non potuisse, non possedisse*: nam illud iuris est, hoc facti.

211. Ceterum non una ratio est partiendi: neque verbum partitionis nimis dialectice capiendum. Nam non semper totum, quod proprius dicitur, in oratione partimur. Est igitur ratio partiendi, cum genus aliquod in suas species distribuimus, aut totius, ac veluti summae, partes enumeramus, quod proprie Dialectici partiri ac diuidere vocant: veluti, si dicamus, *felicitatis publicae esse securitatem, dignitatem, abundantiam. Caussas publicorum malorum esse luxuriam, auaritiam, audaciam, etc. Pietas in Deum esse, primum nosse Deum, deinde amare, reuereri, confidere et obedire*. Alia ratio est, cum argumentorum summorum capita recensemus, quibus quaestio continetur. Veluti Cicero l. c. fecit. Nam ista tria, quae diximus, sunt argumenta, quibus de-

monstrat, Naeuum bona Quintii ex edicto praetoris non possedisse. Alia, cum adiuncta et attributa rerum ponimus: veluti, *utilitatem, honestatem* etc. item, cum caussas et effectus, caussas et attributa: tanquam, cum, *primum officii alicuius caussas, drinde magnitudinem*, nos demonstraturos dicimus: omninoque ad modum distribuendarum quaestioneerum cognitionis: *an sit, quid sit, et quale sit*, vt aut duas ex his partes ponamus, aut tres, prout consilium quoque tempore postulat, et rei cuiusque natura.

212. Neque vero semper partitio certa quadam lege tali potest, aut debet fieri: sed videndum, quid dici debeat, idque ad quae capita possit debeatque referri. Qualis est illa, quam Cicero (Inu. I, 23.) laudat Terentiani senis distributio, ea quae dicturus est, tali partitione proponentis: *eo patro et gnati vitam, et consilium meum cognosces, et quid facere in hac re te velim.*

213. Sunt etiam non nullae res ita simplices, vt partitio nulla sit: quod tamen raro accidit: in quibus stultum sit, partitione vti velle. Veluti Cicero in orationibus, post redditum ad populum, in senatuque dictis, nulla partitione usus est. Huc referunt quidam non admmodum bene, vt ex ante dictis patet, propositiones eas, quae nihil, nisi argumentorum confirmationem desiderant. Sed sunt etiam alia argumenta dicendi, in quibus partitio diserta neque est, neque commode ponitur, veluti cum laudamus aliquem per tempora, vt Plinius in Panegyrico fecit.

214.



214. Est porro partitio aliquando sine propositione, quae quidem a partitione seiuincta sit: nam alioqui etiam partitio apud veteres propositionis nomine venit, dicimusque etiam per partitionem proponere: veluti Cicero in Maniliana fecit, cap. 2., vbi post breuem narrationem, ex qua vniuersa cauſſa intelligatur, statim partitione vtitur: *primum mihi videtur de genere belli, deinde de magnitudine, tum de imperatore diligendo esse dicendum.*

C A P. IV.

De Confirmatione et Refutatione.

215.

Confirmatio inest in argumentis. Et fontes quidem argumentorum in quoque genere cauſſarum indicati sunt supra. Quibus argumentationibus oratori vtendum sit, eaeque quoimodo exornari amplificarique debeant, id ipsum quoque docuimus. Restat, vt de delectu, vſu, et dispositione argumentorum dicamus.

216. Non igitur omnibus, quae in promptu sunt, argumentis vtendum promiscue. In delectu autem hoc videndum, vt sint primum *firma*, deinde, vt *perspicua et popularia*: neque enim firmitas sine populari perspicuitate proſit, neque haec sine illa. Sed firmiffima argumēta ſunt necessaria, in quibus ſcilicet aut materia necessaria ſit, aut connexio. Minus firma ſunt probabilia: ſed be-

G 3

ne

ne tractata vim necessariorum assequuntur, interdumque plus valent necessariis. Vbi necessaria argumenta non erunt, probabilibus erimus contenti.

217. Argumenta popularia sunt, quae captui concionis sunt accommodata, et capiunt orationem copiam. Itaque abstinebimus ab argumentis, quamuis bonis, si sint ita subtilia, ut non nisi ab eruditis intelligi, aut tractando splendorem accipere non possint. Idque maxime videndum est in quaestione infinitis et cognitionis, in quibus facile in vitium subtilitatis incident homines, in primis philosophicis disputationibus adfueri, et in his magis, quain oratoribus legendis, exercitati.

218. Videndum etiam est, ut argumenta afferramus ea, quae opinionibus, sensibus, et moribus auditorum maxime conueniant. Nam quae sunt ex eo genere, etiam ubi per se minus firma sunt, firmitatem ex auditoris animo accipiunt, ac plerumque plus valent quam firmissima ex altero. Idque fit non modo propterea, quod suas quisque opiniones moresque amat, eique fuit natura, qui eadem sentit, sed etiam hac de causa, quod facilius quisque assequitur ea, quae a suis opinib; ac sensibus non abhorrent.

219. Cauendum autem maxime, ne in rebus per se claris, argumentis utimur, praesertim subtilibus: quod in Philosophis reprehendit Aristoteles, quorum non nullos, ait, in conclusionibus saepe ponere res notiores, et probabiliores, quam insuntis. Est enim ineptum et frigidum, valetque magis

magis ad obscurandum, quam ad illustrandum.
Quorum utrumque est inimicum persuasioni, quae
argumentis quaeritur.

220. Neque vero in congerendis argumentis
modus excedendus est. Nam multitudo nimia
argumentorum onerat audientem, assertque tae-
dium, quod persuasioni aduersatur maxime. Quid?
quod etiam suspectam rem facit auditori, qui vix
confidit iis, quibus orator ipse videtur diffidere,
cum nimis aceruandis argumentis laborare existi-
metur.

221. Post delectum argumentorum videndum,
quomodo quoque utamur. Ac prium argu-
menta alia adiuanda sunt, ut eorum vis percipia-
tur, ut supra demonstratum est, alia nude prope
ponenda. Adiuuanda sunt firmissima quaeque,
quibusque maxime confidimus, eo modo, ut suo
loco praecipimus. Quae minus firma sunt, breui-
ter proferri debebunt, ne tractandi diligentia im-
becillitas aperiatur: sed non singula, verum con-
ferta et densa, ut se inuicem sustineant, et sin-
gula ceteris roborentur. Ita cauabunt lapidem,
non vi, sed saepe cadendo. Bene Quintilianus
V, 12. *Si non possunt valere, quia magna sunt,*
valebunt, quia multa sunt - - ut si quis he-
reditatis gratia hominem occidisse dicatur: here-
ditatem sperabas, et magnam hereditatem, et
pauper eras, et tum maxime a creditoribus ap-
pellabar, et offenderas, cuius heres eras, et
mutaturum tabulas sciebas. Singula leuia sunt
et communia: uniuersa vero nocent, etiam si non

G 4

ut

vt fulmine, tamen ut grandine. Multa sunt eius generis loca apud Ciceronem.

222. Ordo denique argumentorum, et si non certa quadam lege continetur, neque necessarium est, quod nonnullis visum, imitari aciem Homericam (*Iliad. d. 297.*) ut a firmis incipiamus, et in firmis desinamus, leuia in medium coniiciamus: illud tamen videndum est, ne in leuissimis, praesertim separatis positis, desinamus. Nam ultima prope maxime animaduertuntur. Itaque eorum imbecillitas detrahet firmitati superiorum. Similiterque primum debet esse forte, quia initia rerum, et aditus, maxime expectantur, et animaduertuntur, recenti adhuc attentione, et cognoscendi studio.

223. Necessitatem tamen quandam afferent duo: primum auditorum captus, iudicium, auresque: nam iis argumentis, quae ipsorum opinionibus, moribusque conueniunt, aditus parandus ceteris: et priori loco ponenda, quae perspicuitatem affundant, et vim addant aliis: deinde argumentorum coniungendorum opportunitas. Nam ut quodque facilis coabit cum alio, ut facilior erit ab alio ad illud transitus, ita magis coniungentur. Ita, velut unius corporis membra, inter se cohaerebunt omnia cum venustate. Satis de confirmatione: ad refutationem veniamus.

224. Est autem refutatio duplex. Nam vel refelluntur ea, quae in contrariam partem dicta sunt, vel quae contra nostram sententiam dici posse videantur. Sed utriusque generis similis tractatio est. Alia porro refutatio, in qua tota oratio versatur, ut in defendendo eo, qui accusatus

tus est, omninoque in falsis opinionibus oppugnandis: ex quo genere est Ciceronis oratio pro Murena, et aliae: alia, quae est pars orationis, de qua hic proprius est locus praecipiendi. Ceterumque eadem praecepta habent.

225. Et singula quidem argumenta, quomodo reprehendantur, item, unde argumenta contraria petantur, dictum est aliis locis: quae vniuersam refutationem attingunt, hic addenda videntur. Iam primum, quod attinet ad argumenta contraria, quibus in refellendo utimur, omnia tenenda sunt ea, quae de argumentorum delectu, usu atque ordine, in confirmando, diximus. Nam talia argumenta efficiunt nihil aliud, quam confirmationem contrariae sententiae.

226. Quod autem ad reprehensionem argumentorum aduersarii spectat, in iis, sicut in tota refutatione, ordo seruandus est is, quem aduersarius secutus est: ne quid praetermittere velle videatur, utque hoc magis appareat, nullius argumenti vim timeri, omnia dilui.

227. Quod si refutatio constat ex argumentis contrariis, et argumentorum allatorum dissolutione, initium fiet a dissolutione, subiicientur argumenta pro contraria sententia: quod Ciceronem semper tenuisse videmus.

228. In argumentis autem iis, quae densitate et congregatiōne valent, frangendis, ratio adhibebitur haec, ut distrahitur, separatimque excutiantur: ita leuitate singulorum perspecta, etiam vniuersa diluentur.

229. Vbi porro refutatio occupabitur in iis, quae contra dici posse videantur, cauendum erit, ne futilia nimis, ac leuia fingamus, committamusque, vt nobis fauere nimis videamur: facit enim suspectum oratorem et caussam. Quintilianus quidem eum, qui pro diuersa parte aliquid acute exco-gitarit, non minus laudari vult, quam qui pro sua parte.

C A P. V.

De Peroratione.

230.

Perorationis, quae est orationis conclusio, Graeci $\epsilon\pi\acute{\iota}\lambda\circ\gamma\circ\eta\circ\nu$ vocant, si quidem perfecta est, duae partes sunt: altera rerum breuis repetitio, $\alpha\circ\alpha\chi\circ\varphi\circ\alpha\lambda\circ\alpha\omega\tau\circ\iota\circ\varsigma$: altera affectuum commotio. Prior pars et memoriae seruit, et vim dictis addit. Nam facilius tenentur, quae breuiter et uno loco, quam quae late dicuntur, et locis distrahabuntur. Atque, vt argumenta etiam leuia, si confertim proferantur, ab ipsa densitate vim accipiunt, sic multo magis fortia in angustum coacta, praesertim, vbi ante amplificatione roborata fuerint, valebunt. Neque solum in fine totius orationis, sed etiam in fine singularium partium, talis repetitio proderit.

231. Habet tamen haec ratio non unam cautionem. Nam primo abstinendum est ab hac repetitione, si res tractata breuis, simplexque sit, ne

ne diffidere memoriae audientium videamur, praesertim si sint docti et prudentes viri: deinde videndum, ne sit longior, alteriusque orationis speciem habeat. Nec nude semper ponenda est, sed aliqua apta sententia et graui excitanda, quam locus, tempus personae facile subiicient, denique etiam figuris varianda. Licebit interrogare, vel auditores, vel aduersarios, quid desiderent amplius, et deinde enumerationem subiicere, quid responderi dictis possit, et ad respondendum pronocare, ut in Agraria prima fecit Cicero, dubitare, an aliquid praetermisserimus, etc. Atque haec ratio ~~αναφαλσιων~~ per figuram aliquam tractandi habet etiam hoc commodi, quod ita apte colligatur cum parte altera.

232. Sed multo illustrior est altera pars παθητική. In qua primum videndum est, an locum habeat, sitque in potestate nostra. Neque enim omne argumentum capit affectus, neque cuiusuis est, in affectibus concitandis recte et cum effectu versari. Ac primum quidem stultum et ridiculum sit in rebus tenuibus, in quaestionibus cognitio-
nis subtilioribus, quae totae ad intelligendum per-
tinent, affectus concitare velle, praesertim vehe-
mentiores. Itaque in talibus ab hac parte absti-
nebiimus. Eius autem loco licebit commendare
res traditas audientium studiis, dignitatis utilitatif-
ue commemoratione. Est etiam, cum promit-
tendo officio, grato animo, benevolentia, studio-
que nostro, finiri potest, velut in gratiis agendis,
gratulando, et aliis eiusmodi generibus.

233.

233. Iam porro non omnes sunt hoc ingenio et hac natura, vt grauiter vehementerque possint dicere, vt ex iis patet, quae sectione superiori cap. VIII. diximus. Requiritur etiam certus vocis sonus, latera, vires, corporis quidam gestus ac motus, quibus sustinere et adiuuare orationem, per se idoneam commouendis animis, possumus. His igitur qui carebunt, rectius ab hac parte abstinebunt, omninoque a vehementiori gene-re dicendi.

234. Qui deinde affectus vel concitandi, vel reprimendi sint, facile intelligetur, si rei caussae, de qua dictum est, naturam, et personarum, quas in dicendo tractauimus, conditionem, mores, facta examinabimus: neque ea res paeceptis vide-tur indigere. Quis enim non intelligat, v. g. si de iniuria atroci, ac facinore actum sit, indignationem, inuidiam, odium; si de beneficio, laeti-tiam, amorem benefactoris commoueri debe-re, etc.

235. In modo autem animorum, vel incitan-dorum, vel flectendorum, duo spectanda sunt, primum argumenta et sententiae, deinde eorum tractatio. Argumenta quidem et sententiae unde et quomodo ducantur, dictum est loco eo, quem modo indicauimus. Eorum autem tractatio tria desiderat, primum amplificationem, siue extenua-tionem, et exaggerationem, de qua ipsa diximus satis: deinde figuram quasdam et quasi gestus ora-tionis, quales sunt interrogatio, exclamatio, apo-strophe, prosopopoeia, hypotyposis, aliaeque, de quibus Parte altera dicemus: denique actionem et vocem,

enio
sint
cap.
fo-
ac
tio-
offi-
par.
ne-
re-
ue,
nas
fa-
de-
si
na-
tri-
pe-
in-
m
de-
m
ia
a-
is
a-
o-
et
,

vocem, quae adspectu, vel auditu, incendat, vel placet auditorem. Sed praeter naturae opportunitatem hic plurimum profuerit lectio Demosthenis atque Ciceronis, qui in hoc genere potentissimi fuerunt.

PARTIS I.
SECTIO III.
DE INVENTIONE
SPECIALI.

236.

Satis dictum esset de Inuentione, si antiquorum optimorumque Rhetorum rationem et consuetudinem sequi vellemus. Sed tarditas hominum fecit, ut necessarium videretur etiam docere, quomodo, quae de inuentione omni ac dispositione praecepta sunt, accommodarentur singulis generibus orationum atque etiam epistolarum, qua via inueniretur materia orationibus, quibus vel nuptias, vel nouos honores, vel imperium suscepimus, gratularemur, quibus laudaremus mortuos, consolaremur, deploraremus, gratias ageremus, et simili aliquo officio, vel nostro, vel aliorum nomine, fungaremur. Huius generis praecipiendi exempla nulla habent Aristoteles, Cicero, Quintilianus, aliique: sed Dionysius Halicarnassensis in *Tέχνη*, ad epistolas pertinentia Pseudo Demetrius *περὶ ἐγκυρίας* §. 231 seqq. Atque fortasse etiam hoc nomi-

nomine proderit ista praeceptio, ut tirones omnia ista genera referre discant ad genera cauſarum, quae explicata sunt, atque inde materialm dicendi petere. Dicemus igitur primum de epistolis, quae sunt veluti compendia iustarum orationum: deinde de praecepis orationum generibus.



C A P. I.

De Epistolis.

237.

Epistolae inuentae sunt, vt cum absentibus colloqui possemus. Sed maxime duabus de causis scribuntur: quarum una est, vt certiores faciamus, si quid accidit, quod ipsorum intersit scire: altera, vt sensum animumque nostrum absentibus aperiamus.

238. Primum igitur genus epistolarum versatur in narrando, idque simplex est et vnum: alterum autem quod habet significationem sensus, animi voluntatisque nostrae, est multiplex et varium. Nam aut, quemadmodum sumus erga aliquem affecti significat, siue vniuerse, siue in vtraque eius fortuna, omnibusque temporibus, aut, quid velimus ab eo fieri, declarat. Ex primo genere sunt epistolae eae, quibus amorem, benevolentiam, obseruantiam, indignationem, iram significamus, quibus gratulamur, consolamur, gratias agimus: ex altero, quibus petimus aliquid, vel nobis, vel aliis, suademus, aut dissuademus. Nam quae

quia sunt e duobus generibus mixtae, ea propria formam non habent.

239. Est etiam genus epistolarum inter doctos homines visitatum, de aliquo capite doctrinae, item, de parte aliqua officii, de rebusque agendis, quales sunt Platonis quaedam, Demosthenis, Isocratis ad Philippum et aliae. Sed illas disputationes rectius, has orationes, quam epistolas, voces. Itaque utrumque genus praecelta scribendarum epistolarum non attingunt.

240. Neque epistolarum, quae proprie vocantur, primum genus, quod narratione constat, praecelta propria habet, sed totum continetur iis, quae de narrandi ratione ac modo supra (Sect. II. cap. 2.) diximus. Relinquitur igitur, ut praecipiamus de altero genere, quod sensus nostri, animi voluntatisque significationem habet.

241. Eius autem generis pleraque formae, ut nobis videtur, duobus praceptis continentur: quorum primum hoc sit, *ut rem et summam epistolae grani aliqua venustaque sententia proponamus*: alterum, *ut rei propositae fidem faciamus*. Ad haec duo, quicquid est elegantissimarum Ciceronis, qui in hoc quoque genere scribendi princeps recte ponitur, epistolarum conformatum reperiet, qui attenderit: haec qui tenuerit, is facilime, et quid scribat reperiet, et consequetur, quod volet. Sed pressius utrumque praecptum est enucleandum.

242. Quod igitur primum dixi, summam epistolae esse venusta aliqua et graui sententia proponendam: id hanc viam habet, ut eum sensum, volun-

voluntatem, quam significare volumus, exprimamus ita, ut hoc ipso, primum, fiat probabile, quod dicimus, deinde magnitudo affectionis et voluntatis appareat, denique aliqua aliqua ingenii opinio existat.

243. Nempe, scribentibus tales epistolas, quibus amorein, benevolentiam, gratum animum et similia declarant, idem finis est, qui dicentibus, hoc est, persuasio. Itaque huc tota scribendi ratio dirigi debet. Sed omnis talis animi affectio, motus, voluntas, se prodit sua sponte verbis suis et sententiis: quae vbi reperientur, non dubitabitur, quin animus iis conuenienter sit affectus. Magnitudo autem affectionis et voluntatis exprimi debet non modo illam ipsam ob causam, ut credibilis sit oratio, sed etiam ut et ad benevolentiam conciliandam, et ad impetrandum, quod volumus, efficacior.

244. Venustas denique requiritur, primum, quia adiuuat fidein; facilius enim capiunt animum legentis, quae venustate quadam commendantur: deinde, quia in epistolis scribendis tali bus, praesertim ad viros doctos, aut elegantes, etiam ingenii et elegantiae opinio quaeritur.

245. Etiam nouitas quaedam, et, ut ita dicam, insolentia in proponendo est, quae mirifice valet et ad delectandum: sunt enim omnia noua iucunda, et in hoc genere etiam ad ingenii opinionem valent: et ad persuadendum. Indicat enim laborare scribentem, et magnopere velle, nobis persuaderi, quod scribat. Vnde illud Ciceronis: *Nouo genere scribendi usus sum, ut intelligam*

telligas, commendationem esse non vulgarem. Exemplum est apud Cicer. XIII, 1.

246. Age vero exempla quaedam huius rationis subiiciamus: Quae mihi omnia grata: sed de L. Mescinio gratissimum - - Id igitur (puto enim etiam atque etiam mihi dicendum esse) velim existimes mihi te fecisse gratissimum. Ardeo cupiditate incredibili, nomen ut nostrum scriptis illustretur et celebretur tuis. Hoc a te peto, ut subuenias huic meae sollicitudini, ut huic meae laudi, vel, ut verius dicam, prope saluti studium tuum dices. Pudet me dicere, quantum cupiam, etc. Nihil est, quod non tua causa de: eam, facturusque sim cum studiose ac liebenter. Non mihi rem publicam plus debere arbitror, quam me tibi. Cum te semper tantum dilexerim, quantum tu intelligere potuisti: tum his tuis factis sic incensus sum, ut nihil unquam in amore fuerit ardentius. Quis erat, qui putaret ad eum amorem, quem erga te habebam, posse aliquid accedere? tantum accessit, ut mihi nunc denique videar amare, antea dilexisse. Et talia sunt apud Ciceronem innumera bilia.

247. Sed fides maxime fit causarum commemoratione, propter quas gaudemus, dolemus, gratias agimus, rogamus, commendamus: quae vt erunt grauiores, ita magis valebunt. Itaque etiam interdum augendae res erunt, veluti in gratiis agendis, beneficii accepti magnitudine declaranda. Etenim vt se quis magis debere aliquid fatetur atque demonstrat, eo magis credibile facit, se memorem esse officii. Neque enim probabile est,

Ernesti Initia.

H

eum,

eum, qui multas magnasque officii caussas habeat, de iisque cogitet, negligentem officii esse, aut non adfici animo ita, ut debeat. Vnde Cicero post talem commemorationem caussarum subiicere sollet: *quare si me bonum virum, si memorem, si gratum, si dignum beneficiis tuis iudicas, aut similia.*

248. In caussis autem reperiendis duo plerumque videnda sunt, primum res, cuius caussa nos laetari, dolere, gratias agere dicimus, quam petimus etc. deinde personae: neque modo eius, ad quem scribitur, sed etiam ad quem scribit: cum petimus aliis, etiam illius ipsius, cui petitur. Ve- luti, in gratiis agendis, caussae ducentur primum a magnitudine beneficii ipsius, deinde a dignitate, caritate tribuentis, nullo accipientis merito prouocata, denique ab eo, qui accepit, nihil de auctore beneficii meritis, neque remunerandi facultatem habens, etc. quamquam haec quoque ad augendum pertinent, suntque explicata in capite de locis magnitudinis. In commendando, a rei aequitate, facilitate etc. a commendati dignitate, hoc est, virtute, moribus, meritis, a commendantis denique officio, quo impulsus commendat. Sed ista fere erunt in promptu, praesertim iis, qui Ciceronianas epistolas cognoverunt, et aliqua in talibus reperiendis exercitatione vni sunt.

249. Omnino nihil magis curandum est, quam, ut sint omnia, quae dicuntur, personis ac temporibus satis apta. Nam in eo est caput rei. Neque communia dicenda sunt, sed propria singulis rebus et personis. Quod etiam in epistolis iis, quibus libros alicui dedicamus, quod hodie valde
vita-

beat,
non
post
e fo-
gra-
ia.
um-
nos
peti-
, ad
cum
Ve-
num
ita-
rito
de
fa-
ad
oite
rei
ntis
ed
ce-
li-
n,
o-
e-
lis,
de
a-

visitatum est epistolarum genus, tenendum: quas si velimus probari, debebunt esse eiusmodi, ut non modo personis, sed etiam libro cuique ita sint propriae, ut nulli alii conuenire possint.

250. Atque huius rei caussa auctor sim iis, qui epistolis scribendis exercere tirones velint, ne argumenta scribendi proponant ficta, aut infinita, neque ad personas incertas. Nihil enim adiuverint ad illam facultatem atque iudicium tirones: neque ipsi satis poterunt iudicare, rectene quidque dictum sit, nec ne: propterea, quod summa rei est in eo, ut, quid personis temporibusque aptum sit, videamus. Atque etiam veterum epistolae eae, quae fictae sunt, minus elegantes et suaves sunt iis, quae veritatem expresserunt, sed aliquid scholastici et inepti plerumque habent, quod idoneo iudici placere non potest. Itaque potius de certis rebus ad certas personas, a certisque personis scribi, aut suo maxime nomine scribere iubebunt tirones ad personas satis notas, et de rebus notis, eventisque cognitis. Ita et hi facilius ad reperendum iudicandumque acuentur, et ipsi rectius et certius in emendando poterunt versari.

251. In epistolis porro iis, quibus vel laudamus, vel obiurgamus, vel monemus, vel suademus, vel hortamur, quid dicendum sit, et quomodo argumenta reperienda sint, nihil attinet dicere, cum talium fontes in superioribus demonstrauerimus. Illud monere non alienum sit, in monendo, suadendo, hortandoque, prudentiam esse adhibendam hanc, ut videamus, quibus scribiimus. Nam impudentiae ac temeritatis fit, consilium dare

viris prudentibus, senioribus et maioribus, aut saltem non valde familiaribus. Atque etiam, vbi admittere videbitur consilium et cohortationem personarum ratio, tamen humanitatis erit et elegantiae cuiusdam, excusatione aliqua et emollitione vti: veluti, amore nos cogi, qui sit etiam sine caussa sollicitus: magis amoris declarandi caussa fieri, quam quia necesse sit etc. Similique cautione est opus in consolatione, quae et ipsa est genus monendi: in qua etiam hac excusatione licet vti, quod graui dolore percussis non occur-
rant, quae sint doloris minuendi.

252. Neque vero praeceptis indiget ordo ac dispositio. Nam per se propemodum intelligitur, liberum interdum esse, utrum a caussarum commemoratione incipere velis, an proponere primum, quid velis, deinde caussas subiicere.

253. Illud quoque facile intelligitur, non eodem modo scribendas esse omnes epistolas. Nam quae ad familiares, aequales, scribuntur, minus artificii desiderant, quam quae ad magnos, sa-
pientes, elegantes, eruditosque viros, grauibusque de caussis scribuntur: in quibus quaedam copia et ornatus, in primis a sententiis acutis, nouis, grauibus et venustis, et elaboratio quaedam diligenter expectatur.

CAP.

C A P. II.

De Orationibus.

254.

Orationum duo genera facit Hermogenes, alterum *panegyricum*, alterum *politicum*. *Panegyrico* generi subiicit omnes eas, in quibus ingenii et eloquentiae opinio quaeritur maxime, quaeque pertinent vel ad laudandum, vel ad gratias agendas, vel ad gratulandum, in quibus et ipsis dominatur laus. *Politicum* vocat, in quo spectatur utilitas aliqua ciuium, vel singulorum, vel vniuersorum: eique tribuit has, in quibus vel suademus, vel dissuadeimus, vel accusamus, vel defendimus. Ad *politicum* genus commode referri possunt, cum Casp. Laurentio ad Hermogenem, orationes, quae de rebus sacris in concione populi habentur: item, quae in coetibus eruditorum hominum de aliquo capite doctrinae, quod capiat aliquam orationem exornationem. Etenim in his orationibus nihil aliud, nisi utilitas audiendum, spectatur. Tum, in iis quaestiones tractantur, vel cognitionis, vel actionis. Iam haec quin contineantur praeceptis generis deliberatiui et judicialis, dubitari nequit. Quod autem ad illas attinet, aut subtiliter explicant caput aliquod religionis et doctrinae, et sic disputationes potius dicendae sunt, quam orationes, vnde ὡμιλίας, sermones, vocavit antiquitas, suntque eiusmodi pleraque nostratum: aut populariter tractant, et

H 3

cum

cum cohortatione graui aliqua coniungunt; quod esse generis deliberatiui, non potest negari: aut vituperant vitia, et accusant scelera, quod maxime iudicialis generis est. Ad hanc igitur distributionem praecepta inuenienda digerendaeque dicendi materiae breuiter poneimus. Sed politicum genus non indiget peculiaribus praeceptis, contentum quippe iis, quae de inueniendis, ornandis digerendisque argumentis, vniuerse scripsimus. Igitur de solo panegyrico dicendum videtur.

255. Panegyricae orationes dictae olim sunt, quae in conuentu Graeciae vniuersae, velut in ludis Olympicis, haberentur, maxime eloquentiae ostentandae caussa. Nam cum ad istos ludos ex omni Graecia confluarent homines, maxima facultas dabatur inclarescendi per omnem Graeciam, si quis ibi aliquid praeclarum in aliquo genere proferret. Itaque Herodotus ibi Historiam suam, praelegendō proceribus Graeciae, in templum Iouis conuocatis, primum publicauit, auctore Luciano in Herodoto, seu Aetione cap. I. Poetae recitarunt carmina sua, Isocrates orationē pulcherrimam de pace inter Graecos colenda, et bello Persis inferendo. Postea hoc nomen translatum est ad orationes omnes, quae in coetu magno hominum, praesertim illustrium, aut doctorum vniuersae ciuitatis haberentur eiusmodi, ut in iis vel sola, vel maxime admiratio et eius, de quo dicetur, et oratoris ipsius spectaretur.

256. Iam primum, quoniam totum hoc genus versatur in certis personis, aut rebus gestis, certo
tein-

tempore ac loco, a certisque personis, pertinet
huc id, quod supra (§§. 7. 8. 63.) diximus, mate-
riam dicendi omnem esse a personis illis ac rebus
ipsis repetendam, non quaestione aliquam vni-
uersam tractandam, nisi tanta sit personarum re-
rumque tenuitas, et quasi paupertas, ut nullam
idoneam dicendi materiam oratori praebant:
quod si accidere potest, accidet profecto rarissi-
me. Quaestiones vniuersae exornandae materiae
propriae seruire debent (§. 134.) non totam ora-
tionem occupare. Atque ita fecisse videmus
omnes illos veteres, quos eloquentia nobilitauit,
quosque imitatione exprimere debemus. Quod
si tamen ita faciendum sit, primum argumentum
esse debebit cum causa praesenti coniunctissimum,
remotumque a doctrinae subtilitate: deinde ei
ita innectenda erit vbiique persona et res propria,
ut de hac potius, quam de vniuersa aliqua quaes-
tione, oratio esse videatur. Ceterum ab omni
argumento, ducto a tortura nominum vel per-
sonae, vel diei, vel loci, graui viro, qui verae
eloquentiae laudem appetat, abstinentur. Nihil
enim habet ista ratio nisi lusum puerilem, qui ab
eloquentia maxime abhorret. Sed de singulis hu-
iis generis formis est praecipiendum.

257. Estaute omnibus formis, quae huic ge-
neri subiectae sunt, communis *laudatio*. Ea tra-
ctatur dupliciter, vel sic, ut res laudetur, veluti
beneficium, in gratiis agendis, aut partes aliquae
virtutum, quae nempe sint coniunctiores cum
confilio vniuersae orationis, veluti beneficentia,
magnitudo animi, cum gratias agimus, omnibus

que in iis orationibus, in quibus laudes tantum partem faciunt dicendi: vel sic, ut tota oratio in laude versetur, quod fit plerumque, ubi orationes requiruntur longiores et copiosiores: veluti Plinius, gratias acturus Traiano, totam prope orationem in laudibus eius consumxit, ad extremum denique addita breui gratiarum actione. Id ipsum quoque fit duobus modis. Nam vel genus aliquod laudis deligitur, nempe id, quod est in persona ea, quam laudamus, uberrimum, veluti, si quis perfectum Theologum, ICTum, Imperatorem, etc. sub exemplo eius, qui laudari debet, proponat: vel omnes laudes alicuius persequimur.

258. Si partem aliquam amplectimur, oratio habebit duas partes. Prima tractabit quaestioneum vniuersam de partibus et officiis perfecti v.g. Imperatoris, Philosophi, etc. altera autem omnia illa conferet ad personam, cuius laudes suscepimus, eo, quo supra diximus §. 139. modo. Summa autem est in parte altera, quae proprie constituit laudationem. Itaque in hac maxime elaborandum, si materia suffpetat, hoc est, si is, qui laudabitur, multa fecit et habuit ex eo genere, quod propositum est; prior leuiter tractabitur, ut Cicero Maniliana fecit. Id si non erit, priorem partem maxime amplectemur, in qua copia dicendi deesse non potest. Hoc genus commode etiam tractatur per comparationem eius, quem laudamus, cum aliquo in eodem genere illustri viro: in qua per partes proponentur huius laudes, et cum persona praesente communica-

nicabuntur, subiectis idoneis argumentis, e vita eius petitis, vnde communio laudis cuiusque intelligatur.

259. Cum autem omnes alicuius laudes persequi animus est, duobus modis vti licet. Nam et *per generu* et *per tempora* laudare licet. Vbi per genera laudamus, eadem ratio est tractandi cum ea, quam modo descripsimus: nisi quod hic in singulis generibus et capitibus sit, quod ibi in uno. Cum autem per tempora procedimus, partes sunt eae, quas supra §. 60. proposuimus, quarum laudandarum argumenta, et modum ibidem indicavimus, eaque ratione usus est in Enagora Isocrates, initio a genere facto. Sed in hoc genere, vbi ad honores et res gestas, e quibus virtutes intelliguntur, in quibus caput laudis est, deuenemus, apte prudenterque deligemus, quae ornari commode possint: deinde singulas ad laudem reuocabimus, et iis sic immorabitur, vt sententiis acutis, et nouis, et splendidis illustremus: cuius rei modum cum ex illo, quem diximus, Isocrate, tum e Plinio intelligere licet. Satis de laudatione.

260. Altera forma est earum, quae in *gratiis agendis* versantur. Iam cum nullo modo accidere possit, vt oratione solenni gratias agere quis instituat pro re, quae et sua, et auctoris caussa, ita tenuis fit ac leuis, vt idoneam dicendi materiali suppeditare non possit; in hac forma nunquam licebit caput orationis facere quaestionei aliquam vniuersam, nisi paupertatem ingenii atque orationis fateri velimus.

261. Et vniuersae quidem omnis gratiarum actio habet duas partes: primam, *laudem beneficii et benefactoris*, alteram, *grati animi significationem*. *Laus beneficii* constat magnitudinis demonstracione, quae ducitur e locis effectorum, personarum, temporum, locorum, modo tribuendi et comparatione, (§§. 25. 30. 37.) isque locus est longe uberrimus, ut ab omni ingenio destitutus videatur, cui hic oratio desit. *Laus benefactoris* primum cum beneficii laude coniungetur, sic, ut virtutes demonstrentur, a quibus beneficium profectum sit: deinde virtutes ipsae angebuntur ex iisdem locis, sed maxime e loco modi (§. 37.) nam ut v. c. bis dat, qui cito dat, qui sua sponte, non rogatus, comiter, etc. sic hinc magnitudo liberalitatis, benevolentiae, animique ipsius intelligitur: denique oratio auocabitur ad locum communem de dignitate et praestantia earum virtutum vniuersa: in qua parte cauendum erit, ne nimis vulgaria et protrita dicamus. Ceterum optime tractabitur per comparationem (§. 35.)

262. *Grati animi significatio* continetur duabus rebus: prima est, praesentis laetitiae declaratio: quae fiet sententiis et figuris animum laetitia redundantem et gestientem experimentibus, quas pectus oratori laete affecto facilius suggeret, quam praecepta. Proderit tamen repetere breuiter argumenta praecipua primae partis, et ex iis argumentando, inprinisi per comparationem, a minori ad maius, laetitiae et sinceritatem et magnitudinem demonstrare. Altera est perpetuae laetitiae et memoriae promissio. In qua primum viden-

videndum erit, ut vtamur sententiis, figuris, verbis efficacissimis ad eum modum, quem §. 245. indicauimus: deinde, ut intelligatur, nos vim officii, quod debemus, tenere: quod efficiemus, si, quid praestituri sumus, distincte dicamus. Hacc pars etiam cum laude benefactoris coniungetur eleganter, si dicamus, nos de nullo alio genere gratiae referenda magis sollicitos fore, quam de eo, quod magno eius animo dignum sit, quod solum ille exigat ac petat, nempe, ut beneficio recte et ad utilitatem publicam vtamur.

263. Ceterum haec ad singulas caussas quomodo accommodanda sint, velut, quid dicendum, si quis pro honoribus acceptis gratias agat, non videtur dicendum. Foret enim prope infinitum. Neque desideret hoc non plane stupidus. Exemplum petere tirones poterunt ab exordio Agrariae secundae. Alia exempla gratiarum agendarum sunt Or. pro Marcello, ad Quirites et in Senatu post redditum. Plinii Panegyricus c. 90. sq. Auffonii Or. Consularis etc.

§. 264. Licebit etiam, si res fert ac locus, ab laude beneficentiae ac liberalitatis digredi ad laudes benefactoris vniuersas, ut Plinius fecit, qui, gratias pro Consulatu acturus, omnes Traiani laudes complexus, in iisque amplissime versatus est, in beneficii laude ipsius breuiter, et deinceps ad extremum. Similesque digressiones licebit facere alias: praeferim si materia non sit copiosissima, et iam ab aliis paene exausta: modo hoc curetur, ut id, ad quod digredimur, ita sit cum caussa coniunctum, ut pars laudis cum laude vniuersa, neque

que sit nimis tenue atque subtile. Si quis v. c. in Oratione Aditiali gratias agat pro accepto loco inter doctores publicos, poterit digredi ad locum aliquem communem, de praestantia disciplinae suae, item in altera, ad locum de vera ratione eius tradendae etc. Melius quidem putamus, tales locos per digressionem tractari, quam summam et caput orationum esse. Si tamen ita necesse sit fieri, iisdem cautionibus in delectu opus erit.

§. 265. Tertia forma generis Panegyrici est *gratulationum*, quae patet paullo latius. Vniuersa gratulatio habet duas partes: quarum altera laetitiam declarat, altera vota facit. Sed in priori caput est. Ea autem variatur rei gratulandae varietate. Nam ea est vel fortunae solius, aut maxime, beneficium, vel virtutis, et si felicitate aliqua adiutae, opus, ut *victoria*, *pax* etc. Si illud est, primo ipsa res augebitur, e locis magnitudinis convenientibus: deinde laudes adiungentur eius, cui gratulamur: easque ita moderabimur, ut ad dignitatem referantur, hoc est, ut ex iis appareat, dignum esse, priuum, cui res secundae contigerint, deinde, cuius fortuna laetentur omnes: quod efficitur commemorandis virtutibus, in primis iis, quae societatem communem attingunt, ut iustitia, liberalitate, humanitate, comitate etc. Sin hoc est, priuum ipsum *κατόρθωμα* augebitur, maxime e locis effectorum et caussarum: unde paratus deinde transitus ad virtutes laudandas. In quo tamen ratio habenda maxime earum, quae illud ipsum *κατόρθωμα* attingunt. Hinc eodem modo, ut in gratiarum actione, ducentur argumenta laetitiae cum

cum nostrae, tum omnium, cuius magnitudo idoneis sententiis et figuris exprimetur. In altera parte vota faciemus pro perpetuitate felicitatis, cum eius, quam gratulati sumus, tum ceterae, maiora et noua incrementa optabimus etc. si personarum ratio feret, etiam cohortationem adiungemus ad perpetuum virtutis studium: sin minus, pro re certa pollicebimur omnibus, et de eo iubebimus omnia magna et praecclara sperare.

266. Sed gratulandi causa maxime habent orationes in nuptiis, natalibus, initiis honorum, in prienis imperii, aduentuque Principum. Ac primum *nuptias* gratulamur vel priuatis, vel principibus. Cum ergo priuatis gratulabimur, oratio duas habebit partes: primam sponsi sponsaque laudem, coniunctam cum felicitatis communis praedicatione: alteram vota, atque omnia secunda, quibus et laetitiam et animum benevolum testemur. In laudando autem in primis ratio habebitur eorum honorum, ex quibus delectus coniugis utriusque probetur, propter quae digni coniunctione videantur, felix denique matrimonium speretur. In quo magna facultas dabitur digrediendi ad locos communes, qui iustarum orationum materiae esse possint: veluti, dignitatem et virtutem in diligendis coniugibus maxime spectandam: quanto praestantior sit animi pulcri, quam corporis amor: quam vim habeat bene natum esse: *λατρεγίαν* pulcherrimam esse matrimonium bonorum: aliosque, quos, in lectione bonorum oratorum, poetarum, philosophorum obuios, notabit futurus orator, ut sint in promptu. Atque

que hinc facilis transitus, primum ad laetitiam, quae e praceptorum gratulandi communibus declarabitur, deinde ad vota: quae optime fient, et praedicenda et describenda felicitate, quae futura sit in matrimonio tam bene instituto, et optandis omnium bonorum generibus, quibus digna sit utriusque virtus. Quod si quis velit quaestionem uniuersam facere argumentum orationis, deliget aliquem ex istis, quos diximus, locis communibus, tractabitque eo, quo praecepimus antea, modo.

267. Sin Principibus nuptias gratulabimur, primum laudari potest consilium ipsum, deinde electus: ubi magna facultas est dicendi de bonis utriusque, vel a genere et maioribus, vel ab ingenio et animo, educatione, scientia, virtute, item digrediendi ad locos communes, sumtos e Politicis, de matrimonii Principiis, qui sunt coniuncti cum utilitate et Principiis et reipublicae: in iisque exornandis pluriuum valebit historia. Dehinc demonstrabitur magnitudo bona spei de coniugum nouorum felicitate, et reipublicae utilitate: unde munitissimus transitus ad laetitiae affectum exprimendum, denique ad vota; quorun communis est cum superiori genere tractatio. Qui uniuersam quaestionem tractare volent, eadem tenebunt, quae mox dicta sunt. Sed hic omnium maxime subtilitas scholastica cauenda, praesertim, si Principes ipsos auditores habeamus: est enim indigna ipsorum personis. Omnium maxime conueniunt, quae totae historia continentur, velut ea, de qua ante paucos annos in nuptiis binis filii filiaeque Regis Poloniae, dixit Bergerus, Orator Vitebergensis Academiae clarissimus.

268. *Natalitiae orationes duplicis sunt generis.* Nam vel infantem recens natum gratulamur parentibus, vel adultis redditum natalis diei. Huiusmodi orationes, quia non facile habentur, nisi in Principali dignitate virorum vel prole, vel natali, huc etiam praecipiendi rationem dirigimus. *Gratulatio igitur prolis* has habebit partes. Primum dicetur, quantum boni sit in prole ipsa, etiam numeroſa, si ita res fert, vel ad Parentum voluptatem et decus, vel ad ciuium ſpem et utilitatem: vbi licebit descendere ad locos communes varios, veluti, quam bona sit fecunditas principalis, cuius nomine in primis cara quondam Agripina, auctore Tacito: quanta vis sit in parentum ingenii, virtute, vitac totius disciplina, in ipfa nobilitate generis, ad ſpem praeclaram de ipſorum liberis etc. In quorum delectu videbimus, ut ſint personis parentum, temporibus locisque accommodati, tractenturque, ut paullo ante monuimus. Deinde per gemus ad laudes parentum, in primis eas, quae ſint cum hac cauſa coniunctae, h. e. quae ſpem faciant amplam de prole. Quibuscum aptissime coniungetur, tanquam cum cauſis, laetitiae viuida re praefentatio, qua omnes cum parentibus communiter affecti ſint. Sequetur ultima pars, quae vota ac preces faciet pro incolumente et felicitate infantis. Quo loco conueniet demonstrare, qualis educatio futura ſit, qualis futurus ipfe filius, admonere parentes, ut eum ſui maxime imitatione erudiant. Licebit etiam alloqui ipsum infantem, ei gratulari parentes, paremque cum virtute pari felicitatem optare, commendare cum denique cinium studiis, amori, precibus, etc.

269.

269. Natalem autem si gratulabimur, videntum erit ante omnia, vtrum primum id faciamus, an iam ante idem fecerimus. Si primum gratulabimur, liberior erit oratio et amplior materia. Etenim, cum prima talis orationis pars versetur in causis laetitiae ex incolumente, et felicitate Principis, demonstrandis augendisque, ad vniuersas laudes eius excurri, et hinc digressio subinde fieri potest ad locos communes, qui ad illas laudes pertineant, ita ut iusta et plena laudatio sit. Si ista iam aliis orationibus consumta sint, videntur, quid anno proxiime elapso fecerit cum salute aut gloria patriae suaque, quid utilitatis, vel attulerit, vel consecutus sit, cui malo occurrerit, quae incommoda fortiter pertulerit, aut depulerit, atque hinc laudandi materia sumenda, etiam, si quaestio vniuersa desideretur, totius orationis materia. Atque etiam, ut semper materia laudandi noua in promptu sit, si sciamus, saepius dicendum fore, oportebit bonum materiae ad laudem idoneae dispensatorem esse, nec omnia simul profundere. Has laudes deinde conferemus ad laetitiae demonstrationem et exaggerationem, ut in aliis gratulandi generibus, denique ad vota et preces pro incolumente: in quo tempora saepe opportunitatem praebebunt. Nam, si quid magni et gravis consilii, et negotii, habeat in manibus, licebit complecti votis, et felicem euentum, atque successum celerem optare.

270. Est etiam copiosum genus gratulationis, quod magnos honores, in primisque imperium acceptum amplectitur. Suffecerit rationem gratulandi

landi imperii demonstrasse. Habet autem talis gratulatio et ipsa duas partes: quarum prima est laetitiae demonstratio, quae maxime dicitur ex dignitate eius, qui imperium accepit. Oportebit igitur demonstrare hanc dignitatem, si electus sit, partim sic, ut ab eligentium prudentia patriaeque amore argumenta ducantur, partim ita, ut virtutes eius idoneis documentis, rerum gestarum maxime, demonstrentur atque augeantur: si hereditate acceperit, sic, ut ita natum, ita educatum, ea iam signa virtutum suarum dedisse, demonstremus, ut spem hanc dubiam iniciat optimi principis, et felicitatis, sub imperio eius, publicae. In quo multi in promptu loci communes, qui copiose poterunt tractari. In electo Principe, licebit digredi ad laudem consuetudinis imperii per electionem deferendi: in nato autem, dicemus, a Deo datum esse, eius donum esse bonos Principes, non sapientiae humanae, quae errare possit, cui partium studia, cupiditatesque saepe obstent, familiam, e qua natus sit, semper bonos Principes dedisse, etc. Poterit etiam laudatio tota fieri per comparisonem cum alio illustri Principe. Secundum haec, ad alteram partem dabitur aditus, per descriptionem et imperii, quod a tali Principe sperandum sit, et felicitatis temporum, sub eo futurorum, quae est altera ratio demonstrandae laetitiae. Haec demonstratio etiam tenebit locum cohortationis directae, quam verecundia erga Principem vix admittit. Votis, quae alteram partem efficiunt gratulationis, adiungi poterit promissio obsequii, fideique, item Principis commendatio ad studia et benevolentiam ciuium.

Ernesti Initia.

I

271.

271. Sunt etiam quaedam cautiones in hoc genere videndae. Si Principe ipso coram dicetur, breuius defungemur, nisi indoles, studia ipsius ferant longiorem orationem, neque quaestione in vniuersam tractabimus. Quod contra licuerit forte in confessu doctorum virorum: sed ita, ut e mediis et copiosissimis laudibus Principis petatur, sitque quam maxime cum eius persona, temporibus, locisque, coniuncta, denique ab omni scholae subtilitate remota: veluti, si imago boni aut sapientis, aut liberalis, aut felicis etc. Principis sub eius exemplo proponatur.

272. Ad reliqua genera gratulationum preepta de gratulatione vniuersa suffecerint: veluti ad eam, quam Dionysius προσΦωνηματική appellat in Arte: quo nomine continentur etiam, quibus redditum in patriam e bello, e peregrinatione, gratulamur et reduci Principi et patriae. In hoc ultimo genere nihil melius et uberiorius fuerit, quam peregrinatorem mente et cogitatione circumducere per loca, in quibus peregrinatus sit, quid ibi viderit, audierit, in quorum magnorum virorum velut vestigiis sletterit, quo modo tuum affectus fuerit, quid cogitauerit, probabiliter exponere. In quo delectus diligenter habebitur eorum, quae cuiusque ingenio, moribus, studiis maxime digna et apta sint. Hinc deinde fructus peregrinationis ad Principem, atque multo magis patriam, redundaturi demonstrabuntur et augebuntur, etc.

273. Ab gratulationis forma ea, qua honores aut imperium gratulamur, non magnopere differt *inauguralis* ea, qua personas honoribus certis in-

augu-

auguramus. Constat enim primum ex laude personae inaugurandae, quae tota ad dignitatem referetur. Dignitas autem intelligitur demonstrandis, primum muneric partibus, earumque praestantia, difficultate, etc. deinde virtutibus inaugandi eo pertinentibus. Hic non facile deesse potest facultas tractandi alicuius loci, cum rebus personisque coniuncti; ad quem, si tenuis materia est in munere et persona, etiam summa orationis totius conferri potest. Datur etiam saepe digressio ad laudes eius, a quo ei munus est mandatum, sed eas, quae sint cum re praesenti coniunctae, veluti, iudicium in dignitatibus hominum, prudentiam in diligendo, sapientiamque et curam publicae utilitatis in honoribus mandandis. Pars altera habet quasi traditionem muneric ac potestatis, quae est in illo munere, in manus cuiusque inaugurandi: quae erit coniuncta cum cohortatione vel directa, vel, si personae dignitas desideret, obliqua, et bonis omnibus ac votis, ut omnibus eius institutis et coeptis felices successus contingant. Accedere etiam potest hoc, ut commendetur studiis et benevolentiae, etc. hominum. In hoc genere itidem vti comparatione inaugandi possis, cum aliquo eiusdem ordinis claro, et imitatione digno viro: vt ei par siue sit, siue futurus sit.

274. Sed est aliud genus inaugurandi, quod versatur in rebus, velut templis, scholis, curiis, aliisque, quae dedicari oratione solent. Haec dedicatio est e pluribus generibus mixta. Habet enim gratulationem, pertinentem ad eos, quibus

istis prospicitur: gratiarumque actionem, quae debetur ei, cuius cura, liberalitas, intercessit: quae ambae constant demonstratione beneficii, quod accipitur in istis rebus et tribuitur: cohortationem, quae commendat primum beneficium ipsum, et deinde usum rei, e natura ipsius, et consilio auctoris, et gratiae et diligentiae utentium: denique vota et omnia. Quorum omnium ratio in superioribus generibus est satis explicata. Etiam *aditiales* orationes vocari inaugurales solent. Eorum ratio iam supra demonstrata est.

275. Sunt et aliae formae orationum usitatae in solennibus conuentibus, quae sunt e genere panegyrico. Sed, quia fere constant gratiarum actione, aut gratulatione, aut laude, aut officii promissione, aut aliquot harum partium, quas ipsa res quoque loco ac tempore indicabit, non opus habent propria praceptione, praesertim, cum plerumque debent esse breviores. Etenim, qui modum tractandoru[m] generum eorum cognouit, de quibus exposuimus, in his non laborabit.

276. Atque etiam interdum respondendum est orationi alterius: velut ei, qui muneri alicui inaugurator. Tales orationes fere constant gratiarum actione, et promissione officii. Iam, gratiae quomodo agantur, satis dictum: cum ea autem arte coniuncta est ipsa officii promissio, veluti effectus cum sua causa: de ea diximus eodem loco. Illud elegans est in hoc genere, si ex ipsa oratione v. c. inaugurantis, alterius responsio ducitur. Quod poterunt, qui exercitatione affidua extem-

extemporalem dicendi facultatem consecuti sunt.
Sed quia haec est in paucis, illud saltem viden-
dum, ut initium et quasi aditum ad orationem
nostram petamus ex oratione alterius: quod vel
mediocri ingenio et exercitatione consequemur,
ut efficere possumus. Ita tota oratiuncula extem-
poralis speciem habebit.

277. Restat unum genus, de quo separatim
praecipiendum videtur, *epitaphium*, sive *funebre*.
Possunt autem in oratione tali esse haec: doloris
atque luctus demonstratio, laudatio mortui, ex
qua luctus caussa intelligatur, consolatio eorum,
ad quos dolor maxime pertinet, veluti parentum,
coniugum, liberorum, etc. mortui denique et ad
gratiam memoriae benevolentiaeque conserua-
tionem, et ad imitationem commendatio. Sed ma-
xime in hoc genere dominantur laudes mortui,
quae quomodo tractentur, satis docuimus supra.
Doloris autem significatio non modo ponetur ab
initio, quanquam id non est perpetuum, sed etiam,
atque vel maxime, post laudes; quibus explicatis,
breuiter repetendo laudum, praesertim earum,
quae ad communem utilitatem pertinent, capita,
argumentationes efficientur, e quibus veritas et
magnitudo doloris intelligatur. Hic miseratio
potest induci, a personis, velut mortui, coniugis,
liberorum, reque publica, ducta. Consolatio por-
ro locum habebit modo in iis, quae coram ne-
cessariis habebuntur, in ceteris aut plane omitte-
tur, aut ad vota precesque reuocabitur, ut dolor
rebus secundioribus mitigetur. Si talis oratio ha-
bebitur in personis iis, quae iustam laudandi ma-

teriam non praebant, erit sane quaestio vniuersa tractanda, sed quae cum persona praesenti coniuncta sit, magisque, ut digressionis speciem habeat. conf. §. 63.



P A R S I I. DE ELOCVTIONE.

278.

Frustra prope modum quis, quid dicendum sit, viderit, nisi idem possit res bene inuentas apte eloqui. In oratione quidem plus valeat, qui res, non admodum bene, aut subtiliter, excogitatas eleganter ornateque possit eloqui, quam, qui optime inuentas vitiose ieiuneque dicat. Itaque et facultas oratoria ab eloquendo nomen accepit, et orator ipse Græcis $\rho\eta\tauω$ est appellatus. Ac si vere velimus iudicare, priorem partem, quae de inuentione est, prope totam cum aliis artibus communem Rhetorica habet, hanc de elocutione propriam. vid. Cicer. Or. 19. Vnde non improbabiliter Facciolatus (Or. ad Rhetor.) disputat, ea Rheticam, quae proprie dicatur, omnem contineri. Illud quidem dubitari non potest, quin haec pars, etsi ordine ultima, tamen exercitatione prima esse debeat. Eius praeceptio tota nobis ita descripta fit, ut primum *de virtutibus elocutionis*, deinde, *de generibus dicendi*, exponamus.

279.



279. Et quoniam omnis oratio, vel ad docendum, vel ad delectandum, vel ad mouendum denique valere debet, huc quoque nobis dirigenda videntur praecepta de virtutibus orationis. Itaque prium dicemus de iis, quae profunt maxime ad docendum, quae continentur elegantia: deinde de his, quae ad delectandum et mouendum: quae insunt in copia et ornatu.

C A P. I.

De Elegantia.

280.

Elegantia orationis respondet subtilitati inventionis, omninoque doctrinae, quippe et ipsa *subtilitas* dicitur (Cic. Or. II, 7.) cerniturque in eo, si est recta oratio ac sine vitio verborum: unde et inuiditatem appellamus. Cic. Or. 23. Eius tres sunt partes, *puritas*, et *perspicuitas*, et *venustas*, siue *urbanitas*.

281. *Puritas*, quae in latina lingua *latinitas*, in Graeca ἔληνισμός vocatur, prium repudiat barbara, soloeca, obsoleta, nouata, peregrina, tum eum, quem Graeci κονισμὸν appellant, hoc est, inaequalitatem et vilitatem: barbara quidem et soloeca, quia praeceptis artis loquendi repugnant, obsoleta cum nouatis et peregrinis, quia a confuetudine populi aberrant, quae in loquendo valet

I 4

maxi-

maxime, fordida et plebeia denique cum *νονισμῷ*, quoniam abhorrent a consuetudine honestarum et bene loquentium.

282. Est autem *barbarismus* in verbis singulis, cum ea aut tota sunt a barbaris gentibus, aut formaliter habent abhorrentem a linguae analogia, quam optima aetas secuta est, et Grammaticis regulis, etymologicis, profodicisque comprehenduntur. *Solecismus* autem est in verbis iunctis, cum genere, numero, casu, tempore, modis, ordine etiam, aberratur in constructione a praecipitis linguae, eaque non satis inter se consentiunt: de quibus omnibus dicere, aut singulorum exempla ponere non est necesse.

283. Duo genera sunt, de quibus admonere placet. Ea sunt in temporibus ac modis, in quibus saepe labuntur homines nostri latine scribentes, decepti vernaculae linguae consuetudine, propterea, quod non satis diligenter de iis vulgo praeципitur in libellis grammaticis. In *temporibus* igitur videbimus, ut eorum legitimam consecutionem teneamus: ut, post praeteritum, imperfectum sit: *multos au/iui, qui dicerent, non dixerunt*: post futurum praesens: *erunt, qui credant, non credent*: item, ut veram temporum vim et rationem seruemus, ne imperfecto pro plusquamperfecto, aut futuro indicatiui pro futuro coniunctiu: ut, *cum frater veniret, pro venisset, aut, cum veniet, pro venerit*: in quo proderit legisse, quae de temporum vi accurate ad Homerum Iliad. a. 37. Clarkius dixit. In epistolis porro cum sermo est de rebus transituris ante, quam eae reddantur, imperfect-

perfecto et perfecto vtendum: *rumor erat*, non
est: *haec scripsi*, non, *scribo*, aut *scribebam*, *ipsa*
dies me admonebat, non *admonet*.

284. In modis porro videbimus, vt particulis et relatio*n* qui coniunctiu*m* iungamus, vbi coniunctui*m*, aut accusatiui*m* cum infinitiu*m* praecesse*n*rint, item, vbi verbum substantiu*m*, vim praedi*c*ati habens, vt: *auctores sunt*, *qui tradant*, non *tradunt*: *multi sunt*, *qui putent*: aut *inuenire* et *habere* loco praedicati, vt *auctores habeo*, *qui* *scribant*, *auctores reperi*, *qui traderent*: item alia: *ea tibi cau*s*sa datur*, *in qua declarare possis*, non *potes*. Non monuisseni haec, nisi etiam, qui magistros scribendi se profiterentur, in his peccare vidissem. Et sunt alia, quae prope p^{re}detponere, veluti, quod *quamquam*, *et si*, et aliae tales particulae, quae sua natura coniunctiu*m* non habent, ab initio, in oratione recta, cum coniunctiu*m* ponuntur: *cum contra*, vbi cau*s*sale est, cum indicatiuo*m*, etc.

285. Hoc quoque tenendum est elegantiae in hoc genere studio*s*, non omnium substantiu*m* omnes numeros et casus, item verborum omnia tempora in usu fuisse, etiamsi analogia ferret, eleganter loquentibus, quemadmodum nec apud Graecos. Cicero quidem negat *specierum* et *speciebus* dici posse, sed potius dicendum esse *partium* vel *formarum*, *partibus* et *formis*. Item, quaedam ab elegantibus contracte, quaedam plene tantum dicta, vt *sestertium nummum*, non *nummorum*. vid. Cicer. Or. 46. 47. Oportet igitur in his usum eleganter loquentium obseruare.

286. *Obsoleta* porro verba fugienda sunt, cum
hac de causa, quia in loquendo consuetudo reti-
nenda est, tum quia perspicuitati obsunt. Sunt
autem obsoletorum duo genera: alia enim cum
recesserint ab usu communi, tamen non obscura
sunt aut ignota doctis, et quicunque scriptores
priscos legunt: alia autem ita vetusta sunt, ut fa-
cta sint prope modum prorsus obscura. Haec igitur
omnino vitanda: illis autem licebit uti, non
quidem in oratione populari, sed tamen in car-
minibus et libris, qui quidem versentur in parte
aliqua doctrinae, sed ita, utraro ac parce, nec
sine aliqua idonea causa, fiat. Nam in his nihil
obsunt perspicuitati, cum legantur tantum; in
quo tempus est quaerendi: deinde a doctis, qui
intelligere debere videantur: suntque isti libri
scripti et doctis et doctrinae probandae causa,
cuius pars est, linguae interiora nosse.

287. Contra esse putet aliquis in *nouatis*, pro-
pterea, quod neque consuetudini, neque perspi-
cuitati aduersari videantur. Atque fortasse in lin-
gua ea, quae adhuc versetur in usu vitae communi-
nis, ferantur, si propter necessitatem aliquam sint
inuenta, nec repugnant ei, quae analogia dicitur.
Sed tamen et hic opus erit cautione hac, ut iis in
oratione populari tum demum utimur, cum ita
invaluerint consuetudine usurpandi, ut ab omni-
bus intelligantur. Si quis autem verbis utatur
praeter necessitatem recens proculis, aut ad usum
scholarum inuentis, et quidem in oratione popu-
lari, vehementer peccet. In quo genere valde
hodie, insita recte loquendi, labuntur vernaculi
vel

vel oratores, vel scriptores, cum vocabula vernacula, quae ab illo tempore, ex quo vernacula lingua uti coeperunt eruditi in docendo ac scribendo, aut formata sunt, non illa omnia recte fortasse, aut sensu nouo, et e scholis orto, usurpari coepit, inferunt in epistolas, conciones ad populum, historias, carmina etc. veluti, *bewegungsgrund*, *wurf*, *das daseyn (existentia)* et alia permulta. Cicero quidem cum multis vocabulis locupletarit linguam latinam, ductis a graecis fontibus, tamen iis nunquam in epistolis, aut oratione, usus est: cuius exemplum nouorum verborum opifices, vel admiratores, debebunt ita sequi, ut auctoritate eius in nouis verbis defendendis ipsi libenter utuntur.

288. Sed nobis hic sermo maxime est de lingua latina: in qua nouorum numero habentur omnia, quae aurea illa, quam vocamus, aetas prorsus ignorauit, vel alia significatione usurpauit: a quibus abstinentur esse omnes praecipiunt. Sed habet tamen ista ratio quendam modum. Nam vocabula singula, quibus res appellentur, a posterioris aetatis scriptoribus petere nulla religio sit, si illi optimi non habeant earum nomina; neque vel noua plane verba, conseruata analogia, fingere, in rebus nouis, si antiqua comode transferri nequeant: de quo accurate scripsit Q. Marius Corradus de copia latini sermonis: sed idem sine necessitate facere, aut in formulis loquendi, quas phrases vocant, id quidem, ut vitiosissimum, debet vitari.

289. *Peregrinitas* est, cum verbis utimur ex alius linguae consuetudine: estque partim in singularibus verbis, partim in coniunctis. In verbo est, cum ei tribuimus verbi eius, quod ipsi in alia, veluti in graeca lingua, respondet, significationem non communem. Veluti, verbo *amare* respondet in graeca *Φιλεῖν*, habentque haec duo verba significationem aliquam communem. Sed verbum *Φιλεῖν* habet etiam aliquam propriam: quam si transferas pariter ad latinum, dicasque *amat fieri*, pro *sō'et*, peregrinitate pecces. In formulis est, cum utare constructione alteri linguae propria, ut *summus ingenii*, pro *ingenio*, *similis os Deo*, pro *ore*: quae sunt graeca, non latina.

290. Quod autem veteres latini scriptores graecam consuetudinem saepe secuti sunt, praesertim poetae, eius causa haec est. Lingua latina haud dubie orta est maxime a graeca, sed antiquissima et adhuc rudi. Itaque et ipsa habuit multa cum graecis communia, et, propter cognationem hanc, putauit, sibi licere, ab illa sumere, non modo ad necessitatem, sed etiam ad copiam. Horatius quidem etiam noua verba probat, si de graeco fonte ducta sint. Ne tamen ea res perspicuitati obesset, maior libertas data poetis, quorum lectores docti essent, et graeca non ignorarent, quam ceteris, in primis oratoribus, quorum oratio ad populum pertineret. Itaque diligenter videndum, qui fines istius libertatis fuerint in utroque genere, et oratorio, siue profaico omnino, et poetico, ne in peregrinitatis vitium incidamus. Ex alia lingua quacunque formas loquen-

loquendi, aut significaciones verborum usurpare, invitio sit. Ceterum hinc non obscure intelligi universo poterit, quae linguae, quoad, et quomodo, communicare inter se verborum significaciones et phrases possint, sine peregrinitatis reprehensione.

291. Sed puritatis est, etiam in iis, quae usitata, et neque obsoleta, neque noua, neque peregrina sunt, delectum habere, et quidem in utramque partem, hoc est, ut alia repudiemus, alia amplectamur. Et primo quidem verba quaedam sunt plebeia et sordida, neque modo significacione, sed etiam usu. Verba quaedam res turpes significant proprie: ea plerumque parum honeste dicuntur, ut *anus*, *vagina*, *feces* etc. quae medicis relinquuntur: quibusdam casu ac temere turpitudinis quaedam macula adhaesit, ut *inire*. Ab utrisque igitur erit abstinentum, et verbum honestius requirendum, aut circuitione aliqua utendum.

292. Aliud genus est verborum, quae res honestas quidem significant, et hactenus nihil offendunt: ceterum ab infima tantum plebe dicuntur, et sunt quasi infra rei dignitatem. Ab iis quoque sibi cauendum putabit elegantiae studiosus, nisi ubi in iis usurpandi peculiaris vis est ex loco, et contextu: quod cum est, etiam ornatum afferunt, ut bene demonstrat Longinus S. 31. aut cum per ipsum dicuntur, velut in illo Ciceronis ad Att. IV, 5. *dudum circumrodo, quod deuorandum est*. Sed haec ad locum de ornatu pertinent.

293. Est quoque cauendus is, quem Graeci *κοινωνίαν* vocant. Eum tribuunt iis, qui varias dialectos commiscent, Atticis Dorica, Ionica, Accolia:

lica: sed patet latius. Eius igitur vitii duo maxime genera sunt. Primum et quidem praecipuum est, si verba diuersorum scribendi generum misceas. Habet nempe unaquaeque ars propria quaedam verba et dicendi genera, ut poesis, philosophia, et ceterae: quibus recte suo loco vtare, male in omni alio genere scribendi. Ut in poesi vitiosum est, verba tragica, aut comica, aliis generibus inferre: sic multo magis, si et ista, et alia poetis visitata vulgari. Quo nomine recte nouitios scriptores irrisit non vno loco Lucianus, qui rarioribus et exquisitioribus verbis poetarum, in primis Comicorum, veluti stellulis distinguere stuperent orationem, ipse non magis liber ab hoc vitio, quam ab aliis nonnullis, quorum causa reprehendit alios. In eoque vitio sunt etiam hodie permulti, qui, ut exquisite scribere atque doce videantur, subinde adspergunt e poetis verba et formas loquendi, praesertim ex obscurioribus, Horatio, Iuuenali, Statio, Persio. Aque ut alienum esse ab elegantia ante demonstrauimus, in oratione populari vti verbis in usum scholarum nouatis; sic vniuerse sunt in vitio, qui philosophis, aut omnino scholis, propria verba ad usum vulgarem transferunt. Cicero saepe in philosophicis habet *qualitates*, *formas*, et eas, quae subiectae sunt generi, et quae naturam rei et essentiam, quam vocant, exprimunt, *visum*, de somnio, et alia plura, quibus nunquam in orationibus et epistolis, nisi forte ad philosophum de philosophia scribens, vtitur, sed eorum loco aliis popularibus. In hoc genere grauiter hodie peccant

peccant vernaculi oratores, ut videri volunt, inscita linguae et artis dicendi, in omni promiscue oratione dicentes, *wesen*, *wesentlich*, *vorstellung*, *begrif*, *gründe*, et similia permulta.

294. Alterum genus *κοινωνίας* latius patet, et est in plerisque: quod cernitur in eo, si quis promiscue verba et formas dicendi sumat e diuersis, non modo aetate, scriptoribus, sed etiam charactere et forma orationis. Satis constat, primum aetatum, deinde etiam hominum eiusdem aetatis, diuersos esse characteres in scribendo: quippe et mores, et vitae genus, et studia et conditio hominum cuiusque aetatis, ingenium vero et natura cuiusque hominis elocutionem mirifice afficit. Itaque in scriptoribus Graecis, qui a Socraticis, siue etiam belli Peloponnesiaci temporibus, ad sublatam Graeciae libertatem, item in latinis, qui inde a tertio Punico bello ad Augusti usque tempora fuere, alia forma orationis est, quam in iis, qui post fuere, nisi, si qui, ingenio adiuti, imitando illam meliorum temporum formam assecuti sunt. Sed et in iis, qui in eodem illo tractu fuere, tamen permultum est discriminis, ut comparando facile intelligitur, aliusque est Ciceronis, alias Liuii, alias Caesaris, alias Nepotis, character.

295. Hos inter se commisceri, et ex omnibus velut unum effici, nullo modo potest probari. Sed in hoc vitium facillime incidunt, qui, doctrinae et delectationis caussa, varia et multa lectione vtantur ante, quam satis sint optimorum et sumilium lectione et imitatione confirmati.

296.

296. Et haec quidem de vitiis fugiendis dicta sunt. Sed initium tantum elegantiae est, vitiis carere. Itaque etiam virtutes, quas elegantia defiderat, cognoscendae sunt. Sunt autem aliae a natura, arte adiuta, aliae ab arte et diligentia. Quae a natura sunt, non tam in singulis verbis et formulis loquendi cernuntur, quam in toto orationis habitu, ut *simplex venustas* quaedam et *gratia*, quae existunt ab ingenio maxime, adiuuantur autem consuetudine cum bonis et politis hominibus, ac lectione assida eorum, in quibus eae virtutes insunt, Atticorum, Terentii, Ciceronis, Caesaris, Nepotis. Sine ingenio quidem reliqua parum profuerint. Itaque videmus, homines multos, quibus haec non desint, tamen illas virtutes assequi non posse, aut potuisse. Ceterum, quia hoc genus praeceptis non continetur, ad eas, quae a diligentia sunt, veniamus.

297. Prima est ea, quam *urbanitatem* vocare licet: in qua maximam vim habet delectus: cuius ratio haec est, ut e verbis generibusque loquendi iis, quibus, salua puritatis lege, vti licet, sumamus potissimum ea, quae consuetudo politiorum hominum et exquisitius loquentium usurpauit: in quibus inest aliquid suavitatis, quae aut ab aliqua maiori vi significandi, aut a quadam significatione ingenii, animique humanitate exculti, aut denique ab ipsa consuetudine, quae rebus per se indifferentibus suavitatis aliquid paullatim addit, nascitur. Huius generis formas praecepias, quae nobis quidem videntur, quasque vel aliena, vel nostra nobis obseruatio suggerit, ponemus, secundum partes orationis.

298.

298. In substantiis igitur est elegantiae primum genus, cum adiectuum mutatur in substantium, ut *beneficii magnitudo*, pro *magno beneficio*: quod fieri debet maxime tum, cum in sensu non tam substantii, quam attributi ratio habetur, siue, cum praedicatum, aut effectus, non tam ad substantium, quam adiectuum refertur. Alterum genus est, cum ex uno substantio fiunt duo, quod est etiam elegantius, vt, *opinionis levitas, vanitas, imbecillitas*, pro *opinione: lac, quo infantum teneritas aleretur: comitum corrumpere curam nutricisque fidem*. Id reperitur, si videoas, quid insit in substantii primarii notione, ad quod verbum maxime referatur. Elegantiae causa haec est, quod ita perspicuitas adiuuatur. Tertium est, cum vel pronomini substantium adiungitur eius rei, quae maxime spectatur, ut Cicero, pro, *hunc nisi ego restitissim ani- mo ac virtute, dixit, huius temeritati: aut loco pronominis substantium ponitur, ut ignosci errori meo, pro nihili*.

299. In adiectuis elegans est, cum a substantiis diuelluntur, vt in his formulis: *hoc est ad fructum uberrimum, ad constantiam firmissimum, ad voluptatem suauissimum, ad poenitentiam stabile, pro, hic est fructus uberrimus, hoc efficit voluptatem suauissimam* etc. porro cum adduntur substantia apta: *quam sit re pulchrum, fama glorio- sum, beneficio gratum, tyrannum occidere: item, cum commutatur superlatius in compararium, aut posituum: nihil illo fuit excelentius vel in virtuti- bus etc. ut nihil in amore fuerit ardentius, pro, ut amor meus factus sit ardenterissimus: forma praeter*

Ernesti Initia.

K

ceteras

ceteras honesta, pro honestissima. Illud quoque venu-
stum est, cum adiectua ponuntur loco pronominis,
ut sparsissent lacrimae pectora nostra piae, pro tuae:
addebat veris multa fauentis amor, pro tuus: quid
miserere denique restat, pro mihi. Ea reperiuntur
non aliter, quam substantia.

300. Inter pronomina, permagna elegantia
est in legitimo usu relatiui: quo, non male iudi-
cauit, qui agnoscit maxime posse in scribendo ido-
neam latinitatis scientiam dixit. Cuius elegantiae
causa videtur esse haec, quod eo, primum, inter
se coniunguntur membra orationis, ut veluti cor-
pus efficiatur, vel membra unius deuincti inter se
articuli; deinde adiuuatur intelligentia dictiorum,
cum apta inter se fiunt et copulata, quae sensu
coniuncta sunt. Veluti, si Cicero ad Diu. II, 2.
dixisset: *graui teste priuatus sum summi mei erga*
te amoris, patre tuo, viro clarissimo. Is cum suis
laudibus - - superasset omnium fortunam etc.
duo seiuincta membra essent: nunc vero copulan-
tur, cum dixit: *qui cum suis laudibus etc.* et haec
ratio est in omnibus, ubi *qui pro ego, tu, is, hic*
ponitur: ut ad Diu. IV, 5. *qui si affuisem etc.*
Similiter in principio periodi, aut membra, post
interpunctionem maximam, non in medio, ut imperiti
quidam faciunt, aut ab orationis totius initio,
pro *si* dicitur eleganter *quod si*, ut oratio ad praecedentia referatur. Estque omnino varius et multiplex
relatini apud elegantes scriptores usus, ad quem attendent elegantiae studiosi.

301. Sed est etiam aliorum pronominum ele-
gans usus, ut *et ego, tu, aliorumque, in oppo-*
nendo

nendo ac distinguendo, vbi ex ipso verbo intelligi possunt, sed adduntur eleganter: ut illud: *Ego vero, Serui, vellem, elegantius est, quam, Velle me vero Serui:* melius enim respondent verbis Sulpicii: qui si istic affuissem. Quoties in eam cogitationem necesse est et tu veneris, et nos incidimus saepe: quia per quos ea conficeri debet, ipsi pari molestia afficiuntur, ut magis ipsi videantur aliorum consolatione indigere, quam aliis posse suum officium praestare etc. Tolle ex his tu, ipsi: sensus saluus erit, elegantiae multum peribit. Nec minus eleganter idem copulandi causa ponitur, ut vir prudentissimus idemque liberalissimus: et pro etiam: deinde impudentia prosequor, sed idem sarciam: ipsum vi communicandi: paupertas et auaritia, quae ipsa paupertas est: item pleonasmus datiorum mihi, tibi etc. de quo mox: item elegantius est semetipse interfecit, quam semetipsum: elegans tres ipsi dies, eo sensu, quo tres omnino. Sed omnia commemorari non possunt. Admoniti his cetera ipsi animaduertent studiosi, legendis bonis scriptoribus.

302. Ut ad verba veniam, primum elegantia est magna, verbo substantiuo substituere aliud, quod modum, vel effectum, vel euentum aliquem rei cuique aptum, exprimat, vel saltem grandius, aut sonantius sit. Ex posteriori genere est reperiri, inueniri: ut apud Nepotem in Alcibiade: *liberalis, profusus reperiatur:* ex priori: *rupto iacuit corpore, pro rupta est: visor discessit pro fuit: causae steterunt, apud Horatium, pro fuere: Virtus contenta iacet: in semin: innatant vermiculi: in*

medio

medio ore attollitur nasus etc. pluribus locis cavitates deprimuntur: in aduersa capitis parte vultus patet; in palpebris ciliorum pili horrent: plena puellarum iam tibi nauis eat ap. Ouid. R. A. 488. vbi male libri quidam erit: estque saepe in his a librariis peccatum, non assequentibus elegantiam: et similia sine numero, quae attenti lectores in bonis auctoribus facile reperient.

303. In ceteris verbis magnae elegantiae est, ut iis, quae non rem simpliciter, sed simul motum, figuram, modum, et quodcumque attributum, vel effectum actionis, vel perpetuationis, exprimant. Eo in genere felix est Cicero, in primis in altero de natura Deorum, eiusque imitator in descriptione hominis Lactantius, Plinius maior, in primis Ouidius, aliquique poetae: habetque locum maxime in descriptionibus rerum naturalium, sed et in aliis, *aditus in semicirculi similitudinem circumactus: puteus ad magnam altitudinem depresso: turris ad m. a. sublata: in quibus verba elegantiora esse profectus, omnes vident, his, tergo quae concutit, vtitur armis, pro habet.*

304. Est etiam aliqua elegantiae pars in particulis, non modo uniuersis, si in iis, neque significatione, neque collocatione, aberres a vera et antiqua ratione, quam lectio, atque etiam bona Lexica docebunt: esset enim alienum a puritate, et fit tamen a multis in non paucis: verum etiam in nonnullis in primis, quae aliquantulum recedunt a vernaculae linguae consuetudine, et ab elegantioribus maxime scriptoribus, Cicerone, Caesare etc. frequentantur: ex quo genere pauca exempla

pla poneimus. Libenter Cicero vtitur particulis
sic et ita, interdum nude, interdum sequente *vt*,
sic, vt redundant plane, aut fere vim habeant pro-
nominis *hoc*, aut pro *hac conditione*, *caussa*, *con-*
silio etc. ponantur: *vt* in his: *quod ita sciunt Luc-*
ceii procuratores, *et ita Lucceius ipse ex literis*
tuis intellexit, *nullius apud te auctoritatem plus*
valere etc. *ita intercessit*, *quod etc.* i. e. *hac caussa*
allata: ita profectus est, *ut concionem relinquet*:
h. e. eo tempore, quo: sic disputat, *ut magis*
Stoicorum argumenta confutet, *quam religionem*
deleat, *h. e. hoc consilio etc.* item inuerse in hoc:
ut quisque est doctissimus, ita esse solet modestissimus.

305. Participiorum quoque usus, cum vniuer-
se elegans est in latina lingua, quoad seruiunt pe-
riodis struendis, de quo alio loco, omninoque
praedicatis eiusdem subiecti pluribus velut ad unum
reducendis, cum cetera epithetorum naturam in-
duant, aut alio modo cum subiecto copulen-
tur, cuius rei artificium legendu Cicerone,
in primisque Caesare, Liuioque, optime cognosci
potest, miris in hoc genere artificibus: tum in hoc
genere, cum substantiua abstracta, quae Dialectici
vocant, actionem aliquam significantia, praeser-
tim non satis usu vulgari frequentata, et si alias
proba, in participium conuertuntur, ubi non subie-
ctorum locum obtinent. Veluti, in oratione po-
pulari non satis eleganter dicas: *rei diligentiori*
consideratione affectus sum: sed re diligentius con-
sideranda, vel considerata: elegantius, magnorum
virorum virtutibus imitandis, quam virtutum imi-
tatione, et sic in ceteris. Hic locus diligenti ob-

seruatione indiget, ne talibus substantiis facile in tali forma vtamur, nisi valde trita sint et popularia.

306. Illa quoque obseruatio est, verba quae-dam esse nitidiora et magis ingenua, ut *taurus, bos, materia, custodia, saepe numero, nusquam etc. pro bos, vacca, lignum, cancer, multoties, nullibi.* Igitur diligenter hoc in genere videnda consuetudo elegantiorum, et cognoscendae obseruationes veterum Grammaticorum.

307. Atque etiam figurae quaedam sunt grammaticae, per quas, in certis locis, elegantia orationi accedit, ut ellipsis: velut, semper dicendum v. c. *nihil aliud, quam risit, omisso fecit: non modo, sed ne quidem, pro, non modo non: nescio an verum sit, non, nescio annon.* Item pleonasimus: velut in pronominibus: *cum ad mulieres ventum est, tum mihi fuit senes etc.* et repetitione verbi, gratae negligentiae vim habente: *is caussam habet, quam caussam ad te deferet: virtutes, quantas nemini cuiquam contigisse constat.* Etenim elegantior consuetudo, ut in nonnullis etiam non redundantia omittit, ita contra interdum redundantiam non modo non fugit, sed etiam sequitur.

308. Hoc quoque genus non est praeterendum, quod inest in quadam similitudine enuncian-di per eadem genera partium orationis: veluti, supra dixi elegantius esse, *huius temeritati nisi restitissim, quam huic n. r.* Sed si ita ponas, non absoluta sit elegantia. Nempe ut pronomen *huius conuersum est in substantiuum, sic etiam alterum ego, quod latet in verbo restitissim, exprimen-* dum

dum est per substantiuum vnum, aut plura, vt
Cicero fecit: *huius temeritati*, inquit, *nisi virtute*
et animo restitissim. Innumerabilia talia obserua-
bit diligens Ciceronis lector. Admonendi quidem
caussa vel hoc suffecerit. Sed infinitum foret
omnia talia commemorare, quae facilius, et effi-
cacious, traduntur a perito magistro in interpreta-
tione, tradimusque nos in primis diligenter in Ci-
ceronis interpretatione, qui est omnium optimus
elegantiae magister. Ceterum ad hanc elegan-
tiam etiam pertinet compositio verborum et struc-
tura: de qua in secundo capite agetur: ad *per-
spicuitatem* veniamus.

309. Ea est vel e singulis verbis, et dicendi
formis, vel e verborum structura. In verbis ipsis
existit partim ex ipsa puritate illa, de qua ante
actum est, in qua vel maxime perspicuitas specta-
tur, partim e proprietate. Sed *proprietas* non
vna re aestimatur. Primum igitur proprietas,
hoc quidem in loco, hoc est, rhetorica, non
grammatica, in qua nulla virtus est ad elegan-
tiam, esse dicitur in verbis iis, quae proprie de
aliqua re usurpauit consuetudo optimae aetatis:
vt in his: *dicere dictatorem, creare Consulem, lege-*
re Senatorem, cooptare Pontificem, capere Vestalem,
prodere Interregem, auctoritas de senatu, splendor
de equitibus, *honestas et gratia de plebeiis, sub-*
tilitas de philosophis, sanctitas de legatis etc.
quae verba omnia proprie de his generibus dicun-
tur. Igitur perspicuitatis studioſo videndum, vt
his loco vtatur: et ne confundat similia v. c. *stu-*
dium, diligentiam, industriam, assiduitatem: li-

beralitatem, clementiam, indulgentiam, quae vulgo confunduntur, dicatque proprie, hoc est, de iis rebus, quibus elegantiorum consuetudo attribuit. Non dicet *hominem fortem, bonum, clarum, sed virum*: non *virum gratum, iucundum, officiosum* etc. sed *hominem*. Obseruabit etiam solennia et propria substantiuorum epitheta, vt, in *consilio* spectari, vt sit *bonum*, et *fidele*, eaque vt non temere ponantur, sed cum dilectu et in loco. Difficilis est locus vterque et magnae obseruationis, sed magnopere commendandus eloquentiae (latinae) studiosis, quippe non magis perspicuitati prodest, quam reliquae elegantiae: in quo magna hodie adiumenta habemus bona Lexica, dictissimorum virorum obseruationibus locupletata, vt alios peculiares libellos Vauassoris, Vorstii, aliquumque mittam.

310. Impedient contra perspicuitatem non modo neglecta proprietas, sed vel maxime *ambiguitas*, cuius duplex cauſa est: primo in verbis ipsis, deinde in contextu, quo verba, alias satis perspicua, ita afficiuntur, vt ambiguitas existat. In verbis singulis est propter eam, quam homonymiam dicunt, tum, cum verba reliqua non valent ad intelligendum, quae significatio subiecta sit: quod secus est, vbi id sit data opera, vt iocus et dictarium existat, in quo genere est etiam acumen et venustas, vt saepe apud Ciceronem, nominatum in epistolis ad Trebatium. Sed maxime est in verbis iunctis, ex constructione, in primis vbi infinitius est inter duos accusatiuos, omninoque, vbi subiectum in incerto est, vt *patrem verberasse filium*:

filium: omnes socrus odisse nurus: Aio te Aeacida etc.

311. Existit vero obscuritas etiam e breuitate nimia, vt saepe apud Thucydidem in orationibus Tacituunque, cuius genus est etiam *αι αυταπόδοτον*: traiectione duriori et synchysi, hyperbato, *παρενθέσει* longiori et multiplici, cum sensus absoluto ita longe ab initio distrahitur, vt eam prosequi intentio cogitationis non possit.

312. Proprietati adiunxerim *popularitatem* orationis, cuius haec vis est, vt verbis utamur non nisi iis, quae in usu vitae quotidianaे versantur, eoque sensu, quo consuetudo communis usurpat, sed ita tamen, vt elegantia conseruetur: quod non parum diligentiae postulare, ipse Cicero agnoscit. Itaque non modo omnia verba vitabimus et genera loquendi, quae in scholis et in arte aliqua interiori usurpantur, sed etiam ea, quae sunt quidem in linguae usu, sed non peruulgato. Latini quam in eo diligentes fuerint hinc intelligas. Sempronia Lex est de pretio frumenti plebi vendendi. Id pretium sic definitur, vt modii singuli vendantur *semisibus et tridentibus*, non *decuntibus*: item Cicero dicit ad Diu. XIII, 29. Capitatem esse heredem fratris *ex parte dimidia et tercia*, non e *decunce*. Caussa nulla est nisi haec, quod verbum *decuntis* verbum scholae arithmeticæ et iuridicæ fuit, non consuetudinis vulgaris.

C A P. II.

De Ornatu e Tropis.

313.

Quae hactenus dicta sunt, valent ad munditiam quandam orationis, quae et ipsa aliquam delectationem habet: nunc de ornatu dicemus, qui maiorem voluptatem, atque etiam admirationem, et vim commouendi habet. In eo duo sunt videnda. Primum enim habet quandam quasi *materiem*, quae inest in tropis atque figuris: deinde *formam*, quae cernitur in collocatione verborum, structura membrorum, et numero: de quorum natura et usu iam videtur dicendum.

314. *Tropus* igitur est vocis cuiusque a propria significatione in alienam cum virtute quadam iminutatio. Eiusque commutationis tres fontes sunt: similitudo rerum, coniunctio, et disiunctio. Est enim haec ingenii humani indoles, id quod Philosophi demonstrant, ut facillime cogitando transeat ad res eas, quae praesentibus aut similes, aut coniunctae vel natura, vel arte, operaue humana, aut disiunctae sunt, eaque, quae vel similitudine, vel naturali aliquo vinculo, aut consuetudine, cogitatione, loco ac tempore, coniuncta sint, simul animo humano occurrere soleant. Unde non mirum, si ingenium humam etiam natura sua primum semper fuit in hanc partem, ut vocabula talium reruin permutaret, praesertim cum

cum et necessitatis quaedam ratio accederet, et sua-
uitas inuitaret, vnde cunque orta illa: neque enim
facile est, certi aliquid pronunciare. v. Cic. Or. III,
39. Et qui a similitudine quidem oritur tropus
metaphora vocatur: a coniunctione rerum *meta-
nymia* et *synecdoche* sunt: a disiunctione *ironia*.

315. Est igitur *metaphora* significationis pro-
priae in alienam immutatio, ob similitudinem,
quae rebus intercedit. Vnde fit, vt in omni me-
taphora sit similitudo, ad vnum verbum redacta
et conclusa, cuius quasi fundamento nitatur, tro-
pusque hic ita aut probetur, aut repudietur per se,
vt similitudo illa constet. Ea porro similitudo
vel simplex est, vel duplex et commutabilis, quae
analogia vocatur: veluti, cum pro causa *fontem*
dicimus, simplex est, siue vnius partis, similitudo,
nec *causa* pro *foste* dici potest: inter *regem* au-
tem et *solem* duplex est: itaque rex *sol regni*, sol
rex coeli dici potest: vnde existit genus metapho-
rae, quod *reciprocum* vocatur.

316. Sed cum aeque late *metaphora* pateat ac
similitudo, tamen delectus quidam est habendus,
neque, vt similitudo quaedam est, ita statim ver-
bum transferendum. Itaque canebimus, primum,
ne *metaphorae* ducantur a rebus parum similibus,
vnde oritur ea, quae durities in *metaphoris*, siue
audacia vocatur; veluti, si tonitru *tubam* vo-
ces, nisi, aut emolliendi particula vel formula,
μείλιγμα vocat Longinus, addatur, *veluti, quasi,*
ut ita dicam: aut addas epitheton, vt in illo, *coelestis*
tuba, aut in poesi, praesertim sublimiori, vtare,
cui magna in hoc genere datur licentia: *veluti*

Ho-

Horatius cum Euripide dixit, *ventum equitare per vndas*: aut denique usus ipse iam emolliuerit: veluti, non dubitem *coeli fornices* in carmine dicere, aut *nivem capitum*, et si Cicero et Quintilianus reprehendunt, ut durius translata, postquam non unus poeta bonus usurpauit utrumque. Huic vi-
tio simile est alterum, cum nimis longe repetitae metaphorae sunt, hoc est, a rebus, quae parum notae sunt, et visae auditaeque paucis: veluti Ci-
cero mauult *scopulum patrimonii* dici, quam *syr-
tim, voraginem bonorum, quam Charybdim*: sed has quoque usus paullatim emollit, qui adeo in hoc etiam consulendus.

317. Altera cautio est, ne metaphorae suman-
tur a rebus magnitudine nimis diuersis, et qui-
dem in utramque partem: sunt enim iusto maiores,
aut angustiores res significanda: veluti, si quis
montes *verrucas terrae* vocet, aut *solem* dicat
quemuis, honore aliquo in ciuitate aliqua orna-
tum. Sed fortasse in illo genere etiam aliquid
valet ad excusandum usus: tanquam *lampada coeli*
non dubitemus dicere solem, postquam Virgilius
aliique dixerunt: item consilium dicendi, si fiat mi-
nuendi aut irridendi caussa.

318. Tertia est, ut ne ducamus a rebus ob-
scenis, sordidis, atque abiectis: quo nomine Cice-
ro reprehendit eum, qui *Africani morte castratam
rem publicam, Glauciam stercus curiae* dixerat; ni-
si hoc posterius fortasse excusari potest, ut contu-
meliae augendae caussa dictum, quem ad modum
etiam in iocis locum habent. Etenim cum
vniuerse ista verba ab oratione elegantiae caussa
abesse

abesse debeant, ornatum afferre et suavitatem qui possunt? At contra probantur metaphorae a rebus honestis, pulchris, suauibus: quippe res, a quibus ducuntur, sua bona quodammodo communicant cum iis, ad quas nomina transferuntur. Sed maxime delectant eae, quae rebus vita parentibus vitam et actum tribuunt, omninoque attributa viuentium, ut Aristoteles, Cicero, omnesque artis magistri animaduertere: velut *herba sitit, moritur: domus, filia surgit.* Enimvero non minus suaves sunt, quae rebus incorporeis quasi corpus tribuunt: vt, *virtus sine aduersario flaccescit: dominatio conuelitur: ratio haec frangi conuellique non potest: siue, quod veluti ad sensus reuocatae maiorem perspicuitatem consequuntur, siue alia qua de caussa.*

319. In usu autem metaphorarum primum delectus requiritur hic, vt rebus aptissimas quaque praeferamus (§. 318.) deinde, vt in genere coepitae metaphorae persistamus, neque coniungamus diuersarum ac dissimilium rerum attributa. Id non tam sic ceperim, vt video vulgo Rethores, veluti Vossium: qui hoc non seruasse Ciceronem putat, cum dixit, *orationem exire atque in vulgus emanare:* nam huius generis innuenerabilia apud omnes auctores occurunt: nec in eo nimis acutus ac seuerus sim, vt v. c. putem hoc neglexisse Catullum in illo: *tenuis sub artus flamma dimanat:* etenim *igni* propter celeritatem motus ac transitus *tau fluere* propemodum proprie tribuitur: nec denique huic legi nimis adstringam poetas, quibus, cum exarserunt ingenii calore, non licet ita expendere omnia seuere ad praecepta magistrorum:

sed

sed sic potius capiam, ut subiecto, metaphorice expresso, ne tribuamus, quae isti metaphorae non conueniant, teneamusque, omnia, quae metaphorico verbo non conueniant, cum dicitur proprie, ea et aliena esse, cum dicatur translate. Sic, cum caussam, propter quam agas, dixeris *finem*, omnia reliqua verba esse debebunt ea, quae proprie de fine, qui proprie vocatur, dicantur, v. c. non dicas, *finis bonus, magnus, laudabilis* etc. non *finem habere, eligere, praeferre* etc. quae omnia proprie de fine non dicuntur: nec dices *gradum*, cum de initio aliquo, aut profectu in aliquo genere, veluti sapientiae, dicitur, *magnum* aut *perfustum* etc. sed *summum*, et sic in ceteris. Itaque Longinus S. 3. cum Hermogene de Ideis I, 6. recte improbat Gor- giam, qui dixerat *vultures esse sepulcraviva*: etenim *viva sepulcra* proprie nulla sunt. Neque assoluti sunt ratione huius reprehensionis, qui luc Ciceronis *bustum legum omnium et religionum*, Ouidii *bustum miserabile nati traxere*, vt Tollus et Pearchius: non enim *bustum viuum* dixere, sed *bustum* simpliciter, aut *miserabile*, quod de busto proprie dici potest. In hoc genere valde ineptos reperiet scriptores et oratores vernaculae linguae, qui volet attendere. Sed, ut dixi, hoc de subiectis, vel solis, vel maxime intelligendum: secus est, cum subiectum proprio verbo exprimitur: neque tum absurdum est, diuersas metaphoras tribuere. Veluti in hoc Horatii: *nemo adeo ferus est, qui non mitescere possit, si modo culturae patientem praebeat aurem*: in quo attributa quidem per diuersas metaphoras exprimuntur, sed subiecti verbum est proprium, cui nulla

nulla metaphorarum istarum repugnat: quod se-
cus foret, si subiectum esset metaphoricum, v. g.
si dixisset, *nullius ingenii agrum esse tam f.* etc.
Itaque cum Longinus, vt ineptum, repudiet,
vultures esse sepulcrorum viua, recte contra dicas v. c.
*Clodium, quoad vixerit, pestem religionum et bu-
stum legum fuisse.*

320. Illud quoque praecipere solent Rethores,
ne metaphoras nimis frequenteremus et condense-
mus, veriti, ne taedium aut obscuritatem afferrent.
Id vt non negem accidere posse, praesertim in ora-
tione tenui, et delectu neglecto, vniuersitate tamen
dictum, falsissimum putem: nisi vero etiam Pla-
to, Xenophon, Cicero aliique praestantissimi scri-
ptrores peccarunt, qui totas disputationes metapho-
ris compleuerunt, in descriptione corporis huma-
ni, Plato in Timaeo p. 1056. Xenophon in Me-
mor. S. I, 4. Cicero de Nat. D. II, 56. cf. Longinus

S. 32.

321. Ceterum quoniam in hoc tropo maximus
est ornatus orationis, quoad inest verbis, copia me-
taphorarum bonarum debet esse in promptu. Ea
optime parabitur lectione omnium bonorum poe-
tarum, oratorum, historicorum, inde ab Homeri
aetate: sed uberrimus fons est paratus in Socrati-
cis libris Platonis et Xenophontis, ex quibus, quic-
quid propemodum venustum, suave, et exquisitum
habent posteriores, sumferunt. Itaque hi maxi-
me legendi iis, qui ex purissimo fonte haurire,
atque se ad sensum pulchritudinis et suavitatis,
quae in hoc genere est, iudiciumque acuere, in-
genium autem alere ad hanc copiam velint.

322.

322. *Metonymia* est vocis a propria significacione in alienam immutatio ob coniunctionem externam: h.e. eam, quae essentiam non attingat; estque quadruplex, *caussae*, *effecti*, *subiecti* et *adiecti*.

323. *Caussae* verbum late patet, pertinetque ad efficientem quocunque modo, materialm, et finem. Primi generis exempla sunt: *Ceres*, *Bacchus*, *Musae*, *lingua*, *humanitas*, pro *frugibus*, *vino*, *poeſi*, *sermone*, *misericordia*: alterius, *aurum*, *argentum* pro *nummis aureis* et *argenteis*, aut *ornamentis*: quamquam hoc genus quidam ad Synecdochen referre malunt, quod materia essentiam rerum attingat: tertii, *custodia* pro *carcere*, aut *custodibus*.

324. Aequo late patet *effecti* metonymia, in qua effecto indicatur cauſsa. Primi generis est, *pallere*, *umbra*, *pernicioſe*, pro *timere*, *arbore*, *repertiōſa*: estque frequens etiam in epithetis, ut *pallida mors*, *tristis senectus*: secundi *panis* pro *farrē* aut *tritico*: tertii, *zonam soluere*, pro, *coire*. Sed posteriora duo genera sunt rariora. His duabus formis similis est ea, quae *antecedens* et *consequens* permutat, ut *memorem esse*, pro *gratum se praestare*, *cadere*, pro *interfici*.

325. *Subiectum* laxe admodum in hoc tropo accipitur, ut dicatur de omni re, cui aliquid inest, adeſt, denique, in quo aliquid occupatur: cui pari latitudine respondet *adiectum*. Huius formae sunt, cum dicitur possessor pro re possessa, signum pro signato, tempus et locus, pro re in tempore et loco, qui versatur in aliquo obiecto,

pro

pro obiecto ipso, et contra. Exempla his respondentia haec sunt: *Claudius* (praedium Cl.) *peperdit venalis*, *Gallia* (rex G.) *indignatur*: *apex* pro *sacerdotio*, *metus* pro *pallore*: *dies* pro *iudicio*, *messis* pro *anno vel aestate*: *coelum* pro *Deo*, *angelis*, *sideribus*, *Iupiter*, pro *coelo*: *dux* pro *exercitu*, *leges* pro *iudicibus*.

326. Ex quibus patet, quam varius et multiplex sit hic tropus, quinque foecundus adeo ad locupletandam elocutionem. Ceterum vis eius duplex est. Valet enim et ad ornatum, et ad copiam; sed magis ad hanc. Magis porro a poetis metonymia frequentatur, quam a ceteris scriptoribus: et sunt permulta genera, quae non nisi poetis licet usurpare. Ea quae sint, docebit usus, qui est etiam in hoc genere inconstans adeo, ut saepe in una forma variet. *Cererem* pro *pane*, aut *Bacchum* pro *vino* dicere, neino nisi poeta audiat: at ex eodem genere sunt *Mars communis*, *varius et aequus*, *invita et pinguis Minerua*, quae nemo extra poesin refugiat. Atque etiam, quid durum et audax in hoc genere sit, non nisi consuetudine satis iudicari potest. Haec igitur in primis obseruanda.

327. *Synecdoche* est permutatio verborum ob coniunctionem internam; qualis est inter totum et partes. *Totum* autem latius dicunt. Nam primum genus intelligunt cum suis formis, formam cum individuis, ut cum *mortales* dicuntur pro *hominibus*, *fidus* pro *sole aut luna*, *urbs* pro *Roma*, *poeta* pro *Homero*; et contra *abies* aut *alnus* pro *ligno*, *Tempe* pro *loco amoeno*, et in epistolis *Ernesti Initia*. L thetis,

thetis, pocula Acheloia, arcus Cydonius: permutationem speciei et individui *αὐτονόμωσίαν* etiam vocant: deinde totum, quod proprie dicitur, sed duplex: alterum, quod conflat materia et forma, cuius partes vocant essentiales, alterum, quod partes habet eas, quas integrales appellant. Prioris generis sunt haec: *homo pro corpore*, vel *anima sola*, *anima pro toto homine*: posterioris, *mare pro aqua marina*, *elephantus pro ebore*, *caput, pedes*, pro *homine*. Huic posteriori generi subiicitur permutatio numerorum, cum singularis pro plurali et contra ponitur, ut *Romanus* pro *Romanis*, *Cicerones* pro *Cicerone*: aut certis pro incerto, ut *sexenta exempla pro multis*: aut rotundus pro maiori et minori, ut cum *Olympias* dicitur habere *quinque annos*, *centum viri*, pro *centum et quinque*. Synecdoches species est *αὐτονόμωσία*, quae nomina propria permutat: nam olim nomen Latinis, ut Graecis *ὄνομα*, de propriis tantum dictum, de reliquis *vocabulum*, *λέξις*: velut cum patronymicum ponitur pro proprio, *Anchisiades*, *Aeneadae*, *Aearides*, pro *Aenea*, *Romanis*, *Pyrrho*, aut gentile, ut *Dux Troianus*, *Thessalicus*, pro *Aenea*, *Achille*, *Erycina* pro *Venere* etc.

328. Huius quoque tropi varius est usus, a consuetudine descendus. Nam quaedam genera simpliciter communia sunt omni generi scribendi, veluti permutatio numeri: alia sunt quidem et ipsa communia, non tamen absolute, sed ita, ut nonnullis verbis soli poetae uti possint: denique in toto eo, cuius partes integrales dicuntur, partes tantum nonnullas, hoc est, digniores, licet prototoco ponere, ut in aedibus tectum, lumen, fores,
non

non fenestras, scalas etc. Igitur et hic consuetudo sequenda.

329. *Ironia* est permutatio verborum ob disjunctionem: vt *vir bonus* pro *improbo*, *lumen curiae* pro *dedecore*. Est autem ironia duplex: altera, quam Atticam, aut Socraticam voces, quae nihil irrisio[n]is habet, sed contra suavitatis plurimum, vt *accusare*, pro *laudare*; quo genere pleni sunt libri Socraticorum: vid. v. c. Xenophon Mem. Socr. II, 6. 33. s. altera quae pertinet ad irrisio[n]em, cuius exempla ante posuimus. Ea intelligitur vel e pronunciatione, vel e contextu, vel ex adiectis particularis, *quippe*, *scilicet*, *vero*, etc.

330. Ad ironiam malum, quam ad synecdochen referri λιτότητα, quae minus dicit, quam intelligi vult: vtitur enim verbo contrario eius, quod vult intelligi: vt *non sperno*, pro *cupio*. Estque tenendum hunc tropum adeo non immi[n]uere, vt potius augeat: neque Liuius Polybium dixit *virum non contemnendum*, iniuria aliqua, et minuendi causa, sed per honorifice. Quippe hic non verba spectanda, sed consuetudo talium usurpandorum. Cicero cum Catilinam *inutilem ciuem* vocat, Virgilius Busiridem *illoudatum*, grauiissime locuti sunt. Verum hic vidit Clarkius ad Homerum, et dudum Casaubonus ad Polybium, Vossius et alii. Secus est, vbi tantum orationis varianda cauſsa haec ratio adhibetur, quod facile contextus indicabit, vbi tamen nec λιτότης est.

331. Neque minus ironiae subiectus est εὐΦημος, cum res odiosa et ingrata lenibus verbis exprimitur, vt *inferi* et *beati* pro *mortuis*, si quid ei

ei acciderit, pro si mortuus fuerit: ifque tropus plurimum valet ad elegantiam, de qua superiori capite actum est, ideoque diligenter animaduentus in lectione auctorum. Huc pertinet illud, quod apud Terentium, *recte* respondent, qui non hant perspicue negare. *Sarcasmus* autem, *Diarymus*, *Charientismus*, *Asteismus*, *Mysterismus*, *Mimesis* male ad ironiae species referuntur.

332. Sed sunt etiam quinque troporum affectiones, *metalepsis*, *allegoria*, *catachresis*, *hyperbole* et *emphasis*. *Metalepsis* est tropus duplex vel multiplex in eadem voce: siue, ut idem tropus duplicitur, siue, ut duo diuersi concurrant: velut in his: *post aliquot aristas*, *discinctum otium*, *fodere larem*, de apibus: in primo est duplex synecdoche, in altero duplex metonymia, in tertio metonymia cum metaphora. Hoc genus etiam in poetis rarum est, nendum ut in alio scribendi genere facile locum imueniat.

333. *Allegoria* est tropi eiusdem, in primis metaphorae, per integrain sententiam continuatio, differtque a tropi conseruatione, de qua supra dictum §. 319. quacum confunditur a non paucis. Nempe allegoria iusta totam aliquam sententiam tractat per unum tropi genus. Sic allegoria est, cum Socrates rationem conciliandorum amicorum ap. Xenoph. M. S. III, 6. et 11. per metaphoras a venatione et beneficiis, et in Symposio c. 4. a lenocinio, exponit, non, si dicam, *multos virtutis et suavitatis suaz lenociniis ad amicitiam pellexit*: in quo est mera tropi eiusdem in uno membro conseruatio. Allegoria porro est in hoc Horatiano:

Con-

*Contrahes vento nimium secundo turgida vela: non
in hoc: ut orationis meae velis benivolentiae ve-
strae aura adspiret.* Exemplum allegoriae per
metonymiam est in illo: *sine Cerere et Baccho fri-
get Venus, per avtoropuariorum est ap.* Virgil. Ecl. IV,
34. Ceterum allegoria potest degenerare in *aenig-
ma et fabulam.*

334. *Catachresis* est durior vocis ad alienam
significationem translatio: quae vnde oriatur,
quomodo mitgetur, dictum est in metaphoris:
nam quod de uno genere valet, ad omnia perti-
net. Quaedam catachreses usu ita emollitae sunt,
vt durities non animaduertatur amplius. His lice-
bit vti: a ceteris aut omnino, aut saltem extra
poesin, abstinebimus.

335. *Hyperbole* est tropus augens rem aut mi-
nuens supra modum: vnde interdum cum cata-
chresi concurrit: vt *candidior nixe: oceanus non
videtur tot res tam citq absorbere potuisse.* Pro-
bantur hyperbolae, si efficitur, vt non animad-
uertantur, recte praecipiente Longino: quod fit,
non uno illo, quem ipse tradit, sed pluribus mo-
dis: partim, si veluti prouerbiorum vim obtinent,
vt illud *candidior nixe;* quod cum est, nil nisi ex-
cellens aliquid in aliquo genere intelligitur con-
fuetudine: partim, cum res ipsa naturalem mo-
dum excessit, vt ex re nata hyperbole videatur:
partim denique, cum affectus vehementior eas ge-
nerauit, quo nihil efficacius est ad omne genus
duritie in tropis, atque etiam figuris, mol-
liendurn.

336. *Emphasim* rhetoricam (nam est etiam grammatica quaedam in verbis propriis) esse dicunt tropum plus indicantem, quam verbum proprium, cuius loco ponitur: velut, cum dicatur *ira incensus* pro *iratus*, *flagrare cupiditate* pro *cupere*. Alii tamen sic fortasse rectius definiunt, ut sit virtus altiorem praebens intellectum, quam verba per se ipsa declarent: ut in illo Virgiliano: *denissum lapsi per funem*: quibus verbis altitudo equi innuatur. Nam si rem vere reputemus, in illo genere non plus tropicis exprimitur, quam propriis. Neque enim v. c. *ira incensus* dicitur pro *iratus*, sed pro *volumenter iratus*, nec quicquam amplius in troppo. Omnino caudendum est, ne tropos urgeamus nimis, et ex iis statim emphases extundamus, quod plerique in interpretando faciunt perinepte: velut *indagare* et *investigare* verum apud Ciceronem de Offic. I, 6. non est aliud, quam quaerere, quocum verba illa permuntantur. Sed de toto hoc genere iudicandarum emphasium locus hic non est dicendi. Alterum autem genus emphaseos figura potius est, quam tropus: est enim etiam in propriis, ut agnoscit Quintilianus, nec magis in singulis verbis, quam in iunctis, aut adeo tota ad grammaticam referenda.

CAP.

C A P. III.

De Ornato e Figuris.

337.

Figura est quaedam orationis vulgaris et simplicis cum virtute immutatio. Virtus autem illa duplex est. Nam vel suauorem orationem facit, vel grauiorem, atque utraque de caussa affert orationi ornatum. Suavitatem porro afferunt vel sonu quodam, vel sensu, vel copia: nam et soni quidam natura delectant aures animosque, et quaedam sententiarum conformatio iucundior est, denique copia omnes natura capimur. Grauitatem autem efficiunt figurae vel eadem illa copia, si rei augendae exaggerandaque feruit, vel affectu aliquo commouendo. Atque ad hanc rationem etiam de figuris exponemus. Est denique figura ipsa duplex, altera in verbis, altera in sententiis.

338. *Figurne verborum* hae fere suauitati serviant: ἀντανάκλασις, seu *dilogia*, πλοκή, ἐπανάληψις, ἀναδίπλωσις, ἐπάνοδος, πολύπτωτον, ταργυμένον, παρέχησις, παρονομασία, ὁμοιοτέλευτον, ὁμοιόπτωτον.

339. *Αντανάκλασις* est, cum idem verbum bis, sed dupli sensu ponitur, ut in his, *dedit ei praerogatiuum suae voluntatis eiusmodi*, *ut ei pro praerogatiis iam reddidisse videatur*: *amici viuimus*, *dum viuimus*. Eius species est *πλοκή*, quae rei nomen bis ponit, ita, ut semel ipsa, semel at-

L 4

tribu-

tributum eius intelligatur, vt in hoc Ouidii: *talis erat mater, si modo mater erat*, et Homerico illo *Αχαιοὶ ἐκ Αχαιοῖ*.

340. *Ἐπανάληψις* est, cum idem verbum est in principio praecedentis et fine sequentis membra, vt in hoc: *Ambo florentes aetatis, Arcades ambo.* *Ἀναδίπλωσις* est in fine primi et initio secundi, neque modo in singulis verbis, sed etiam pluribus: *sequitur pulcherrimus Astur, Astur equo fidens:* *principum dignitas erat par; non par fortasse eorum* etc.

341. *Ἐπάνοδος*, cum ordinem dictorum inuenimus: *quod sequitur fugio, quod fugit ipse sequor.* *Πολύπτωτον* eiusdem nominis variis casibus, verbi variis personis ac temporibus, repetitio: *res cum re, caussa cum caussa, ratio cum ratione pugnabit:* in quo triplex polyptoton est: *infidias factas esse constat, et id est, quod senatus contra rem publ. factum iudicavit: ab utro factae sint, incertum est,* etc. Nobilissimum exemplum in verbo est apud Homer. Odyss. τ. 204. Ceterum interdum in repetitione hac non tam est figura, quam negligentia, interdum non ingrata: cuius generis exempla sunt multa apud Liuium, etiam Ciceronem; quale est illud ipsum, quod iam e Milonia produximus. Videndum igitur, vtrum aliqua idonea de caussa positum sit, an exciderit potius polyptoton. Ciceronem quidem libenter vti in nonnullis, praesertim adiectiuis, vt *multus, omnis*, etc. reperient, qui attenderint.

342. *Παρηγυμένον* est coniunctio coniugatorum, item simplicium et compositorum: prioris generis

ris hoc est: *et nati natorum, et qui nascentur ab illis: sua se manu interemis: posterioris in illo graeco: ἔγενον, αὐτέγενον, νατέγενον: et in omnibus fere oxymoris, ut in δώροις ἀδώροις.* In ea figura saepe est etiam *παρέγκλησις*, quae est in similibus verborum iunctoruim initiis, ut in illo *et nati natorum*: quod genus non modo non refugerunt veteres, ut obseruat Seruius ad Virgilium, sed etiam quaesuerunt in nonnullis. Cicero quidem libenter vtraque figura vtitur, vt polyptoto. Similis est *Paronomasia*, quae est leuis verbi mutatio, fitque una et idem altera litera vel mutanda, vel transponenda, vel addenda aut detrahenda: *Est incepio amentium, haud amantium: neque pietam, neque fictam imaginem suam passus est esse: video me a te non conueniri, sed circumueniri.*

343. Ομοιοτέλευτα sunt, cum verba plura similiter definunt, suntque plerumque etiam ομοιόπτωτα: ut in illis Ennianis apud Ciceronem: *haec omnia vidi inflammati, Priamo vi vitam euitari, Iouis aram sanguine turpari.* Sed haec quoque saepenumero excidunt scriptoribus per negligentiam, ut in illo Ciceronis, *fortis animus et magnus duabus rebus cernitur, et aliis:* quae discernere facile erit e contextu.

344. Et in harum quidem figurarum usu hae cautiones sunt: prima, ut ne studiose quaerantur, suntque ita rebus aptae, ut ab iis natae, non a diciente excogitatae esse videantur: secunda, ne nimis frequententur: quaestiae enim videntur, et satietatem afferunt frequenter positae: tertia, ut usum bonorum scriptorum consulamus, et sequa-

mur, vt in polyptoto et parechesi. In quo genere dicendi locum habeant, suo loco dicetur.

345. *Grauitati* profunt hae: *ellipsis*, *pleonasmus*, *asyndeta*, *polysyndeta*, ἐπιφορά, συμπλοκή, ἐπίγευξις, κλίμαξ. "Αὐξησιν et λιτότητα, siue ταπεινότητα, non addam: sunt enim potius tropi, hoc est, permutationes verborum.

346. *Ellipsis* rhetorica (nam etiam grammatica est, quae elegantiae seruit interdum, vt supra dictum) est omissione verbi cum aliqua vi: quae certatur in exprimendis affectibus, vt in illo Ciceroniano in Verrinis: *huncine hominem?* *hancine impudentiam?* *hancine audaciam?* In redundancia contra est *pleonasmus*, habente aliquam vim in affirmando vel mouendo: nam in ceteris grammaticus est, de quo alibi: vt *his auribus audiui*: in quo fortior affirmatio est. Vtrum grammaticae an rhetorice usurpentur, locus quisque indicabit. *Asyndeton* est in omissione frequenti copulae: *Polysyndeton* in frequentatione. Vtrumque suo loco usurpatum magnam vim habet: illud in celeritate, incitatione animi, multitudine exprimenda, hoc in multitudine et magnitudine: unde plurimum sublimitati prodesse docet Longinus S. 19. 20. 21. si loco idoneo usurpentur, obesse, si alieno.

347. *Επιφοράν* vocant repetitionem clausularum: cuius graue genus est hoc, quod repetit responsionem eandem aliquoties post plures interrogaciones, magnamque vim habet in augendo et exaggerando. Tale est hoc Ciceronis: *Doletis tres exercitus populi R. interfectos? interfecit Antonius.*

Desi-

Desideratis clarissimos ciues? eos quoque vobis eripuit Antonius. Auctoritas huius ordinis afflictior est? affixit Antonius. Eique simillima est συμπλοκή, quae etiam initia similia habet, ut in Agr. II, 9. *Quis legem tulit? Rullus.* *Quis maiorem partem populi priuauit suffragiis? Rullus.* *Quis comitiis praefuit? Rullus* etc. Extra quam in eo, quem dixi, loco talibus uti, ineptum et frigidum sit. Neque minorem vim habet επιζευξις, quae verbum repetit cum vi: *Nos, nos, dico aperte, consules desumus: fuit, fuit haec quondam in rep. consuetudo: nunc, nunc insurgite remis.* Plerumque etiam haec vis est gradationis, quae eodem verbo sequentia antecedentibus iungit, ut in illo Ciceronis: *in urbe luxuriae creatur; ex luxuria auaritia existat necesse est: ex auaritia erumpit audacia: inde omnia sceleria et maleficia gignuntur.* Item in illo Ouidiano: *Viderat hanc, visimque cupit, potiturque cupita:* ubi eleganter celeritatem exprimit.

348. His omnibus latius patet usu anaphora, quae est eiusdem verbi in principiis frequens repetitio; cuius ne exemplum quidem attinet ponere: habetque magnam vim in ornandis argumentis gravioribus, et amplificando. Ea hodie valde abutuntur vernaculi oratores, qui etiam in interpretando, definiendo, tenuissimisque rebus explanandis, frequentant, putantque, se egregie viuidam, ita enim loquuntur, orationem effecisse, cum frigidissimam reddiderint. Commoti animi est haec figura, et commouentis oratoris. Iam ardebat Cicero, cum vteretur illis: *nihilne te nocturnum palatum, et reliquis. Quare tirones admoniti sibi ab ista peruersitate cauebunt.*

349.

349. Ad copiam ex hoc genere figurarum duas valere dixerim, *synonymian* et *ἐξεγασίαν*, siue *επιμονήν*. Verum istae, ut opinor, proprie figurae non sunt. Itaque de iis dicemus in capite, de copia. Atque etiam in *figuris sententiarum* sunt plures, quae non sunt vere figurae, hoc est, immitationes vulgaris orationis, et quidam quasi gestus venustiores aut grauiores, sed potius fontes copiae, ut *digressio*, *periphrasis*, *definitio*, *distributio*, *congeries*, *gnome*, *vōημα*, *aetiologya*, *exemplum*, *similitudo*: de quibus adeo proximo capite agemus, partim supra egimus.

350. Quae autem proprie figurae rerum dicuntur, ex iis ad suavitatem maxime valent, quae *antitheta* et *oxymora* dicuntur, *periphrasis*, item *inopinatum*. Sed inopinatum (*παρα προσδοκίαν*) iocis et dicteriis seruit, quae in epistolis, dialogis et comoediis locum habent, non facile, hodie quideam, in oratione: *antitheta* autem et *oxymora* in omni oratione locum habent.

351. Et *antitheta* quideam sunt, cum contraria contrariis opponuntur: quod fit tripliciter, vel sic, ut verba singula singulis, vel bina binis, vel sententiae sententiis opponantur: ut in his: *ex hac parte pugnat pudor, illinc petulantia*: *hinc pudicitia, illinc stuprum*: *hinc fides, illinc fraudatio* etc. *Catil. II, ii. non me poenitet mortales inimicities, amicities sempernas habere: dominetur in coniunctionibus, iaceat in iudiciis*. Huic tertio generi similis est ea, quam distinctionem dicunt: *populus Romanus priuatam luxuriam odit, magnificentiam publicam diligit*. Referri hoc possunt

possunt etiam sententiae e contrariis, et enthymema (§. 154. 155.) et ἀντιπαραστάσεις sive ἀντίστο-
Φαί (§. 171.) et ἐπάνοδος, quae, qua sententiam
ἀντιμεταβολὴ dicitur. Oxymorum autem est e
disiunctis et repugnantibus, vt: *insaniens sapien-
tia, concordia disors, otium negotiosum* etc. cuius
generis magna copia congregata a Rittershusio ad
Oppianum: item *cum ratione insanire: deceptaque
non capiatur.*

352. Iam in his esse magnam suavitatem suus
queinque sensus docet. Ea oritur e contrariis, qui-
bus, vt alibi dictum, natura delectamus: e breui-
tate porro, quae ab his nunquam abest: denique
in nonnullis etiam e numero, qui in iis sponte
nascitur, vt alio loco videbimus. In oxymoro
etiam ex hoc, quod speciem falsi praefert, sub
eoque latet verum: in quo intellecto existit quae-
dam acuminis species, qua et ipsa capitur animus,
interdum etiam admiratio.

353. Atque hac de causa omnes scriptores, qui
acuti esse vellent, et ingenii ostentationem, dele-
ctionem admirationemque legentium vel au-
dientium maxime spectarent, oratores, poetae, hi-
storici, frequentes fuerunt in his figuris, veluti Iso-
crates, Ouidius, Plinius, Tacitus, Seneca. Neque
refugiunt alii, in grauiori genere dicendi, sed sunt
in iis moderatores: quos sibi imitandos putabit
eloquentiae verae studiosus. Ceterum antitheta
non modo ad delectandum, sed interdum etiam ad
inouendum valent, vt multis exemplis apud Demo-
sthenem et Ciceronem patet, praesertim in obiur-
gatione et reprehensione grauiori, quae sit per
com-

comparationem, ut apud Thucydidem I, 70. in oratione Corinthiorum.

354. *Periphrasis* alia copiae seruit, alia ornatus suauitati: posterioris generis est (nam priori hic non vtimur) cum res non suo verbo appellatur, sed pluribus verbis exprimitur, vel augendi, vel minuendi caussa, vel saltem occultandae turpidinis alicuius, quae est in proprio verbo. Tale illud in Miloniana: *fecere serui Milonis, quod quisque suos seruos in tali re facere voluisse*, pro interfecere Clodium: cui simile est in Lysiae Or. I. p. 15. et Midiana Demosthenis.

355. Ad grauitatem autem pertinent figurae haec: *Praeteritio, communicatio, occupatio, dubitatio, concessio, interrogatio, correctio, incrementum, diatyposis et hypotyposis, sermoninatio, proposito popoeia, exclamatio, epiphonema, aposiopesis.*

356. *Praeteritio* est, cum maxime, sed breuiter, dicimus, quae nos non dicturos simulamus: quod fit in primis in leuioribus, quae enucleata leuitatem maxime conspicuam faciunt, et in argumentorum condensatione, de qua supra §. 221. unde vis huius figurae facile intelligitur. Exempla egregia sunt apud Ciceronem Manil. c. 16. Agrar. I, 7. etc. *Communicatio* est, cum auditores in consilium vocamus, ipsis, atque etiam aduersariis, iudicium permittimus: quod prodest in priori genere ad conciliandos oratori auditores, in utroque ad aequitatem caussae intelligendam. *Occupatio* est, cum id quod contra nos dici potest, proponimus atque diluimus; quorum prius *ὑποθέσεις*, alterum *αντιθέσεις* vocant: estque potius genus refel-

refellendi, de quo supra §. 224. *Dubitatio* est, cum simulamus nos nescire, quid priuum, aut quid maxime dicamus, vel ad docendum, vel ad mouendum: quorum illud indicat copiam rerum et argumentorum, hoc magnitudinem vel bene vel male facti. Exempla efficacissimae dubitationis vid. ap. Cic. Muren. c. 41. qui locus expressit Gracchanum illud de Or. III, 56. Mil. 37. v. plura ap. Manut. ad Cic. Verr. V, 48. *Concessio* est, cum aliquid, quamvis falsum aut iniquum, concedimus, ut grauiora fiant reliqua: indicat enim fiduciam in iis, quae dicturi sumus, facitque simul attentum auditorem. Ethae quidem in docendo maxime usurpantur.

357. Sed et in hoc, et genere παθητικῶν, frequens est usus *interrogationis*, quae, ubi vulgo recto sermone utimur, aut eo uti licet, cum inflectit interrogando. Ea valet primum ad persuadendum in docendo: quia non videtur interrogatus fuisse orator, si quid in contrarium dici posset: deinde ad variandam orationem: tertio ad affectum exprimendum: quia omnes natura utimur interrogationibus, cum commotiores sumus: praesertim si coniuncta sit cum *Apostrophe*, quae est allocutio vehementior eius, ad quem oratio proprie non dirigitur, ut rei, in oratione ad iudices: cui subest etiam iuriandum, quod ubi loco ponitur, efficacissimum est: quale est Demosthenicum de Coron. c. 60. Etsi autem nulla figura aequie frequenter uti licet, tamen cauendum est, ne immodece utamur, cum uniuersitate, tuim, cum docemus, praesertim res tenues. In quo peccant no-

uitii

uitii oratores vernaculi, qui ita compleant orationes interrogationibus, ut obtundant enecentque auditores, non excitent, frigidamque reddant orationem, non viuidam et incitatam.

358. Augendo exaggerandoque seruiunt *Correlio*, quae tollit, quod dictum est, et melius grauiusque reponit: *quam enim illi iudices, si iudices et non parricidae patriae nominandi sunt, grauiorem neip. potuerunt infligere securim.* O! clementiam populi Romani, seu potius patientiam miram et singularem: *Incrementum*, ἀνέστω Graeci vocant, cum quasi per gradus ab infimo ad summum progrediuntur. *Vixit? immo etiam in senatum venit, sit publii consilii particeps, notat et designat oculis ad caedem unumquemque nostrum.* cf. pro Quint. c. 31. Phil. II, 25. vid. inpr. Quintil. VIII, 4. init.

359. Est etiam grauis ad mouendum, et ad delectandum suavis figura, cum res acta verbis ita exprimitur, ut oculis subiecta videatur: *diatyposis* dicitur, cum exquisitor est et copiosior: *hypotyposis*, cum simplicior et brevior: cuius generis luculentissima exempla sunt apud Demosthenem et Ciceronem. Demosthenis in primis nobilis est de Coron. 53. ἐσπέρα γάρ τοι etc. Ciceronis est Phil. II, 20. 41. Plin. P. 22. cf. Quintil. IX, 3. In quo genere maxime artis est, diligere prudenter *περιστάτεις*, quae consilio narrantis, et exprimendae rei augendaeque seruant v. Longin. S. 20. Neque minus efficaces *sermocinatio* et *prosopopoeia*: quarum illa loquenter inducit personam: haec vitam et orationem tribuit rei vita carenti. Illius pul-

pulcherrimum exemplum est in Mil. 34. huius in Catil. I, 7. Sermocinationi vicina est ἡ θονοῦα, quae non modo mores hominum, sed etiam dicta imitando exprimit: de quo genere dictum est capite de moribus.

360. *Exclamatio* quid sit, vox ipsa indicat. Ea vtendum est, vbi res magnas et graues persuaseris, et in graui motu animi, non in leuibus, subtilibus, docendis: cauendaque ineptiae eorum, qui v. c. post qualemque argumentum exclamando confirmant, graue esse: quippe alias nemo animaduerteret, aut crederet. Ei vicinum est *epiphonema*, post narrationem, aut demonstrationem, exaggerationem rei grauis subiecta exclamatio. *Tantae molis erat Romanam condere gentem!* ap. Virgil. *Tantum religio potuit suadere malorum!* ap. Lucretium. Enunciaturque interdum per interrogationem, ut apud Silium: *Heu! quantae scelerum causae mortalibus aegris, natum necire Dei?* Huic subiiciens *Aposiopesin*, quae abrumpit sermonem: *Quos ego: sed motos praefat componere fluctus:* estque efficacissima, cum sit propter gratiam coimotionem animi.

361. Ceterum etsi usum figurarum satis declaratum puto, cum ipsa distributione, tum adspersis subinde admonitionibus: tamen non piget adiicare verba Quintiliani e IX, 2. *Sicut ornant orationem figurae, opportune positae, ita ineptissimae sunt, cum immodece petuntur.* Sunt, qui, neglecto rerum pondere, et verbis sententiarum, si vel inania verba in hos modos deprauarint, summos se iudicent artifices, ideoque non desinunt eas neclere: quas Ernesti Initia. M fine

sine sententia sectari, tam est ridiculum, quam quare
rere habatum, gestumque sine corpore. Sed ne haec
quidem, quae recte fiunt, densandae sunt nimis:
nam et vulnus mutatio, oculorumque coniectus, mul-
tum in actu valet: sed si quis ducere os exquisitis
modis, et frontis ac luminum inconstantia trepida-
re non desinat, riteatur. Et oratio habeat rectam
quandam velut faciem: quae ut stupore immobili
rigore non debebit, ita saepius in ea, quam natura
dedit, specie continenda est. Siendum vero in pri-
mis, quid quisque in orando postulet locus, quid per-
sona, quid tempus. Maior enim pars harum fi-
gurarum posita est in delectatione. Vbi vero atro-
citate, inuidia, miseratione pugnandum est, quis
ferat contrapositis, pariter cadentibus, et consimili-
bus irascentem, flentem, rogantem? cum in his re-
bus cura verborum deroget affectibus fidem: et ubi
cunque ars ostentatur, veritas abesse videatur.

CAP. IV.

De Ornatu e Compositione, structura
et numero.

362.

De materia ornatus, tropis et figuris, dictum est:
restat de forma, quae est in compositione sin-
gulorum verborum, structura membrorum, et nu-
mero. Collocatio igitur verborum pertinet eo, vt
in singulis verbis extrema cum primis concurrant
non

non aspere, aut inepte. Asper concursus est, pri-
mum in hiatu, qui existit, si verbo priore in voca-
lem desinente, posterius a vocali incipit, adeoque
offendit aures, ut olim, Cicerone auctore, Or. 44.
nemo tam rusticus fuerit, quin vocales noluerit
coniungere. Sed aliae vocales aliis leniorem du-
rioremque efficiunt. Neque minus asper concur-
sus est interdum consonantium et vocalium, ut si
dicas *at aliam*, omninoque post *at* verbum sit in-
cipiens a vocali: sed in hoc genere minus acute
audimus hodie. Ineptus autem ac ridiculus est
concurrus, vbi exoritur, quod detorqueri in sen-
sum obscenum possit, qua de causa latinos potius
dixisse *nobiscum* constat, quam *cum nobis*.

363. Laevis contra et suavis est collocatio, vbi
vel consonantes cum vocalibus concurrunt, vel con-
sonantes eadem: nam ita coeunt verba prope in
vnuim, possuntque pronunciando coniungi et con-
glutinari, vt interualla non animaduertantur. In
quo genere inter Graecos diligentissimus Isocrates,
cuius loca eiusmodi, vt et Sapphus carmen simili
laeuitate, profert Dionysius de Structura Sect. 23.
Exemplum e Cicerone hoc sit: *hae sunt impiis
assidue domesticaque Furiae, quae dies noctesque
parentum poenas a conseleratissimis filiis repetunt:*
in quibus non nisi quater consonantes concurrunt.
Sed in hoc genere haec cautio est, ne nimis dili-
genter fiat: esset enim putidum: nec in omni ge-
nere orationis. Nam interdum etiam asperitas
conuenit, et in oratione tenui negligentia con-
struendi.

364. Illud quoque non alienum sit monere, et si elegantiae magis est quam ornatus, obseruan-
dam esse consuetudinem in iungendis verbis, ut
quod priori, quod posteriori loco ponendum sit,
teneamus. Nam et si ordo alias liber est, tamen
in nonnullis certus vsu fit, aut alia qua de caussa.
Sic dicendum semper *Lipsia urbs, Albis flumen,*
Pompeius, vir clarissimus, fratres germani et ge-
mini: deinde, quod dignius est et maius, vel prius,
vel commune, praeponeamus: item, ad quod ma-
xime attendi velimus, ut *grauit teste priuatus sum.*
Sed tamen in hoc posteriori genere nihil satis cer-
tum: faltem poetae huic legi non sunt adstringen-
di, nec aliquid in talibus temere apud veteres mu-
tandum.

365. Verum in verbis etiam sonus ipse spe-
ctatur: non modo hactenus, ut sonantioribus ver-
bis vt amur et grandioribus, sed etiam ut gentis li-
terarum naturae rei sit congruens. Nam aliae
vocales sunt grandes et clarae, aliae obscurae et
minutae: consonae porro aliae lenes, aliae aspe-
rae. Harum igitur etiam in delectu verborum
ratio habenda: nec non elegantioris consuetudi-
nis in verbis contrahendis, omninoque in pro-
nunciando.

366. *Membrorum structura* (*κάλων αρμογήν*
Dionysius appellat) quae maxime vincit reddit
orationem, efficit eam, quae *περίοδος* graece, latine
ambitus, comprehensio, circuitus vocatur: de qua
paullo accuratius dicendum videtur: cum pleros-
que, etiam doctos, atque adeo de eloquentia pra-
cipere ausos, videam, vii periodi non satis affecutos.

367.

367. Vniuersus igitur *periodus* est, cum sensus perfectus suspenditur per interiecta membra, quae ambitum efficiunt. Id quale sit, clarius intelligitur e formis periodi, et eius structura. *Simplicis* igitur est, in qua est vna sententia principalis, sed ita, vt a subiecto ad attributum transitus sit, siue a parte vna principalis sententiae ad alteram, per interpositas enunciationes secundarias. Secundariae autem exponunt caussas, conditionem, *περιστάσεις* temporum, et similia. Exempla sunt to haec e Cicerone: *Tutores, pecuniam praetori, si pupillae nomine darent, praesertim grandem, quemadmodum in rationem inducerent, quemadmodum sine periculo dare possent, non videbant.* Vides, vt a subiecto *tutores* ad attributum *non videbant* transitur per ambages, primum antecedentis, *si pecuniam pupillae nomine praetori darent, praesertim grandem*, deinde alterius illius, *quemadmodum etc.* Porro: *Is ita sibi persuadet, quod in tua prouincia negotii habet, nisi, te prouinciam obtinente, meis commendationibus confecerit, id se in perditis et desperatis habiturum.* Prima pars sententiae principalis est: *is ita sibi persuadet: altera: se in perd. a. d. h. negotium, q. in t. p. h.* Ambitus est duplex, primus a praeposita re, de qua agitur, *quod i. t. p. h. n. alter a conditione: nisi t. p. o. confecerit.*

368. Fundamenta autem huius structurae sunt haec: Primum, quae natura, tempore, cognitione priora sunt, ea etiam priorem locum defiderant, idque fere indicant particulae coniuncti-

uae, *cum*, *si*, *quoniam*, *et si*, et aliae: alterum: quae natura sunt copulata, vt antecedens et consequens, caussa et effectus, ea etiam eadem periodo comprehenduntur, eo ordine, quo dictum: tertium: membra, quae a relatiuo pronomine incipiunt, aut alio verbo relatiuo, vt *quantus*, *qualis*, *quoad*, *quemadmodum*, ea praeponenda, vt ambitum efficiant.

369. *Composita periodus* est ex antecedente et consequente, vel uno, vel pluribus: vnde bimembres, trimembres, et quadrimembres dicunt. Hic primum, quod antecedens est natura, et cogitatione, id etiam debet esse loco, in periodo: deinde, in antecedente et consequente struendo eadem tenenda, quae in periodo simplici. Vnum exemplum apposuisse sat erit e Cicerone, sed dissolute (dissoluta enim et dissipata opponuntur vinctis periodo) *Faciendum mihi putavi, ut tuis literis breui respondearem, cum tu tam multis verbis ad me de improborum oratione scripisses: et si videbam, quantum ex tuis literis intelligere potui, te hanc epistolam esse lebaturum, cum ad urbem esses, refrigerato iam leuissimo sermone hominum prouincialium.* Hic primum pars ea, quae ab *et si* incipit, esse antecedens debet, cum ipsius particulae caussa, tum quia natura prius est, quod in ea inest: impedimenti enim cogitatio prior est eius sublatione: deinde in illa ipsa membrum, *quantum ex tuis literis intelligere potui*, propter relatiuum *quantum*, praeponendum verbo sic: *et si, quantum, e. t. l. i. potui:* tertio, membrum *cum ad urbem esses*, eadem de caussa, et propter rei naturam prius est, quam lectio: vnde fit:

fit: *te, cum ad urbem esses, h.e.e. lecturum: poteratque etiam praeponi alterum, refrigerato i.s. l.h. p.* denique in consequente membrum, *cum tu tam multa etc. prius esse debet, eadem de causa, qua principale, faciendum mihi putavi, sic: tamen (quod accedit, quia factum est consequens) cum tu t.m. verbis etc. faciendum mihi putavi, ut etc.* Atque ita sit pulcherrima periodus bimembris: qualis planissime est apud Ciceronem ad Div. III, 8.

370. Atque ad hanc formam et de aliis iudicari, aliaeque strui debebunt: proderitque ad hunc modum dissoluere bene structas periodos et membrorum structuram demonstrare. Idque ut faciant subinde magistri in veterum graecorum latinorumque interpretatione, auctor sum. Cetera, quae de periodis in vulgaribus libellis traduntur, nullum, neque ad intelligendum verum periodorum artificium, neque ad eas struendas profunt. Itaque ab iis libenter abstineamus.

371. Ceterum hoc artificium inuentores habuit Thrasymachum, Gorgiam, aliosque illius aetatis Sophistas. Nam apud Herodotum, Thucydidem, et antiquiores nullum eius vestigium: quod et animaduertendo inter legendum obseruari potest, et dudum obseruauit Cicero Or. 65.71. nisi si quid eis eiusmodi excidit, quod fortuitum potius esse, quam consilio positum, facile appareat. Inuentum autem est, tam, ut suavitas orationi conciliaetur, quam, ut perspicuitas, ut recte Aristoteles ipse iudicat Rhet. III, 9. Ordo enim rerum, et naturalis copulatio, melius et facilius intelligitur in oratione vincta, quam dissoluta, et in parua membra

bra consecuta. Desuit post apud Graecos usurpari, vitio in primis, et opera Dialecticorum, et Stoicorum, ut e Dionysio l. c. c. 4. intelligas.

372. Usus periodorum latissime patet, habetque in omni genere dicendi locum. Nam inter Graecos etiam philosophi, in dialogis, frequenter utuntur, ut Plato, et Xenophon, qui in vincienda oratione simillimus est Cicero: et inter latinos Cicero, in epistolis, et philosophicis libris, Caesar in Commentariis, et si simplicissime scriptis, tamen saepe longis periodis utuntur. vid. v. c. B. G. VI. 36. *Cicero, qui etc. VII, 33. Caesar et si, etc.* Unde etiam patet, non veritos esse elegantissimos scriptores, ne perspicuitati obessent. Cauendum tamen, primum, ne sint iusto longiores, et ita impeditae potius, quam structae, ut aut obscuritas existat, aut intentio audientium fatigetur: deinde, ne sint continentes ac nimis frequentes: habet enim aliquam affectationem artificii, et fatigat. Periodi longiores πνέυματα, et τάσεις vocantur: πνέυματα, quae uno tamen spiritu pronunciari possunt; τάσεις, quae ne hoc quidem.

373. Itaque etiam sine periodis dicendum; quod fit, vel per *incisa f. commata*, vel per *membra f. colla*. *Incisum* est, quod per paucis verbis constat; eiusque fines ita describunt veteres, ut non ultra octo syllabas ei concedant: cetera vocant *membra*: oratioque dicitur *membratim fusa*, ubi membris disolutis utitur. *Incisa* sunt illa Stoicorum de dolore consecatoria: si longus, leuis: si grauis, breuis. *Membra* dicunt esse haec: Nonae sunt hodie *Sextiles*: hora nona conuenire coepisti: hunc diem iam ne

ne numerant quidem etc. *Oratio dissoluta* est, quae vel per incisa, et membra abrupta, progreditur, vel membra aliquo quidem modo per particulas iuncta, sed non structa ea, qua ante demonstrauimus, ratione: quae vulgo etiam in periodis numerant.

374. *Numerus*, graece πυθμός, (nam μέτρον est poetarum numerus, qui est in prosa vitiosus, sed tamen subinde excidit optimis scriptoribus) est quaedam orationis conformatio, delectans aures ipso sono: inuenta illa ab iisdem, quos ante commemoravi, Sophistis, perfecta ab Isocrate. vid. Cic. Or. 52. Existit autem numerus sua sponte, pri-
mum e periodis, deinde sententiarum quadam conformatio et concinnitate, velut ex antithetis, ex entymemate eo, quod est e contrariis per interrogationem, item, cum paria paribus referuntur: vt, in his pro Mil. 4. *Est haec non scripta, sed na-
ta lex; quam non didicimus, accepimus, legimus* etc. et pro Roscio Amer. 26. *quid tam est commu-
ne, quam spiritus viuis, terra mortuis* etc. Hoc genus frequens est apud Isocratem.

375. Efficitur autem insuper numerus certis pedibus in principio et clausulis, eorumque permissione in medio. Principe in hic locum tenent clausulae, quia maxime animaduertuntur. Haec igitur apte numero sequente cadent, si constent ditrochaeis, vt *conquiescit, comprobavit, antispastis, vt fateretur, epitritis, vt probauerunt, conquiescent, et paeonibus, vt videatur.* In principio libertas magna est, sed tamen reperias crebro et hic paeonas, ditrochaeos, anapaestos, qui sunt valde sonori. In medio autem miscentur ita, vt neque nimis tar-

dam, neque nimis volubilem orationem efficiant: nisi vbi sententia peculiarem aliquam vel tarditatem, vel celeritatem requirit: tarditatem, propter grauitatem rei, aut tristitiam, aliumque motum tardum animi: celeritatem, ad exprimendam siue rei celeritatem, siue animi incitationem: de quo in loco de sublimitate dicemus. Ceterum de toto hoc capite omnium luculentissime exposuit Cicero in Oratore a.c. 44. usque ad finem: inter Graecos, post Aristotelem, peculiari libro Dionysius Halicarnassius.



C A P. V.

De Ornatu e Copia.

376.

Copia elocutionis cernitur partim in commutatione, partim in verborum frequentatione apta. *Commutatio* orationis fit duabus rebus, vel verbis, vel figuris. *Verbis* commutatur oratio, si eandem rem aliis semper vocabulis et phrasibus enunciamus, etiam alia constructione: unde oritur varietas, index copiae, et delectans auditorem. Itaque sic faciemus, nisi idonea in promptu sit caussa eiusdem verbi usurandi, aut aliud aptius, vel aequum aptum, non suppetat: quo nomine laudatur etiam locus Homeri supra laudatus ex Od. τ' 204. v. Hermog. de Method. c. 4. quamquam fit etiam saepe apud optimos scriptores per aliquam simplicitatem, quam ἀφέλειαν graeci dicunt, et negligenciam

tiam non ingratam: de qua nos aliquando separatim scripsimus.

377. Huius commutationis facultatem maxime petere debeimus a diuitiis linguae: quae ut erunt maiores, vel minores, ita maior dabitur facultas commutare dicendi. Diuitiae autem linguae sunt, primo, in synonymorum et phrasium idem significantium multitudine, deinde in varietate construendorum verborum. Synonyma autem non subtilitate dialectica capimus, ad quam si exigantur verba, pauca in omni lingua, aut, ut nonnullis placet, nulla reperientur, sed rhetorice: ut synonyma sint, quae sibi substitui, salvo sensu, e consuetudine populari loquendi, possunt: quae qui sunt, mox dicam. Ceterum has diuitias esse magnas in lingua latina, praesertim in phrasibus, quis nescit? Innumerabiles v. c. sunt formulae, quibus aliquem mortuum indicamus, atque similiiter in aliis. Haec igitur copia synonymorum et phrasium debet esse in promptu: nec male consenserunt pueris, qui talia congeserunt v. c. Erasmus, vir magnus, non descensurus ad hunc laborem colligendi, nisi vtile fore vidisset. Eademque de constructione dicere licet: veluti in narrando, cum eiusdem subiecti plura sunt praedicata, licet, ope participiorum et coniunctionum, ita variare σύταξιν, ut unum praedicatum videatur; quod nulla, praeter graecam et latinam, habet.

378. Figurae commutationi seruentes sunt *interrogatio*, quae inflexa dicit, quod ante oratione recta expressum fuerat: *sermocinatio*, quae aliquem inducit secum loquentem, quod ante recta
dix-

dixerat. Veluti hoc: *sapiens se non sibi soli, sed etiam patriae natum putat*: sic ad sermocinacionem redigitur: *sapiens sic saepe secum loquatur: non mihi soli natus sum, sed partem vitae meae reposuit patria etc.* porro λιτέτης, de qua supra §. 330. oīnninoque negatio, ut Xenophon Φανερόν, et mox ἡ Φανέτης: qui cum Platone in hoc genere copiae est admirabilis.

379. Verborum porro frequentia oritur, primum, e synonymorum coniunctione: quae, ut dixi, latius capiuntur, sic, ut etiam tropica verba intelligantur. Et interdum quidem ea, quae proprie synonyma sunt, iunguntur, et quidem in disputatione subtili, in explicando ac docendo, in primis in definiendo: veluti Cicero Or. 64: *quem Graeci περόδον, nos tum ambitum, tum circuitum, tum comprehensionem, aut continuationem, aut circumscriptiōnē dicimus*: quae sunt omnia eiusdem rei nomina, non admodum diuersa: et sic pluribus aliis locis. Alia ratio est, cum proprium et tropicum, aut plura tropica iunguntur, quod est frequentissimum omnibus, nec ullo modo vitiōsum: quippe varia illa verba eandem quidem rem, sed alio modo exprimunt, ut cum *liberalitas* et *benignitas* siue *beneficentia* iunguntur: *investigatio atque indagatio veri: frangi debilitari: que, et similia*. Nam ex ipsis synonymis interdum alterum caussam, alterum effectum exprimit, ut *liberalitas* et *beneficentia*, *frangi* et *debilitari*: aut sunt tropi a diuersis generibus ducti, ut *investigatio* et *indagatio*: genus et species, aut eiusdem generis species, alioque simili discrimine seiuincta.

380.

380. Oritur haec frequentia porro ab ea, quae
εξεργασία dicitur, vulgo in figuris numerata, est
que phrasium idein valentum coaceratio, qua
poetae inprimis, nominatum Ouidius, libenter
vtuntur. Ea ratio virtuteim nullam habet, si sunt
propeinodum absolute pares: quod secus est, vbi
significatione differunt; non hactenus, vt de alia
resint, sed vt aliam partem rei exprimant. Ha-
bet enim omnis res permultas quasi facies, qua-
rum unaquaeque formulas dicendi praebet: in-
suntque in caussis, signis, partibus, modis, effectis,
adiunctis: quas qui potest reperire, is est in hac
copia felicissimus. Veluti Ouidius Trist. III, 12
quindecim versibus, nouem diuersis modis expressit
hoc: *Veris iam initium est:* ductis illis a variis
signis, partibus, caussis, euentis veris: atque si-
milia innumerabilibus locis licebit, in primis apud
hunc, reperire. Virgilius quidem, istam ad ra-
tionem, quinquaginta amplius modis expressit
hoc unum, *arare*, sive *agrum colere*.

381. Atque hinc pendet etiam illud artificium,
quod alibi (§. 161.) tetigimus, quo rebus tritis et vul-
garibus nouitatem tribuere possumus. Neque enim
debet existimari, eundem illum Virgilium, Oui-
dium, et alios, formas illas loquendi omnes ab aliis
accepisse: sed, cum homines essent ingeniosissi-
mi, qui vel perspicuas rerum omnium imagines
concepissent, vel didicissent rem quamque in
omnes partes cogitando versare, et ab omni parte
intueri, animaduerterunt quam plurima, vnde duci
formae loquendi possent, etiam quae aliis non-
dum venissent in mentem.

382.

382. Oportet etiam commutacione uti, in modo ponendae definitionis, divisionis, argumentationis, exempli, in transundo a parte una ad aliam, ab arguento, exemplo ad aliud. Quod consequimur obseruatione varietatis elegantis, qua oratores graeci et latini usi sunt, item in genere subtili, Xenophon in disputationibus Socraticis, et Cicero in philosophicis, nominatim de officio libris.

383. Itaque oportebit in ista copia horum aliorumque cognoscenda ita versari, ut, unde et quomodo quaeque ducta sint, videamus: ita ingenium et ad eandem ubertatem aleimus, et ad perspicientiam parem acuemus: ita paullatim illud artificium consequimur ipsis, erimusque in ornando et noui et copiosi. Sed ceteros copiae fontes indicabimus.

384. Existit igitur copia etiam ex dilatatione verborum singulorum: quae fit variis modis: primum *periphrasi*, quae rem circumloquitur potius, quam suo vocabulo exprimit: qualis est, *officina bonarum artium*, *mercatus bonarum artium*, pro *scho-
la*: *Romanum nomen* pro *Romanis*, *oppressor libertatis*, *pro tyranno*, *iter fato destinatum*, *pro morte*, et similia: in quo genere poetae sunt ubiores, qui multa propria circumloquendi genera habent. Ea sumuntur vel a definitione et natura rei, ut in superioribus, et comparatione, aut emoribus, studiis factis, aliisque, quae accidentia philosophi vocant: ut *Romanae eloquentiae princeps*, pro *Cicerone*. Moderate autem periphrasi et opportuno loco utendum: etenim puerilis est alieno

alieno loco, aut frequentata nimis. Huic generi vicina est *definitio* latior: quippe periphrasis, sicut tropus comparationis, ita definitionis descriptio- nisque compendium est, quae et ipsa interdum loco nominis ponit potest: veluti pro his, *cum magno esset animo*, copiosius dicetur, *cum eo esset animo*, ut omnes res humanas infra se positas haberet, planeque despiceret. Neque vero solum substantia, sed etiam alias quadam orationis partes circumloquimur, ut adiectiva: *nullum honorem sibi haberi potuisse*, qui a te praetermissus esset, pro sumnum honorem sibi habitum: item verba, per formulas dicendi, et aduerbia, ut, *eum sic tuctur*, *ut quem diligentissime*.

385. Alter dilatationis modus est in *distributio ne et partitione*: isque est locupletissimus, et oratoribus visitatissimus. Exempla sunt haec: *moeret senatus*, *luget equester ordo*, *tota ciuitas confedit senio est*: et in principio secundae Catilinariae: *Rem p. Quirites, vitamque omnium vestrum, bona, fortunas, coniuges etc.* Ab hoc distinguunt *congeriem*, *απαιθμησιν* s. *συαθροισμόν*, cuius exemplum est, quod ultimo loco posuimus. Nempe in distributione formas generis et partes totius, e subtilitate dialectica, ponunt, in congerie, qualescunque: quod nobis subtilius, quam pro populatitate rhetorica videtur. Itaque sic potius, si necesse sit, distinguamus, ut *μερισμός* parcior sit, congeries largior.

386. Alios fontes habent, qui de hac parte elocutionis scripsere, ut aetiologyam, gnoimen, simile, exemplum, quae etiam figuris vulgo ponuntur.

nuntur. Sed ea copiam faciunt rerum, non verborum. Itaque de iis egiimus in prima parte. Hi autem, quos posuiimus proprii sunt elocutioni.

C A P. VI.

De Generibus dicendi.

387.

Vt in omnibus rebus, ita in dicendo, maximum est, quid deceat, videre. *Decorum autem oratorium, et oratio apta,* existit ex recto usu trium generum dicendi: quae oriuntur ex triplici oratoris munere §. 11. Primum est *subtile ac tenuē*, alterum *sublime*, tertium his interiectum, quod *mediocre* vocant.

388. *Sublimitas*, ex disciplina Longini, quem in hac parte inaxime auctorem sequimur, a quinque causis oritur: quarum prima est *in sententiis*, quae magnae aliquiūs rei cogitationem afferunt: altera *in vehementibus et generosioribus affectibus*: tertia *in figurarum certa conformatione*: quarta *in genera-rosa et nobili elocutione*: quinta denique *magnifica et numerosa collocatione*.

389. Primum genus sublimitatis, quod est in sensuum altitudine, dignitur maxime a natura, alius tamen arte. Est enim, ut Longinus ait, quasi Echo magnitudinis animi. Nam, qui a natura abiectus est ad humilitatem, humiliisque ac folidice per omnem vitam sensit, non potest capere rerum magnarum illustrem cogitationem. Atque ut in rebus humanis nihil celsius est, admirationeque dignius

dignius magnitudine animi, et factis, ab magno animo profectis: ita etiam dicta inde nata admirabilia sint necesse est: quod est sublimitatis proprium. Itaque Horatius mirandum negat, si poeta magnus, qui maxime sublimitate hac censetur, non existat, cum omnes a pueritia ad quaestum et lordes sint totis animis conuersi. Alitur autem generosa indoles ad hanc sublimitatem in primis libertate, virtutibus, ut iustitia, beneficentia, aliisque, lectione denique eorum, quae magnifice vel dicta, vel facta sunt.

390. Magni sensus, autem insunt, vel in specie aliqua rei, propter magnitudinem admirabili, qualis est Eridis apud Homerum, Famae apud Virgilium: vel in imaginis, animi aciem ferientis, confictione, qualis esse solet in *διατυπώσει*, de qua supra dictum: vel in effectu aliquo, qui sit velut vmbra conspicua in usitatae magnitudinis: etenim magnitudine effetus metimus vires: quale illud est, quod Moses potentiae diuinae magnitudinem planissime expressit his verbis: *Dixit, fiat lux: et facta est lux:* etenim exprimitur magnitudo potentiae ex eo, quod nutu voluntatis efficitur lux, deinde, quod tanta celeritate: denique in omnibus rebus, quae vulgo mensurae magnitudinis putantur, de quibus diximus P. I. S. I. c. 3. si magnitudinem illustrem faciant.

391. Alter fons sublimitatis erat in affectu, et eo quidem magno et generoso: quippe quidam sunt etiam humiles, ut tristitia, metus, inuidia etc. in quibus nulla magnitudo, aut admiratio, esse potest. Nam non potest, ut Seneca ait, de Tranq. c. 15. grande aliquid, et supra ceteros, loqui, nisi mota mens. Enim uero, quæ cum grandi animi commotione dicuntur, in rebus grauibus, ea communuent audientem vel ad-

Ernesti Initia.

N

mira-

miratione, vel pari motu. Itaque omnes commouemur, Didonem iratam et furentem cum audimus. In hoc genere autem qui felices sint, intelligi potest ex iis, quae in capite de affectibus dicta sunt §. 97. f.

392. Tertium fontem fecimus figuras, non omnes, sed augendis rebus aptas. Eae quae sint, et in verbis, et in sententiis, indicatum est supra c. 3. sed illud videndum est, ut sint loco positae, hoc est a rei magnitudine euocatae, et affectu graui expressae. Itaque nec laborabit magnopere orator in quaerendis figuris, interponendisque: sed sponte occurrent cum rebus, praesertim in eo genere, quod ex affectibus oritur. Nam illud prius genus, quod constat a latitudine sententiarum, sine graui motu animi, quo vtuntur saepe poetae et oratores in genere demonstrativo, non indiget grauioribus figuris.

393. In delectu verborum, qui erat fons quartus, videndum est primo, ut sint genere honestiora, et magnitudine productiora, ut *locupletatus*, *excruciatus*, *perterrefactus*, *pro ditatus*, *cruciatus*, *territus*, itemque sonantiora, ut *ferratus*, *regnator*, *amandatus*, *proferreus*, *rex*, *dinissus*: deinde, ut translata, sed cum dignitate, atque etiam nouitate, et interdum audacia atque excessu: nam magnitudo rerum medetur offensioni, quam audacia illa et excessus habere videatur. Interdum copia vtendum ex periphrasi, et distributione, et congerie, interdum breuitate, qualis est in isto Mosaico: nam in hoc genere interdum, praesertim ubi affectus, ira, indignatio, aut altitudo animi ipsa generat sublimitatem, copia obest. Dicendum etiam commutare, in numeris temporibus atque in modis, et oblique: poeticis etiam ut licet
inter-

interdum cum dignitate, vt Cicero ait: *vt lymphatus, furii agitatus.*

394. Denique sublimitatem etiam siue gignit, siue exprimit et adiunat, sensibiliore inque reddit compositio verborum, membrorum, numerorumque grandis. Igitur primum verba ipsa debent esse productiora syllabis, et sonantiora vocalibus, interdum etiam aspera consonantibus, si res aspera sit, aut affectus asper: quo loco etiam initia et extrema verborum asperius concurrent, hiatusque crebri erunt; deinde membris utinam longioribus, et crebris periodis, cum simplicibus, tunc compositis, iisque productioribus, vt aures impleant: denique numeris illigabimus orationem aptis rei subiectae: tardis, in re graui, et ubi in rebus ipsis tarditas est, celeribus ubi, vehementia quedam et celeritas est in sententiis: in primisque in clausulis videbimus, vt eae apte, grauiter, ac numerose cadant: quod quibus numeris efficiatur, supra demonstratum est.

395. Sublimitati contrarium vitium est *tumor*, siue *frigus*: tumorem vocant, quia speciem habet sublimitatis et magnitudinis, cum vera sublimitas nulla subsit: frigus, quia nihil mouet audientes, cum sublimitas vera semper moueat animos, vel admiratione, vel alio quo affectu. Tumor igitur est, si partes externae sublimitatis, figurae, verba, comparant, sine internis, hoc est, nulla sublimi sententia subiecta: quod semper fit necessario; si quis in rebus paruis sublimia captet, aut sine motu animi, cuius idonea caussa subsit: deinde, si res supra modum augentur, vt nec intelligi, nec credi possint, unde risus potius, quam admiratio consequitur: item, si quis, in oratione, poetarum vtitur sententiis, vt Flo-

rus saepe fecit: denique, si verbis vtitur dithyrambicis, tragicis, omninoque translationibus poeticis ac nimis duris et audacibus. Etenim poetis ista condonantur, tanquam profecta ab furore, quem entusiasmum vocant; qui tamen et ipsi subinde modum excedunt, reprehendunturque in merito: in oratione autem nullus excusationi locus relinquitur: denique epithetis, etsi veris, tamen nihil efficientibus quoque loco, vel ad angendum, vel ad ornandum. Exempla suppeditabit Werenfelsius in diatribe de Meteoris Orationis, et alii.

396. In hoc vitium incident omnes, qui, aut ab ingenio et magnitudine animi destituti, sublimitatem orationis adfectant, aut non didicerunt dilectum habere, ac iudicare, quibus rebus apta sit sublimitas: aut nimis studiosi et cupidi sunt nouitatis; quod vitium necessario gignit sensus et verba nimis quae sita, aut inanem speciem habentia, semperque eloquentiam corrupit.

397. Alterum dicendi genus est, quod *tenue, submissum, subtile, elegans et acutum, enucleatumque* vocatur. Id imitatur consuetudinem quotidiani et familiaris sermonis, sed tamen cum virtutibus haud paucis, cum in sententiis, tum in verbis. Ac sententias quidem maxime desiderat veras et acutas, easque crebras, praesertim in oratione: sed in primis conuenit acutarum genus illud, quod materia censetur §. 159. cuius acumen a forma est, raro locum habet. In verbis debet esse rectum, hoc est, purum, perspicuum, et venustum atque urbanum, sed eo, quo supra demonstrauimus, sensu, quo etiam Cicerone Brut. 75. Caesaris commentarios *venustos* vocat, Cornificius totum hoc genus *facetum*: in metaphoris

ris autem reliquisque tropis modicum, saltem verecundum, item in figuris, quarum ut quae maiorem vel ornatum, vel grauitatem habent, ita sunt alieniores: neque copiam amplectetur, sed breuitatem, quae tamen non obsit perspicuitati: in collatione denique singulorum verborum erit negligenter, sed tamen non plane hiunc aut asperum: saepius membris vttetur, quam periodis, sed tamen et his, quas nec longiores respuit, §. 372. conformatioinem autem et concinnitatem §. 374. rarissime adhibebit: in numeris denique erit liberius, sed tamen non plane vagum et dissolutum.

398. Huius generis exempla digna imitatione sunt Caesaris Commentarii, Nepotis Vitae, Ciceronis libri e genere dogmatico multi, sed pulcherrimi de Officiis, epistolae ad Atticum omnes, ad alios item pleraque. Sed eodem etiam saepe vtitur in ceteris libris, et in orationibus, in primis pro Quintio, Roscio Comoedo, et Caecina. E Graecis in hoc genere laudatur Lysias maxime, Aeschinesque Socratus.

399. Ceterum huius generis pulchritudo et suavitas, vt minus incurrit in sensu, difficiliusque animaduertitur et gustatur, nisi ab iis, qui ipsi venustro ingenio sunt, et in legendis huius generis scriptoribus triti et versati: vnde fit, vt pueri non magnopere delectentur Nepote, Caesare, et Ciceronis iis, quae sunt ex hoc genere: ita est ad consequendum difficilior, auctore Cicerone, cuius verba subiectiinus ex Orat. c. 23. *Summissus orator ab indistertis re plus quam opinione differt. Itaque eum qui audiunt, quamvis ipsi infantes sint, tamen illo modo confidunt se posse dicere. Nam orationis subtilitas im-*

tabilis illa quidem uidetur esse existimanti, sed nihil est experimenti minus. Itaque plerique, dum volunt tenues esse, sunt exiles, exsangues, aridi atque ieiuni, quod est contrarium tenuitati vitium: destituti quippe et recta valetudine, quam Cicero vocat, h. e. puritate ac perspicuitate in verbis, et colore ac succo salubri, ex urbanitate, tropis, sententiis et compositione.

400. Tertium genus est, quod *mediocre, temperatum*, vocant, quia est inter magnificum et tenuem interiectum, uberior et splendidius tenui, sed copia et ornatu submissius et modestius sublimi. Itaque ei conueniunt omnia genera ornamentorum a sententiis et verbis, sed cum modo aliquo; unde existit suauitas maxima, ut nihil sit eo genere, ut floridius et pictius, ita iucundius et dulcior.

401. In hoc igitur genere sunt latae et copiosae disputationes, et loci communes, sed sine vehementia et contentione e vehementioribus figuris: sententiae creberrimae, eaeque acutae et nouae: allusiones ad facta, fabulas, res naturales, placita philosophorum, ritus, formulæ solemnies: metaphoræ cum ceteris tropis crebrae, continuae et splendidiae: figuræ verborum omnes, etiam sententiarum, praeter vehementiores nonnullas: collocatio et structura lacuis, periodi elaboratores, concinnatis e paribus relatis paribus, similiterque cadentibus: et numeri denique suaves.

402. In hoc genere e Graecis longe princeps est Isocrates; sed eodem saepe vtuntur etiam Plato et Xenophon in Socraticis: e Latinis Cicero de Oratore atque etiam in Oratore, et Dialogis philosophicis, in epistolis haud paucis, atque etiam orationibus

bus nonnullis: ad quorum adeo imitationem se conseruent, qui in hoc genere aliquid efficere velint.

403. Atque haec sunt illa tria genera dicendi, quorum usu perfectum oratorem iudicandum Cicero disputat, cum aliis locis, tum in praeclaro libro, qui *Orator* inscribitur: cui libro tantum ipse pretium statuit, ut ex eo, quid ipse in hoc genere iudicare posset, iudicari voluerit. ad Diu. VI. 18. Is igitur liber de hoc capite proiectioribus in primis legendus. Sed de usu horum generum pauca addenda.

404. Tenui igitur genere utemur in omnium doctrinarum elementis, vel scripto, vel voce tradendis, in disputatione omni de rebus subtilioribus, in commentariis rerum gestarum annalibusque, in epistolis ad familiares, in orationibus denique, et quidem universis, si tenue argumentum ac subtile tractent, ubi fecus fuerit, in partibus iis, quae ad docendum pertinent, velut in narratione, atque etiam interdum confirmatione ac refutatione, ubi ratio argumenti copiam et ornatum illustriorem non feret.

405. Mediocre genus sedem habet in disputationibus de partibus disciplinae, veluti philosophiae, grauioribus, de rebus diuinis et humanis, in ea, quae proprie historia dicitur, in epistolis de rebus maioribus, ad personasque grauiores et illustiores, denique in orationibus e genere panegyrico, quae materiam habent non maximam, aut affectuum capacem, atque etiam politicis, vel grauissimi argumenti, sed locis certis ac definitis.

406. Sublime denique genus proprium est orationibus, partim e genere panegyrico, cum versantur in rebus personisque magnis, sed tamen plerumque fine parte ea, quae est a grauiori animi motu, partim e politico, quae quidem in rebus magnis, vel suadendis, vel dissuadendis, in accusando defendendoque, versabuntur.

407. Ceterum recte iudicauit Cicero in plerisque orationibus, certe politicis, esse debere quandam aptam ex omnibus generibus mixtam. Etenim non est consultum, semper per sublimia ingredi: quippe

fatigat audientem: neque illa facile oratio tota sublimis esse potest: est enim contra naturam. Nam siue sublimitas a sententiis dicitur, magnifice verbis, figuris, numeris, tractandis: nullum est argumentum tam copiosum et grande, ad quod plene absoluteque explicandum non opus sit subinde rebus tenuioribus, saltem eiusmodi, in quibus perspicuitas magis ad intelligendum desideretur, quam copia et ornatus illustris ad iniiciendam admirationem: siue a grauiori animi motu repetitur; non possunt grauiores affectus diuturni esse, aut per totam orationem durare. Itaque, ut se res dabunt, et natura modusque earum desiderabit, ita genere vel tenui, vel mediocri, vel sublimi vteretur orator in una eademque oratione. Narrabit modo tenuiter, modo mediocriter: in argumentis modo subtilitate vteretur, modo copia e locis communibus et ornatu suavitatis, modo magnificentia. Etiam in ipsis disputationibus eruditis, cum subtiliter et tenuiter differet, una cum re interdum effertur altius, et copiosiorem orationem ornatioremque reddet. Hac ratione modoque Demosthenem Ciceronemque usum esse, et Cicero ipse docet, et lectio quemque poterit docere.

408. Sed praeter hanc triplicem distributionem generis dicendi, et aliae sunt visitatae in Rhetorum scholis, de quibus aliquid dicendum videtur: non quo necessarium sit, sed ne quid praetermississe videamur. Est igitur orationis quedam distributio a nationibus dicta, cum aliud genus *Laconicum*, aliud *Atticum*, aliud *Rhodium*, aliud denique *Asiaticum* dicunt. Alia est a disciplinis arcessita, quae dicendi ac scribendi rationem in *philosophicam*, *historicam*, etc. partitum: alia denique a forma externa, quae in *dialogicam*, *epistolicam* etc. dividit. Est denique distributio ab affectionibus, partibus, virtutibus vitiisque superiorum trium generum nata: cuiusmodi sunt Hermogenianae formae,

409. Iam quod ad primam divisionem attinet, in ea male ponitur pars ea, quae Laonica dicitur. Satis constat, Lacones eloquentiae nihil tribuisse, nec Laconum

conum orationem scriptam vñquam extitisse, nedum
vt peculiaris character orationis Laconicae in rhetor-
rum scholis ferretur. Quintilianus quidem auctor est
XII, 10. olim duo tantum characteres dicendi cele-
bratos fuisse in Graecia, alterum Atticum, alterum
Asiaticum: sed postquam Aeschines exul Rhodi insti-
tuerit eloquentiae scholam, et quasi coloniam, ex-
titisse genus ex vtroque mixtum, quod Rhodium di-
ceretur: vnde etiam Cicero Rhodios oratores com-
memorat in Bruto c. 13.

410. *Atticum* igitur genus sic describunt, vt non
discrepet ab subtili ac tenui: quippe ei elegantiam in
verbis, acumen in sententiis tribuunt; elusque prin-
cipes faciunt Thucydidem et Lysiam: quae opinio
etiam Ciceronis tempore valuit: contra quam late
disputat in Bruto c. 82. f. et de optimo genere orat.
c. 5-9. Atticos quidem vel maxime fuisse Platonem,
Xenophontem, Isocratem ac Demosthenem, nemo
ambigat, eosque principes eloquentia. In his autem
non perpetuam esse illam subtilitatem, ante diximus.
Itaque auctore Cicerone, *Atticum* potius dicemus
eum, qui istis tribus, de quibus ante dictum est, ge-
neribus recte ac loco vti possit: a quo absit nimia redun-
dantia in genere copioso, et contra in genere tenui
et moderato habeat illam Atticis, maxime Platoni et
Xenophonti, propriam venustatem, a qua hic quidem
etiam apis Attica, et oratio eius melle Attico plena di-
cta est, cerniturque maxime in vsu Socratae ironiae,
continuatis metaphoris nitidis, allusionibus lepidis,
iocis festiuis, et sententiis facetis et acutis.

411. Ab eo differt *Asiaticum*, non sic, vt bonis Atti-
ci generis careat, sed vt iis nimis abundet, siveque prae-
fertim vberimum copia, non modo in verbis, sed
etiam vel maxime in exornatione et amplificatione.
Oritur enim ab ingenii vbertate, et rerum memoria
comprehensarum copia, atque adeo a bono quasi suc-
co et sanguine, sed nimis copioso. Itaque est etiam in
laude. Cicero quidem ipse eo genere vsus est, ante
quam se Moloni dedidisset, eiusque specimen est ora-
tio pro Roscio Amerino: sed ab illo monitus coepit il-

Iam redundantiam vitare. Atque etiam Hortensii, qui secundus a Cicerone numeratus est, orationem ex eo genere suisse auctor est Cicero Brut. 95.

412. His duobus interiectum aiunt suisse *Rhodium*, paullo copiosius Attico, pressius Asiatico: ex eoque genere Ciceronem esse volunt. Quod largiendum vtique erit, si Lysias Attici generis exemplum est perfectum et vnicum. Sed ita etiam Demosthenes Rhodius orator erit: quod ineptum esse omnes vident. Si tamen tale genus ponendum, non discrepabit ab Attico mediocri et sublimi genere.

413. Quod ad alteram distributionem attinet, non videtur consentaneum, genus dicendi distinguere e discrimine disciplinarum: tot enim genera forent dicendi, quot sunt genera disciplinarum et artium, in quibus explicandis versari potest oratio. Neque externa illa scribendi forma, quae epistolas, dialogos, orationes etc. facit, proprium dicendi characterem constituere potest, sed rei exponendae quoque loco natura. Atque etiam supra demonstratum est, quo genere dicendi, in qualibet tali forma, pro natura rerum, sit vtendum.

414. Restant formae orationis eae, quae ab Hermogene peculiari libello explicantur: ex qua distributione oratio est vel *perspicua*, vel *magna*, vel *pulchra*, vel *morata*, vel *concitata*, vel *decora*. Sed istae virtutes potius sunt generum dicendi, omninoque orationis, quam peculiares characteres, aut formae: de quibus omnibus iam dictum est suis locis. Ceterum ea iam breuiter in hunc locum cogemus.

415. Perspicuitas igitur est vel in verbis, vel in rebus. In verbis vnde vel oriatur, vel impediatur, iam dictum est §. 309. s. in rebus autem nascitur ex ordine §. 123. et copia iusta in explicando, exornando, §. 128. Obscuritas vnde sit, ex iisdem intelligitur locis. Sed in vtramque partem etiam valet breuitas: nam et obscurat, si non est legitima, et lucem adfert, si est iusta. Itaque de ea aliquid videtur dicendum.

416. *Breuitas* quae sit in narrando, supra dictum §. 195. sed vniuerse *breuitas* quae sit, dicendum, quando in eius iudicio plerique vehementer errant. Sed prae- monen-

monendum illud est, quod non obseruant vulgo; breuitatem in hoc quoque genere esse e notionibus iis, quae non absolute intelligentur, ac per se, sed e comparatione. Nam, cum breuitas ita amplectenda sit, ut non modo conseruetur, sed etiam adiuuetur perspicuitas, item, in oratione, ne impediatur persuasio, sed facilior reddatur: esset enim alias haud dubie in vitio e satis autem constet, eam esse diuersitatem ingeniorum humanorum, et a natura, et a doctrina, ut non eadem facilitate et celeritate vel capiant rem quamque omnes, vel moueantur, cf. §. 128. efficitur, ut alia breuitas sit in oratione subtili, quae pertineat ad viros acutos et doctos, alia in ea, quae habeatur ad populum, sitque iusta omnino breuitas, in rebus quidein, si nihil amplius afferamus, quam quod sufficiat ad intelligendum, aut ad persuadendum apud eos, ad quos dirigitur oratio, in verbis autem, si nihil ponatur, quo omissa, res aequa possint intelligi. Id autem definire, non est, nisi valde triti in his rebus iudicis, nedum, ut quisque de breuitate posse iudicare, qui haec eloquentiae studia vix attigit. Ceterum, hoc constituto, dico, esse breuitatem cum primis in Demosthene et Cicerone, praeterquam in iis locis, ubi data opera copiosiores ad delectandum esse voluerunt.

417. Breuitati in rebus seruit maxime delectus eorum, quae sufficient ad intelligendum, quae intelligi volumus, accommodatus ad personas, ad quas oratio pertinet: quod est per difficile, praesertim in narrando: de quo genere breuitatis alio loco dictum: in quo sane diligentior Cicero, quam Tacitus et Plinius, fatis attendenti reperietur. In verbis prodest omissione eorum, quae consuetudo bene loquentium omittere solet §. 307. inanum epithetorum, et tautologiae fugia, tum contraria eorum, quae copiae sunt efficientia, velut nomen pro periphrasi et definitione, et similia. Vtrique generi profundunt periodi apte textae, per participia in primis: per quas ad paucos saepe versiculos, salua perspicuitate, redigi possunt totae aliorum, disolute et membratim scribentium, paginae. Quo magis patet error grauis eorum, qui, ubi crebra et brevia


mem-

membra vident, vt in Plinio, Tacito, Seneca, ibi breuitatem orationis agnoscunt, non autem in iis, vbi crebras periodos, in primis longiores.

418. Sed vt iusta illa et legitima breuitas probanda est: ita cauendum, ne, ea alieno loco vtenda, inepti simus. Etenim, vt in cibo, potu, vestitu, aliisque rebus, non contenta est humana natura necessitate, sed etiam copiam quandam ad delectandum desiderat, et tanto quis putatur esse beatior, quanto magis etiam copia, vbi tempus locusque suadent, vti potest, qui suo tempore non vtitur, cum possit, avarus ac folidus: sic etiam in dicendo expectatur interdum copia, et ad relaxandum a contentione animum, et ad delectandum. Iстis in locis breuitate vti, etiam iusta illa, tam in vitio est, quam si copiosus sis, cum sola intelligentia, non delectatio desideretur.

419. Illud autem multo magis cauendum, ne in breuitatem incidamus, quae sit vitiosa propter obscuritatem, non quae certis hominibus videatur, sed quae omnibus, maxime in oratione, quae auditur, non legitur. In quo vitio sunt e Graecis Thucydides, e Latinis Sallustius, Tacitus et alii, quorum breuitatem imperiti, acuminis opinione capti, admirantur. Sed ad reliquias formas veniamus.


420. *Magnitudo et concitatio* sunt virtutes generis sublimis: et illa quidem, qua sensus, maxime e primo fonte oriunda, haec ex altero: qua verba, illa e troporum, et figurarum illustrium usu, collocatione gravi, numerosisque periodis, haec ex acrioribus figuris maxime, et membris crebris et abruptis. *Pulchritudo* contra, est virtus generis medii, quae existit necessario, si oratio sit talis, qualem supra descripsimus. *Morata* autem oratio quae sit, et quomodo efficiatur, satis, opinor, elucet ex iis, quae de moribus dicta sunt. *Decora* denique est, quae tribus generibus dicendi eorumque virtutibus recte vtitur. Adeo verum est, quod Aristoteles iudicat, distributiones formarum, praeter illam triplicem, esse inutiles. Haec de elocutione.
















Landesbibliothek Oldenburg

